

## LUCAS NAAJIOTASANO JESUCRISTOJINIJI

*Niya pohuatashiyari casaara Lucas naajiotaquiaari nioni*

<sup>1</sup> Queraatia pueyari suraatia naajionu saniniujuquiaari puetunu canaa tajinia miishanojuanaa. <sup>2</sup> Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na cotelesacari. Nojoriiri na nuhuaji na rupaa pohuatanaara jiyate-saaquiaari. <sup>3</sup> Janiyari niishiriojoriquiaani, maniniaruhua quiocuara cua naajionurajuhuj cua panishano Teófilonaa. Naaratej, janiyari pueyaracaanu jacaria neque-soreeriquiaa puetunu Jesu miishanojuanaani, na coteejajiniji. <sup>4</sup> Naacuajitij, quiocuara naajiyanjia na coteenujiniji, seetanujuanaa quia niishiniuria puetunujuanaa, taa quia niishitiojosaacanuajani.

*Pueyaso seru pohuatasacari Tiuquinijiona Juan rasaanutaniya*

<sup>5</sup> Herodes jaara jiyaniijia quiquiaari Judea jiyajinia, Zacaríasri jiyacari pueyacuara secojona quiquiaari. Nojuajaari supuetana Abías niquiohuacuajinio supueno quiquiaari. Necocua sesa quiquiaari Isabel. Cuno maajiiri supuetana Aarón niquiohuacuajinio supueno quiquiaari. Nojori supuetanaari mariyata tariucuaaanu pueyacuara secojona quiquiaari. <sup>6</sup> Zacaríasri necocua Isabelta maninia mijiaca quiquiaari Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniji caminiujiunaa naajionuutaquiaaricuajani. Nojoricuara maja na naata sesa casaa tonujusaanu quiquiaari, saaja maninia mijiaca nojori

quishacari. <sup>7</sup> Nojoriiri maja na muetunu quijia, niyajaru Isabel quiniuucua. Naajuhuj, nojoriiri maja tari na naata muetunu quiquiaari, saaquiapue nojori quishacari.

<sup>8</sup> Tamacari, Zacaríasri narta pueyacuara secojon-aata poonijioriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari. <sup>9</sup> Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia. Pueyacuara secojo naari jiitiquiaari saajia naajiosano jacutanura juhua tacuar-ishijosacari, nojori niishiniuria teyano nojorijinijiniote Pueyaso Shuriucua Quiquio tiuquiniutianiya, shanohua jaanutaja na catijianura tii. Cuno juuca saniniuujia, saajiaari Zacaríascuara tacatequiaari. Naacujitij Zacaríasri seeratasaaquiaari tii na tiuquiniuria shanohua jaanutaja na catijianura. <sup>10</sup> Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. <sup>11</sup> Jiyacaritij, Pueyaso seruuri Zacaríasqua muetaquiaari. Nujuariquiaari shanohua jaanutaja catijiasaqui miaquetajara. <sup>12</sup> Zacaríasri shiriiquirii na niquishacari Pueyaso seru. Jiyanohua na puerereeri. <sup>13</sup> Pueyaso seruuri na sequeree:

—Maja puerenu Zacaríasnaa. Pueyasocuajaari quia secojosano tojiquiaari. Quia niquiocua Isabelri quiara muetunutaniya. Quiocua na sesojore “Juan”. <sup>14</sup> Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. <sup>15</sup> Quia niyanuuri cutara pueyano quiniutianiya Pueyaso niquiara. Nojuajaari vino ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyojua. <sup>16</sup> Nojuajaari queraatia Israel pueya tacatonutaniuhua nojori Jiyaniijia Pueyasocua. <sup>17</sup> Nio Juanri pa Jiyaniijia puetana quiniutianiya. Nojuajaari pueyara Pueyaso sequesano

caminiujiunia supuetana Elías sohuanu jiitianutaniya, na cumaacanio. Naacujitij, pueya jiuujia taraajonutaniyari, nojori jiyanooniuria necohua. Naajuhuj, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacujitij, pueya jiuujiacaari jeenucuasano quiniutaniya pa Jiyaniijaacujaj.

<sup>18</sup> Zacaríasri Pueyaso seru nequesotaree:

—¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niquiocuaari motajajuhuj.

<sup>19</sup> Pueyaso seruuri na riucuaaree:

—Janiyacuajaari Gabrielni, Pueyaso tacoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyaso-jiniji. <sup>20</sup> Quiarijia saniniuujia, cua sequesanoocua quia tiyuaquiniucua, quiaari tiquia quiniutaniya. Majaari quia pocuanu quiniutaniya cuara rasaarejaatijia quia niyanu. Naajaa, puetunu cua sequesanojuanaari naa quiniutaniya taa Pueyaso paniyacuajani.

<sup>21</sup> Jiyacaritij, pueyari Pueyaso quiquio carijiniacuma sashiriquiaa, Zacarías cuara tohuatohuara. Nojori-iri shiriiquitiurii pueyaracaanu Zacarías tarishishacari Pueyaso Shuriucua Quiquiojinia. <sup>22</sup> Zacaríasri socua tohuatamohua. Majaari na naata pocuanu quiriqiaa. Nareja shishiniojoriquiaari. Naacujitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.

<sup>23</sup> Zacarías jaara puecaquiaari puetunu na poonijionu juucajanaa taa na sequesaaquiaaricujani, na tiajinia quiaarohuari. <sup>24</sup> Na nuhuaji, necocua Isabelri manajeree. Na manaja jamaatiaquiaariiri. Majaari na muetanu quiquiaari na tiajiniji cuara na shocojoquiaarijiaatijia cinco raca. Nojuajaari tama sequequiaarijiaaja:

<sup>25</sup> “Quiarijiani, cua Jiyaniijaari maninia miirii janiya.

Majaari socua pueya rerequetenu quiniutianiya janiya, muetujua cua quishacari tari”.

*Pueyaso seru sequesacari Jesu rasaanutaniya*

<sup>26</sup> Seis raca jaara shocojoquiaari Isabel manajesacarcuaa, Pueyasoori na seru Gabriel jiyaroree Nazaret tiacajinia, Galilea jiyajinia. <sup>27</sup> Tamonu niyacoocua na jiyaroreeri, cante tari sequesaaquiaaricujani José jiyaniishano pueyanota na caminiuria. Na camiriqianoori supuetana jiyaniijia David niquiohuacuajinio supueno pueyano quiquiaari. Niyacoo sesa quiquiaari María. <sup>28</sup> Pueyaso seruuri nocua tiuquimiaa. Na sequereeri:

—Janiyari quiocua jiyarosaareeni, Pueyaso shuquiriti-asano niyacoona. Jiyaniijia Pueyasoori quiata quiya, socua shuquiriaatia quia quiniuria tamasaca maajipohuajiniji.

<sup>29</sup> Maríari jiyanohua tacaquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeree janiyani?” <sup>30</sup> Na nuhuaji, Pueyaso seruuri na sequeree:

—Maríanaa, maja puerenu. Pueyasoori quia shuqiritiniutianiya. Quiaacuajaari na timitiasano. <sup>31</sup> Quiarijiani, quiaari manajenutaniya. Quiaari cayaniyojua ranutaniya. Quiocua na sesojore “Jesu”. <sup>32</sup> Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuacaanu Quijia Niyanu. Pa Jiyaniijia Pueyasoori na jiyatenutaniya Jiyaniijiarajanaa na quiniuria na supuetana David niti. <sup>33</sup> Israel pueya jiyaniijia quiniutianiyari. Pueyaracaanu jitianutaniya na pueyari. Majaari na shaajenu quiniutianiya Jiyaniijia na quishacari.

<sup>34</sup> Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

<sup>35</sup> Pueyaso seruuri na sequeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutaniya. Naacuajitij, quia niyanuranoni, cunoori Pueyaso Niyanu quiniutianiya. Nojuajaari seetanujuanaa Pueyaso tojjijia quiniutianiya. <sup>36</sup> Naajuhuj, quia supuetanajinijinio motaja Isabelri neyanu ranutaniyajuhuj. Cuno maajiiri seque-saaquiaari “niyajaru maajitia”. Naajaa, seis racaari tari na shocojiya na manajesacari. <sup>37</sup> Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

<sup>38</sup> Maríari sequereer:

—Maniniacuajaqui. Janiyacuajaari cua Jiyaniijia Pueyaso seruni. Pueyaso cuara miiria janiya taa quia sequereecuajani.

Na nuhuaji, Pueyaso seruuri quiacuhua.

*María quiasacari Isabel niqiniuucua*

<sup>39</sup> Maríari jiyacari quiaquiaari na secoonuta Judea jiyajinia, Zacarías tiajiniaara tamonu tiacajinia. Cuno jiyari tuhuananuhuaraca. <sup>40</sup> Zacarías tiajinia María tiuquishacari, Isabel sequereeri. <sup>41</sup> Isabel tojishacari María sequesano nojuaja, ¡conajaari na jiniacuma nujuanequequee! Pueyaso Sohuanuuri Isabelcua tiuquiquii na cumaaca na jiitianura. <sup>42</sup> Naacuajitij, Isabelri jiyacari na rupaa paaretaree. Naa María sequereeri:

—¡Pueyasocujaari socua maninia miiriucuaa quiajaniya tamasa maajipohujiniji! ¡Maninia miiniutianiya quia niyanujaariuhuj! <sup>43</sup> ¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niqiniuria janiya? ¡Maja! Naajaa, jiyanohua timiyanjia! <sup>44</sup> Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. <sup>45</sup> Shuquiriaatia quia quiri, quia tiuuniuucua Pueyaso sequesanoocua quiajaniya.

<sup>46</sup> Maríari sequereer:

—¡Coojia jiyanoehua shuquiritiaa cua Jiyaniijia Pueyaso!  
<sup>47</sup> ¡Cua sohuanuuri cua Jiyanoonia Pueyaso timitiaani! <sup>48</sup> Juhua najuhuana quijianijia. Naajaa, Pueyasoori cua jiyanoorii. Cua saquiriojorucuaari na tojjia cua quishacari. Quiarijiani, pueyari pueyaracaanu cua sequenutaniya: “Pueyaso shuquiritiasano María”. <sup>49</sup> ¡Pueyasoori jiyanoehua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. <sup>50</sup> Nojuajaari pueyaracaanu jiyanoohua na tojitianaa, canapuate na rerequeteyaquijiacacuajani. <sup>51</sup> ¡Nojuajaari jiyanoehua maninia miiquiaa na cumaacata! Nojuajaari niishijiaca pueya shocotequiaari, canapuate tama na cuaqueyajaaja jiyatequiaari juhua niishijiacaracuajani. <sup>52</sup> Nojuajaari cutara jiyaniijianucua jatatee, cuno pojori jiyaniishano niishiyashijiaca pueya jiyatesaanura jiyaniijiaara nojori niti saniniuujia. <sup>53</sup> Miaajeejunucua tootijioreeri maninia sumatuuta. Puera casamiriaca pueya taanuuquiaariiri, casaaju nojori quiojonura. <sup>54</sup> Na pueya Israel naacureeri. Majaari na niyajetanu quiquiaari nojoriicua na taraajenu. <sup>55</sup> Naa miiquiaariiri taa na sequequiaari pa supuetanaacuajani. Pueyasoori naa pa supuetana Abraham sequequiaari: “Seetanujanaa quiocua taraajenutaniyanijia, quiocuajinio supueriquiano pueyacuanio”.

<sup>56</sup> Na nuhuaji, Maríari queraatia tarishiquiaari Isabel tiajinia. Jiuujianaraca raca nuhuaji, Maríari tacatequiaariuhua na tiajiniohua.

*Tiuquinijiona Juan rasacari*

<sup>57</sup> Na nuhuaji, Isabel rasacari quiquiaari. Jiyapuer-  
 atereeri. <sup>58</sup> Na shuriucua quiniaa, mariyata na jiya-

soocuaajinio supueno pueyajuhua, nojoriiri jiyanhua shuquiriquiaari nojori tojishacari taa Pueyaso jiyanhua taraajequiaari Isabelcuani, na shuqiritiniuria neyanuta. Nojoriiri Isabelta shuquiriquiaarijuhuaj. <sup>59</sup> Nojoriiri Zacarías tiajinia rerejoquiaari conaaja jiitiasacari ocho juuca, na cararaatiuuquia co miatesaanura, taa Moisés rootaquiaaricujani. Nojoriiri na sesojonu paniriquiaa juucua Zacarías, na que sesaanucua na quiniuria. <sup>60</sup> Na nucuaari saaja sequeree:

—¡Maja! Sesojosaanutaniyano “Juan”.

<sup>61</sup> Pueyari saaja sequeree:

—¿Casaarateni? ¡Majaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

<sup>62</sup> Cunora, pueyari na que Zacarías shishinioree na nequesotanura taa na sesojonu paniriquiaa neyanuni. <sup>63</sup> Zacaríasri naajiooju casaa maseree na naajionura tii neyanu sesarano. Naajioreeri: “Na sesa, Juan”. ¡Pueyari jiuujiatequee! <sup>64</sup> Jiyacaritij, Zacarías nitiiri sasaquitiacuhua. Juhucatecara pocuarohuari. Pueyaso miishano pohuataree pueya niquiaraari, na shuqiritiasacari Pueyaso. <sup>65</sup> Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhucua quijiaca pueyara. <sup>66</sup> Puetunu nio tojtitianaa pueyajanaari niishirionuuquiaari. Tama nojorijaaritia nequesoreetooquiaari:

—¿Casaquitijia cuno mueya quiniutianiya na nuhuajitijaj?

Pueyari niishiquiaari Pueyasoori seetanujuanaa cuno mueyata quiriquiaa, na cumaquiniuria.

*Zacarías sequesano na shuqiritiasacari Pueyaso*

<sup>67</sup> Na que Zacarías jiuujiaari jiyanhua mishaja quiriquiaa Pueyaso Sohuanuta. Pueyaso Sohuanuuri na pohuateree. Naaratej, Zacaríasri naa sequequiaari:

<sup>68</sup> —¡Jiyanhua maninia pa Jiyaniijia Pueyaso, pa supuetana Israel Jiyaniijia! ¡Cuaara jiyanhua shuquiritiasaaria mijiria na niniuucua na pueyacua, pocuaji na tacunura! <sup>69</sup> Pocua jiyaroree cumaacaraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuacaanucujani. <sup>70-71</sup> Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianutaniya pocujini, pa niquiniu paniyaquijia pueyano. <sup>72</sup> Nojuajaari sequequiaarijihuaj, majaari na niyajetanu quiniutianiya na sequesano pa supuetanaa, pocua na taraajenura. <sup>73-74</sup> Pueyasoori pa supuetana Abraham sequequiaari seetanujuanaa, nojuajanaari pocuaji ritianutaniya pa paraa, pa puereyaquiniutia nera pa poonijionura shitimia. <sup>75</sup> Nojuajaari Abraham sequequiaarijihuaj maninia quijjara pa jataniniutianiyaquiniaari, saaja nera pa quiniuria pueyaracaanu. <sup>76</sup> Quiajaniya saniniuujia, quiyanuniyojuanaa, quiaari sesojosaanutaniya Jiyocuacaanu Quinia sequenu panishano caminiujiunia. ¡Quiaari pa Jiyaniijiaranojuanaa puetanutaniya, juhua na nuu jeenucuariquiano! <sup>77</sup> Quiocua Pueyaso saquirojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. <sup>78</sup> ¡Pa Pueyasoori jiyanhua jiyanoojia! Pocua taraajeja. Na jiyarosacari poojia Cuhuatariquiano, nojuajaari



pa cuhuatanutaniya, maja ninishiqui pa quiniuria socua. <sup>79</sup> Maninia pa cuhuatanutaniyari, maninia pa rucuanefonura Pueyaso niquiara, panaatia poojiacata. Naacujitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

<sup>80</sup> Conajaari maashiquiaari. Nojuajaari tama na cuaqueyajaaja cumaquiuaari socua seetanujuanaa Pueyasocua tiuujia na quiniuria. Nojuajaari pueyaracaanu cariquia jiyajinia quijia quiquiaari nojuaja jaara Pueyaso sequenu panishano caminiujuniu coteequiaariijaatijia narta Israel pueya niquiara.

## 2

### *Jesu rasacari* (Mt 1.18-25)

<sup>1</sup> Tiuquinijiona Juan rasaanu nuhuaji, jiyaca jiyaniija-ajanaa César Augustoori Roma tiacajiniji sequequiaari puetunu na jitiasano pueyapuejanaa cuaara serojosaaria puetunu nojori jiyacajiniajanaa. <sup>2</sup> Pueya jaara coteenujanaa serojosaaquiaari, Cirenio jiyanishano pueyanoori jiyacari Siria jiyajinia jiyaniija quiquiaari. Nojuajaari jiyaniijia César Augusto jiyatesano quiquiaari. <sup>3</sup> Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

<sup>4</sup> Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaarihuahua. <sup>5</sup> Maríari tari sequesaaquiaari nojuaja Joseeta caminiutianiya. Naaratej, Maríari nata quiaquiaarijihuahua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. <sup>6</sup> Belén tiacajinia nojori quishacari, jiyacari tari quiquiaari María

ranu juuca. <sup>7</sup>Tii jiyapueratereeri. Conaaja jiunicoquiaari toqueraacuacajiniaari. Na nucuaari na niaquiaari juyaca miaquejajinia. Marfari naa raquiaari cuniqui maja quiquio quishacari nojoriria rucoonaa tiuquijia tiajinia.

*Pueyaso seya muetasacari borrego cojuanaa pueyacia*

<sup>8</sup> Belén tiaca shuriucua cuno niucujaja, borregohua cojuanaari suteriquiaa cuhuariquijajinia, na seya nojori cojuasacari. <sup>9</sup> Canashiyaquiji Pueyaso seruuri nojoricua muetaquiaari. Jiyaniijia Pueyaso shacantuuca cumaacaari nojori cuhuataquiaari. ¡Nojoriiri jiyanoehua shiriiquitiirii! <sup>10</sup> Pueyaso seruuri nojori sequeree:

—¡Maja nia puerenu! Niaacua nimiaanijia, jiyanoehua maninia casaa cua pohuatanura nijaniya. Cunora, puetunu pueyajanaari shuquiriniutianiya. <sup>11</sup> ¡Niaacuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhuj. <sup>12</sup> Niaa jaara nocua quiaare, niaari conaaja riuriatanutaniya toqueraacuacajinia jiuniosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano nijaniya.

<sup>13</sup> Jiyacaritij, narta Pueyaso seyari na cojishii. Jiyanoehua queraatia quiriquiaari. Nojoriiri naa maniniuhuaqueetariquiaa Pueyaso:

<sup>14</sup> —¡Jiyanoehua maninia pa Pueyaso, jiyocuacaanu Quijia! ¡Nojuajaari jiyanoehua pa shuquiritiasano, na jiyaronuucua jiyacia quiniaa Jiyanoonia! Naacuajitij, cana Pueyaso shuquiritiaani, nojoriiri jiyanoootioonutaniya narta pueyata.

<sup>15</sup> Pueyaso seya jaara tacataquiaariuhua jiyocuacaanu na quiquiojiniohua, borregohua cojuanaari tama seque-tooquiaarijiaaja:

—¡Belén tiacajinia pa quiaarequi! ¡Pa niqishii cuno, casaajiniji pa Jiyaniijia numooteree pajaniyacujani!

<sup>16</sup> Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. <sup>17</sup> Nojori niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. <sup>18</sup> Puetunu pueyajanaa, cante nojori pohuatasano tojiriquiaani, nojoriiri jiuujitaree. <sup>19</sup> Majaari María niyjetanu quiquiaari puetunu nojori pohuatasanojuanaa. Noojiajinia na niishiriojoriquiaa pueyaracaanuuri. <sup>20</sup> Borregohua cojuanaari quiojoquiaarihua. Nojoriiri Pueyaso maninihuaquetariquiaa nojori tojishanojiniji, nojori niquishanojininio. Puetunujuanaari naa quiquiaari taa cuno niucua Pueyaso seru pohuataree nojoricuajani.

*Conaaja Jesu pasacari Pueyaso Secojoua tiajinia, Pueyasora jiyatesocoriquiano*

<sup>21</sup> María conaaja jaara ocho juuca jiitiaquiaari, na cararaatiuuquia coori miatesaaquiaari, taa Moisés rootaquiaaricuajani. Na miatesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Maríacuajani, na manajyaquishacarijia.

<sup>22</sup> Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. <sup>23</sup> Na queyari naa miiquiaaritiij, tariucuaaanu Pueyaso Rupaajinia naajiotasano tojitiajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. <sup>24</sup> Naaratej nojoriiri quiaaree na seru mosaanura nojoricuara Pueyaso Secojoua tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicuajani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiaquiri, cuaara puecoosaaria caapiqui shinijia”.

<sup>25</sup> Jiyacaritij, tamonu pueyanoori Jerusalén tiacajinia quijia quiriquiaa. Na sesa quiquiaari Simeón. Nojuajaari maninia miijia quiquiaari Pueyaso niqiuara. Pueyara-caanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyarooro Israel pueyacuaji Tacuriquiano. Nojuajaari Pueyaso Sohuanu jiitiaja. <sup>26</sup> Pueyaso Sohuanuuri na niishitiquiaari ma-jaari na shaajenu quiniutianiya nojuaja cuaara niqiri Cristojaatijia, Pueyaso jiyarosaariquiano. <sup>27</sup> Pueyaso Sohuanuuri na jiyatequiaari namitia cuno juuca Pueyaso Secojojua tiajinia. Naacuajitij, Jesu jaara pasaaquiaari Secojojua tiajinia, nera na miishaanura puetunu tariucua-caanu rootasanojuanaa, Simeónri jiyacari tii na niquirii. <sup>28</sup> Simeónri Jesu paree. Na cacanuureeri. Naa Pueyaso sequeree jiyanhua na shuquiriniutiaari:

<sup>29</sup> —¡Cua Jiyaniijianaa, tariucujaja! ¡Quiarijia cutara cua naata cusonu juhuajaniya, shuquiriaatia cua quishacari! Quiaacuajaari tari cua niqitirii tar-ijia quia sequesano janiya, quia seru cua quini-uucua. <sup>30</sup> Tari niqirii quia Jiyarosanocujani-  
jia, canaacuaji Tacuriquianoni. <sup>31</sup> Nojuajaari quia niqitiosano puetunu jiyacajinia quiniaa pueya-pueecuarajanaa. <sup>32</sup> Nojuajaari puetunu taucua  
jiuujajanaa cuhuatanutaniya, maninia nojori ni-  
ishiniuria quiajaniya. Naajuhuj, quia pueya Is-  
raelni, nojoriiri tamasa pueya shuquiritiasano  
quiniutianiya na seera.

<sup>33</sup> Jesu que, na nucujuhuj, nojoriiri jiuujiateree naa Simeón sequesacari conaajajiniji. <sup>34</sup> Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajaniya.

Jesu nucua María sequereejariuhuj:

—¡Cua tojiri! ¡Nio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na miiniucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. <sup>35</sup> Naacuajitij, tama pueya niishiriojosano noojiacajiniajaarijia niishishaanutaniya. Quiara saniniuujia, jiyanhua taraatiaari quiniutianiya. Quioojaari juhua mueruuta tohuariquitishaanutaniya quia mueyacua quia miishacari.

<sup>36</sup> Cuniqijia, Pueyaso Secojoua tiajiniani, tamonu motajaari tii quiriqiaajuhuj. Cuno motajaari Pueyaso sequesano caminiujunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquihuacuajinio supueno maaji quiquiaari. Jiyanhua motaja quiquiaariiri. Shusha niyaco na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. <sup>37</sup> Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secojosacari pueyaracaanu. <sup>38</sup> Simeón pocuasacarijia, jiyacaritij, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “¡Paacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijiaca pueya niquiara. Nojori sequereeri:

—¡Niocuajaari pa sashishano pa pueyacujia

Tacuriquiano!

*Na queya tacartasacariuhua conaaja Nazaret tiacajinihua*

<sup>39</sup> Jesu queyari puetunu Moisés naajioneejinia Pueyaso rootasanojuanaa tucuataquiaari na conajara. Na nuhuaji, nojoriiri Galilea jiyajiniara tacatequiaariuhua tama nojori tiacajinihuaaja, Nazaret tiacajinia. <sup>40</sup> Naatujua Jesuuri maashiquiaari. Socua cumuecara quiquiaariiri, maninia niishijiaranio. Pueyasoori jiyanoehua na naacujua.

*Mashajaniyojua Jesu quishacari Pueyaso Secojoua tajinia*

<sup>41</sup> Puetunu marijiajanaa, Jesu queyari quiojoquiaari Nazaret tiacajiniji, Jerusalén tiacajiniara, Pascua juucajinia nojori queranacunura. <sup>42</sup> Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaaricuajani puetunu marijiajanaa. <sup>43</sup> Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jijojequiaari. Majaari na queya niishiniu quiriquiaa. <sup>44</sup> Nojoriiri jiyaniquiaari Jesu naasucua narta quiojonaa tajinia quiariquiohuajuhuj. Naacuajitij, nojoriiri juhuajaniya rucuaneree puetunu cuno juucajanaa. Cuno niucuaja, nojoriiri Jesu pajequiaari nojori pueya tajinia, nojori niishishano pueya tajiniano. <sup>45</sup> Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara.

<sup>46</sup> Jiuujianaraca juuca nuhuaji, nojoriiri socua Jesu riuriataquiaari Pueyaso Secojoua tajinia, Moisés Rootasanojiniji niishitiojonaa pueya tajinia cajiyano. Nojori tojiriquiaari. Nojori nequesoreetariquiaajaariuhuj. <sup>47</sup> Puetunu pueyajanaa, canapuate na tojtiriariaani, nojoriiri jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na

nequesoreeriquiaa. <sup>48</sup> Na queya jaara na niquiquiaari, nojoriiri shiriquitiuquiaari. Na nucuaari na sequeree:

—Quiyanunaa, ¿casaara naa quia miirii canaani? ¡Janiyari quia queta quia pajeriquiaani jiyanoehua canaa tacaaniutia quiocua!

<sup>49</sup> Jesuuri na riuquaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojua tiajinia quiniuucua jiaatiaani?

<sup>50</sup> Majaari nojori niishiniu quiquiaari Jesu sequesano.

<sup>51</sup> Jesuuri na queyata quiaarohua nojori tiajiniohua Nazaret tiacajinia. Na queya tojijia quiquiaariiri. Na nucuaari pueyaracaanu noojiajinia racataja puetunu na niishishanojuanaa neyanu Jesujiniji. <sup>52</sup> Jesuuri socua maashiquiaari, socua niishijara quiquiaarijiaariuhuj. Pueyaso shuquiritiasano quiquiaariiri. Puetunu pueyajanaari na shuquiritiaquiarjiuhuj.

### 3

*Tiuquinijiona Juan pohuatasacari Pueyaso rupaa cariquia jiyajinia*

*(Mt 3.1-12; Mr 1.1-8; Jn 1.19-28)*

<sup>1</sup> Na nuhuaji, Tiuquinijiona Juanri Pueyaso rupaa pohuatanu coteequiaari. Jiyacaritij, quince marijiaari tari shocojoquiaari César Tiberio, jiyaniijijanaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Tracnite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri jiyaniijianucua César Tiberio jiyatesano quiquiaari

cuno jiyacajinia. <sup>2</sup> Jiyacaritij, Anásri Caifásta Judiocua-caacuara secojonaa jiyaniijianucua quiriquiaa. Jiyacaritij, Zacarías niyanu Juanri cariiquia jiyajinia quiriquiaa. Tii na quishacari, Pueyasoori na rupaa na niishitiquiaari. <sup>3</sup> Naaratej, Juanri puetunu Jordán moo shuriuquioco jiyacajanaa tajiQUIAARI na poojotasacari Pueyaso rupaa pueya niQUIARA. Nojuajaari naa pohuataQUIAARITIJ:

—¡Nioojia nia tacatore maja socua sesa nia miiniuria, moojinia cua tiuquinijionura niajaniya, Pueyaso jiyanooniuria niajaniya sesa nia miishanojiniji!

<sup>4</sup> Naacuajitij, supuetana Isaías naajiotasanoori tohua-teeQUIAARI. Pueyaso sequenu panishano caminiujunia na quiniucua, nojuajaari naa miriqui naajiotaqUIAARI supueriquiano Juanjiniji:

“Pueyano rupaari tojishiya cariiquia jiyajinia nacaano. Sequeyari: ‘¡Jiyaniijia nuura nia jeenucuare! ¡Puetunu maninijanaa nia nuunure, maja shuutiuniu na quiniuria! <sup>5</sup> ¡Puetunu tacocuajanaa cuaara mishiquiojosaaria maninia jamatunu na nuu quiniuria! ¡Puetunu tuhuananuhuajanaa cuaara jiuurioosaaria jacanano na nuu quiniuria! ¡Shuyorocotunu nuu cuaara pocuareesaaria! ¡Puetunu surocoshiquiajanaa cuaara mishiquiojosaaria jacanano na nuu quiniuria! <sup>6</sup> Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani’ ”.

Naa miriqui Isaías naajiotasanooni, cunoori pueya nu-mooteriquiaa juhuacarijia nojori jeenucuanura noojiaca, Jiyaniijia Jesu tojtiajaca nojori quiniuria.

<sup>7</sup> Pueya jaara quiojoQUIAARI na tiacajiniji Tiuquinijiona Juancua, Juan tiuquinijionura nojori, Juanri naa nojori juaaQUIAARI:



—¡Niaacuaajaari juhua sacocua! ¿Cante nia numooteree nia mashiniuria jiyanohua Pueyaso saniitionu panishacari niajaniyani? <sup>8</sup> ¡Maninia miijiara nia quiri, canaa niishiniuria niaari seetanjuanaa nioojiaca tacatoree sesa nia miiniujiniji! ¡Majaari najuhuaana tama nia cuaqueyajaaja nia sequenu: “Pueyaso pueyanonijia, supuetana Abrahamjinijinio cua supuenucua”! ¡Nia niishiri, Pueyaso jaara paniri, nojuajaari na naata nio saijiniji shipininiu Abraham niquiohuarajuhuj! <sup>9</sup> ¡Pueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano. Naajuhuj, niajaniyari juhua sesa muetuna naana, maninia miyashijia nia quishacari. ¡Niaari quera saniitioshiyacuaja!

<sup>10</sup> Naaratej, pueyari Tiuquinijiona Juan nequesotaree:

—¿Taa canaa miyarinitioj?

<sup>11</sup> Juanri nojori riucuaaree:

—Cante querajaqueya toqueracani, nojuaja cuara niq-uitioora taque cante toqueejuni. Naajuhuj, cante miaquesanoracani, nojuaja cuara niq-uitioora miaquesanoonucua.

<sup>12</sup> Roma tiacajinia quijia jiyanijiajanaa Césarra cumaneeca masejonaari Tiuquinijiona Juancua nijioquiaarijihuj. Nojoriiri tiuquinijosano quiniu paniriquiaajuhuj. Naaratej, nojoriiri Juan nequesotaree:

—Niishitiojonanaa, ¿canaarijiataj, casaa canaa miyarinjia?

<sup>13</sup> Juanri nojori riucuaaree:

—Maja puera cumaneeca nia masenu pueyajiniji. Saaja nia jiyanijia sequesano nia masejore.

<sup>14</sup> Naajuhuj, soldadohuari Tiuquinijiona Juan nequesotaree:

—¿Canaarijiataj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecootajaraca. Naajaa, majaari pueya casami nia jaariuutianu, nojori nia miananajonuta, nojoriicuara nia tonujusacarijuhua nia saPONUTA. Juhua-janiya nia quiri saaja nia jiyaniijia niqutiosano cumaneecata.

<sup>15</sup> Pueyari jiyano-hua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyaroso-cori-quiano niquniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariu-cuacaanu Pueyaso sequesano na Jiyarosocoriquianotej.

<sup>16</sup> Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jee-quejosano nia quiniuria sesa nia miishanojiniji. Tamonu cutaraari cua nuhuaji niniutianiya. ¡Nojuajaari Pueyaso Sohuanu tiuquinijionutaniya nioojiajinia, na cumaaca nia jiitianura, seetanujuanaa maninia miijia nia quiniuria! ¡Nojuajaari juhua manitia nia saniniujiuniutianiya-juhuaj, maninia jiuujiaraca nia quiniuria! ¡Nojuajaari socua jiyano-hua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. <sup>17</sup> Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuuja na jajau na racatasocoriquiano tiajiniaaco. Naajuhuaaj, cuno pueyanoori tari niya quiya na pueya na saquiriojonura na tojiyashijiaca pueya tajiniji, na rijiosocoriquiano nata nojori quiniuria. ¡Sesa pueyari juhua trigo sucua catijiasaanutaniya saniniuuja! ¡Nojoriiri jatasaanutaniya manijinia! ¡Cuno maniiri maja na maquesanu quiniutianiya!

<sup>18</sup> Tiuquinijiona Juanri naa pohuataquiaari Pueyaso rupaa pueya niqiuara. Maninia rupaari, na tojitia-jaca pueya quiniuria shuquiriaatia. Socua queraatia quiquiaariiri na pohuatasano na numootenura pueya.

<sup>19</sup> Jiyaniijia Herodesri jiyacari tarajanu Felipe niqiuocua jiitariquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyo-joquiaari sesa na miishanojiniji. Herodesri maja na tojiniu quiquiaari saaja. Jiyaniijia Herodesri socua queraatia sesa casaa miiijia quiquiaari. <sup>20</sup> Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniaari.

*Jesu tiuquinishacari moojinia*

*(Mt 3.13-17; Mr 1.9-11)*

<sup>21</sup> Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaari-jiuhuj. Jesu tohuatasacari moojiniji, na que Pueyaso secoriquiaari. Jiyacaritij, jiya cajiniocuaari riatequee.

<sup>22</sup> Pueyaso Sohuanuuri Jesuucua roseyaree juhua mococoonu niquishano. Jiyocuacuanuji, Pueyaso rupaari tojishaaree sequeyano:

—¡Quiaacuajaari cua panishano quiyanuniyojua!  
¡Jiyanohua quia shuquiritiaanjia!

*Jesu supuetanaa sesaca*

*(Mt 1.1-17)*

<sup>23</sup> Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. <sup>24</sup> Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. <sup>25</sup> Joseeri Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. <sup>26</sup> Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari.

Semeiri Josec niyanu quiquiaari. Josecri Judá niyanu quiquiaari. <sup>27</sup> Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. <sup>28</sup> Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. <sup>29</sup> Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. <sup>30</sup> Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. <sup>31</sup> Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. <sup>32</sup> Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. <sup>33</sup> Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. <sup>34</sup> Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor niyanu quiquiaari. <sup>35</sup> Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. <sup>36</sup> Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri

Lamec niyanu quiquiaari. <sup>37</sup> Lamecri Musalén niyanu quiquiaari. Musalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. <sup>38</sup> Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

## 4

*Samaruhua jiyaniijia saniniujiushacari Jesu  
(Mt 4.1-11; Mr 1.12-13)*

<sup>1</sup> Jesu quiasacariuhua Jordán moojiniji, Pueyaso So-huanuuri noojiajinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyaqui cariquia jiyajiniara. <sup>2</sup> Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. <sup>3</sup> Jiyacaritij, Sesaacaari na sequere:

—Quiaa jaara seetanjuanaa Pueyaso Niyanu quiri, nio saajia quia jataniri neecaruura na quiniuria.

<sup>4</sup> Jesuuri saaja na riucua:

—Pueyaso Rupaajiniacuajaari naa naajiotasano quia:  
“Pueyanoori maja saminio na quiniu saa miaquesano-taja. Seetanjuanaa saminio quiyari na tojishacari puetunu Pueyaso Rupaajanaa”.

<sup>5</sup> Na nuhuaji, Sesaacaari Jesu jiyataaree jiyano-hua jiyaconaja tuhananuucua. Sesaacaari ritia niqutirii Jesu puetunu mijiria jiyacajanaa. <sup>6</sup> Jesu sequereeri:

—Janiya quia niqutionutaniya puetunu nio jiyaca jiyaniijianucua cumaacajanaani, maninia jiyaniijiajanaa quia quiniuria mijiria. Janiyari puetunu nio jiyacajanaa niqutioaquiariini. Naacuajitij, janiyari cumaaca niqutioquiaani cana cua niqutionu paniyacuajani, jiyaniijia na quiniuria. <sup>7</sup> Puetunjuanaari quia quiniutianiya,

quiaa jaara cucuara mojoquetare quia shuquiritianura janiya.

<sup>8</sup> Jesuuri saaja na sequeree:

—Pueyaso Rupaajiniacujaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja no-juaja quia tojiri!”

<sup>9</sup> Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojojua tia cacojiria, jiyocuacaanu. Jesu sequereeri:

—Niiquiji quia jaataare jiyocua, quiaa jaara seetanujua-naa Pueyaso Niyanu quiri. <sup>10</sup> Pueyaso Rupaajiniacujaari naa naajiotasano quiya:

“Pueyasoori na seya sequenutaniya na cojuanura quia-janiya. <sup>11</sup> Nojoriiri quia quianutaniya, saajiaacua quia jiriataaquiniuucujaji”.

<sup>12</sup> Jesuuri na riucuaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

<sup>13</sup> Sesaacaari naa Jesu saniniujiuniu puecaquiaari puetunujuanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacaririaari.

*Jesu coteesacari na poonijosano miiniu Galilea jiyajinia*

*(Mt 4.12-17; Mr 1.14-15)*

<sup>14</sup> Na nuhuaji, Jesuuri tacatequiaariuhua Galilea jiyajinia puetunu Pueyaso Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari. <sup>15</sup> Jesuuri Pueyaso secojojua tiajinaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

*Jesu quishacari Nazaret tiacajinia*

*(Mt 13.53-58; Mr 6.1-6)*

<sup>16</sup> Jiyacaritij, Jesuuri quiaquiaari Nazaret tiacajinia, tee na canashitishaaquiaaricuajani. Samaatenu juuca, Jesuuri Pueyaso secojojua tiajinia tiuquiquiaari taa na jii-tiquiaari miiniucuajani. Nojuajaari nujuaquiaari Pueyaso Rupaa serojonura pueya niquiara. <sup>17</sup> Pueyari na niqui-tioree tariucuacaanu Pueyaso sequesano caminiujiunia Isaías naajionee jiuniocosano, pueya niquiara na serojosocoriquiano. Jesuuri na saacartaree. Serjonu coteereeri tee nio naajiotasano quiyacuajani:

<sup>18</sup> “Pueyaso Sohuanuuri cojiajinia quiyani, na cumaaca cua jitianura. Naacuajitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaariuhua Sesaaca quioosano pueya cua pohuatanura maninia rupaa Pueyasojiniji. Naacuajitij, nojoriiri cartesano quiriohua Sesaaca sapojosanojiniji. Cua jiyaroreejaariuhua cariyojuarujuri pueya namijiaa cua jeecanura, maninia niquijiara nojori quiniuhua. Cua jiyaroreejaariuhua tاراatia miiiasusano pueya cua jiyatenura shuquiriaatia quijiacara. <sup>19</sup> Cua jiyaroreejaariuhua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

<sup>20</sup> Na serjonu nuhuaji, Jesuuri naajionee jiunicorohua. Na niquitiorohua na cojuanaari. Jesuuri cajiriohua. Puetunu pueyajanaari tacuriitia na shootiaturiquiaa.

<sup>21</sup> Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niquiara.

<sup>22</sup> Puetunu pueyajanaari jiuujiateree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojoriijaarijia nequesoreetooriquiaa:

—¿Majate nio pueyano José niyanucuaja, niya pa tiacajinia maashiniotej?

<sup>23</sup> Jesuuri nojori sequeree:

—Niaa jiyoteeri cua sequenu paniya nio tariucuacaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajaani, taa nia tojiquianucuaja cua miishanojiniji Capernaum tiacajiniacuaani.

<sup>24</sup> Jesuuri socua sequeree:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja. <sup>25</sup> Supuetana Elías quishacari, queraatia mashiquiopueeri quiquiaari Israel jiyajinia. Jiyanohua miaajesacari quiquiaariiri maru niaquishacari pueyaracaanu. Jiuujianaraca marijiaari shocojoquiaari socua seis racanio, maru niaquishacari. <sup>26</sup> Naajaa, majaari Pueyaso jiyaronu quiquiaari Elías narta Israel jiyajinia quiniaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacujitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasoocua tiuujia, cuno taatu miaquesanoori maja na pueetanu quiquiaari nojoriria. <sup>27</sup> Naajuhuj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiiestasano Pueyaso cumaacata. Saaja cuno tahue Naamánri naatanishaaquiaari cutara, Siria jiyajinijinio pueyanoni.

<sup>28</sup> Pueyaso secojojua tiajinia quiniaa pueya tojishacari naa Jesu pohuatasanotej, puetunu nojorijianaari jiyanohua juaaquioree. <sup>29</sup> Nojoriiri saneecuatuquee.



Jesu caponeeturee nojori tiacajinijiiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanooocua nojori tiaca tiasano quiquiaaricujani. Nojoriiri na capotunu paniriquiaa juucua tacojiyaji naa na monura. <sup>30</sup> Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

*Samaruraca pueyanojiniji pohuatasano*  
(Mr 1.21-28)

<sup>31</sup> Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. <sup>32</sup> Nojoriiri jiuujiateree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

<sup>33</sup> Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanhua nacareeri:

<sup>34</sup> —¡Nazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacujani-jia, cante quiajaniyani! ¡Quiaacuajaari sesa miyashijia Pueyaso Nyanu!

<sup>35</sup> Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano.

<sup>36</sup> Puetunu pueyajanaari shiriiquitiurii. Tama Jesujiniji sequetooreejaarijia:

—¡Nia tojiri! ¿Taamueca rupaatucuaanojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanhua cumaacaraca! ¡Cunora samaruhua tohuataniriiri!

<sup>37</sup> Puetunu cuno jiyajiniajanaa, Jesu miishanojinijiiri caminiujiushaaquiaari pueya niquiara.

*Jesu naatanishacari Simón Pedro reyarucua*

*(Mt 8.14-15; Mr 1.29-31)*

<sup>38</sup> Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuquitiushi-iri. Simón reyarucuaari jiyacari jiyanohua naseeca matariquiaa. Pueyari Jesu sequeree na naataniniuria. <sup>39</sup> Jesuuri cusosu caco nujuasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucuaari jiyacari sanemaa, na tiajinia quiniaa pueya na mianuutenura.

*Jesu naatanijiosacari queraatia cusosuhua*

*(Mt 8.16-17; Mr 1.32-34)*

<sup>40</sup> Pananu tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhuacuajanaa. Nojoriiri queraatia tamaatia cusonu jiitiaquiaari. Jiyacari na naatanijiooree puetunujuanaari. <sup>41</sup> Naajuhuaaj, queraatia samaruhuari tohuareetaquiaari cusosuhuaajiniji. Samaruhuari naa nacaquiaari Jesuucua:

—¡Quiaacuaja Pueyaso Niyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

*Jesu pohuatasacari Pueyaso rupaa Pueyaso secojonuujua tiajiniaqueya*

*(Mr 1.35-39)*

<sup>42</sup> Tariquiicuaji, Jesuuri tiacajiniji quiaquiaari tamaquicua tamajaaja. Pueyari na pajequiaari. Nojoriiri socua nocua tiuquiiioquiaari na pajenuusacari. Majaari nojori cartenu paniniu quiquiaari Jesu quianura cuniquiji.

<sup>43</sup> Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarrijiani, Pueyasoori pueya jiyanooni paniya, nojori quiniuria na pueya, nojori tiuushacari nocua. Naaratej, janiyari na rupaa pohuatanura quianu paniya tamonu tiacajiniajani-uhuj. Janiyacuajaari cunora jiyarosaaquiaarini.

<sup>44</sup> Naacuajitij, Jesuuri puetunu Judiocuaca jiyajini-ajanaa rucanejoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

## 5

### *Sapitiaajara jaquerootanaa shiriqitiushacari*

*(Mt 4.18-22; Mr 1.16-20)*

<sup>1</sup> Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanoohua pueyari nocua catecanoquiaari catecaji na to-jitianura nojuaja. Nojoriiri Jesu tanuujuriquiaa puera.

<sup>2</sup> Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jee-quejonuuriquiaa na shiyaruhua. <sup>3</sup> Jesuuri Simón botejinia tacaquiaari. Simón sequereeri cuaara bote juaariocotaara caminia jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaariiri. <sup>4</sup> Jesu jaara niishitiojonu puecaquiaari, Simón sequereeri:

—Queronijinia pa jaaretaare. Niocua tii jartasee nia shiyaruhua sapitiaajara.

<sup>5</sup> Simónri na riucuaaree:

—Niishitiojonanaa, canaacuajaari tari jaque-rootariquiaa najuhuanani. Canaari naajaa nocua juhuaquemaani. ¡Saa shaa quiriquiaanojua! Naajaa, quiaacuaja na sequeya, socua canaa jaquerootarohuacuaraqij.

<sup>6</sup> Nojori jaara socua na shiyaruhua jartaquiaariuhua, jiyanoohua queraatia sapitiaaja ritiatureeri! Shiyaruhuari

sureequetanu coteequiaari. <sup>7</sup>Nojoriiri jatiqui nata poonijionaa piinioree bote tarajanujinia quiyano, nojori niniruria na naacutanura. Nojoriiri ritia nimiaa. Cuno caapiqui bote mishinijioturee sapitiaajataari. ¡Quera tiuquitiariquiaari queraatia sapitiaajata! <sup>8</sup>Simón Pedro niquishacari naa Jesu miishano nojoririatej, Jesuucuaara mojoquetareeri. Jesu sequereeri:

—¡Jiyaniijianaa, maja cua rupueno socua! Janiya puera sesa pueyanoni quia rupuenta cua quiniuria.

<sup>9</sup>Simónri shiriiquirii, jyanohua queraatia sapitiaaja nojori quiasacari. Nata quiniaa pueyari shiriiquitiurijihuaj. <sup>10</sup>Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuuja pueya quioojua quiniutianiya juhua sapitiaaja.

<sup>11</sup>Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

*Jesu naatanishacari lepraraca cusosu*

*(Mt 8.1-4; Mr 1.40-45)*

<sup>12</sup>Tamonu tiacajinia Jesu quishacari, lepraraca cusosu pueyanoori tii quiquiaari. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusonujiniji.

<sup>13</sup>Jesuuri na quiaree. Na sequereeri:

—Taaquiriinij. Quia naataniniu paniyanijia. Quia cuaqueya cuaara jeequehuara.

Naa na sequesacaritij, na lepraari shaajeeque na cuaqueyajiniji. <sup>14</sup>Jesuuri na rootaree maja na pahuatunura na miishano tamasa niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanenonuhua juhuajaniya. Naajuhuj, quia

seru quia niqutiose Pueyasooacara catijasocoriquiano. Naa quia miiri taa Moisés rootaquiaaricuajani, puetunu pueyajanaa niishiniuria quiaa tari jeequerohua quia cusonujiniji.

<sup>15</sup> Maninia Jesu miishanojinijiiri jiyanoehua socua tamaquicua caminiujiushaaquiaari pueya niquiara. Naaratej, jiyanoehua queraatia pueyari nocua nijioquiaari na tojiniuria, mariyata Jesu naatanijionura nojori, nojori cusonujiniji. <sup>16</sup> Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

*Jesu naatanishacari cumatacuruhuana cusosu*  
(Mt 9.1-8; Mr 2.1-12)

<sup>17</sup> Tamonu juuca, Jesuuri pueya niquiara niishitiojoriquiaa. Na tojitianaa tajinia cajitiuriquiaajaariuhua Fariseocuaca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajinijianaa, Judea jiya tiacajiniji, Jerusalén tiacajinijinio. Jesuuri jiyanoehua Pueyaso cumaaca jiitariquiaa cusosuhua na naatanijionura. <sup>18</sup> Jiyacaritij, socua pueyari tiuquijioquiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. <sup>19</sup> Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneece majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia. <sup>20</sup> Jesu niquishacari taa nojori tiuuriquiaa nocuani, cunora Jesuuri cusosu sequeree:

—Pueyanonaa, quiaacuaja tari jiyanooshaaree sesa quia miishanojiniji.

<sup>21</sup> Naa Jesu sequesacaritij, Moisés Rootasanojiniji ni-  
ishitiojona, mariyata Fariseocuacaari naa niishiriojonu-  
uriquiaa: “¿Cantejaara cuno pueyanoni? ¡Nojuajaari  
tama na cuaqueyajaaja jiyateya juhua Pueyaso na quini-  
uria! ¡Pueyanoori maja na naata tamonu pueyano  
jiyanooni sesa na miishanojiniji! ¡Saaja Pueyaso cu-  
taraari na naata pa jiyanooni!”

<sup>22</sup> Jesuuri naa nojori niishiriojosano niishiriquiaa.  
Cunora, nojori sequereeri:

—¿Casaara naa nia niishiriojiyani? ¿Niaateeri cucuaji  
taacanuyajaa? <sup>23</sup> Janiyara, maja jiyajeneta cua sequenura:  
“Quiaari tari jiyanooshaaree sesa quia miishanojiniji”.  
¿Jiyajenetatejaariuhua sequenura: “Quia sanere. Quia  
rucuanere”? <sup>24</sup> Cunora, janiyari quiarijia nia niishitiniu-  
tianiyani, janiyari mijiria jiyarosaaquiaarini pueya cua  
jiyanooniuria sesa nojori miishanojiniji.

Naacuaajitij, Jesuuri cumatacuruhua pueyano se-  
queree:

—Cua tojiri. ¡Quia sanere! ¡Quia matu quia pataarohua  
quia tiajinia!

<sup>25</sup> Jiyacaritij, pueyanoori sanequee nojori niquiara. Na  
tiajinia pataarohua na matuuri. Shuquiriaatia quiariquio-  
hua na tiajiniohuari Pueyaso na maniniuuaqueetanuta.

<sup>26</sup> Puetunu pueyajanaari shiriquitiurii. Nojoriiri Pueyaso  
maniniuuaqueetariquiaa cuno maninia casaa nojori  
niquiniucua. Nojoriiri na puerenuta naa sequetuquiaar-  
jiuhuj:

—¡Paari quiarijia jiyanohua maninia miishano niquiri-  
ini! ¡Nocuaaji jiuujiatesano!

*Jesu sequesacari Leví, na pueyano na quiniuria  
(Mt 9.9-13; Mr 2.13-17)*

<sup>27</sup> Nio nuhuaji, Jesuuri tohuataquiaari. Tamonu  
pueyano niquiriiri jiyaniijajanaa Césarra cumaneeca

masejosaqui cajiyano. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

<sup>28</sup> Jiyacaritij, Leviiri ritia sanequiaari. Puetunu na jiiitiasanojuanaa tiujiaqueeri. Jesuta quiaqueeri.

<sup>29</sup> Na nuhuaji, Leviiri jiyanohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaacuhuj. Nojoritia miaquejajinia cajitiuriquiaari, socua tamasaca pueyano. <sup>30</sup> Moisés Rootasanojiniji niishitiojona, mariyata narta Fariseocuacaari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojori-iri pa paraa sequera cumaneeca masejona.

<sup>31</sup> Jesuuri nojori riucuree:

—Cante na cuaqueya jiyaniyani nojuaja maja cusosu na quiniu, nojuajaari maja naarajona na paniniu. Cusosuhua cutaraari naarajona paniya. <sup>32</sup> Naajuhuj, majaari mijiria cua niniu quiquiaari maninia miijia pueyacua. Niquiaari cutaranijia sesa miijica cua tacatonuhua Pueyasocua, maninia miijia nojori quiniuria.

*Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura*

*(Mt 9.14-17; Mr 2.18-22)*

<sup>33</sup> Pueyari Jesu sequeree:

—Tiuquinijiona Juan pueya cutaraari sequayarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuacaari naa miiquiaajuhuj. Quia pueya saniniuuja, saaja miaquequiaari, ratuquiaari. ¿Casaarateni?

<sup>34</sup> Jesuuri nojori riucuree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia quiyajaa. <sup>35</sup> Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhuj, janiyari cua pueya tajiniji jaariutiasaanutaniyani. Jiyacariti nojori cutaraari mi-queyaquiniutianiya.

<sup>36</sup> Jesuuri socua nojori niquiara pahuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniuujia, jaara naa miiritij, na toque quiariqui sesoyari. Quiarinio toquerauri sesoshiyajuhuj, toque mocujinia na posequesacari. Cua rupaari naajuhuj, juhua quiarinio toque. <sup>37</sup> Naajuhuj, majaari na naata quiariniacu uva caaca mishinishaanu shoque tariucuacojinia, tariucuaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhua niitiasiya. Shoqueeri najuhua sesoshiyajuhuj. <sup>38</sup> Naaratej, maninia cutaraari quiariniacu uva caaca shuujionu shoque quiariquiojinia, maja vino nitiasaanuucujia, na quiquio shoquenio. Naajuhuj, nia niishitiojosanoori juhua tariucuaco shoque. <sup>39</sup> Naajuhuj, pueyano jaara vino tariucuanacu ratujua quiri, majaari na paniniu quiariniacu vino. Sequeyari: “Tariucuanacuuri maniniacujia”. Naajuhuj, majaari cua niishitiojosano nia paniniu, quiarinio na quiniuucua.

*Jesu pueya carojotasacari trigo samaatenu juuca  
(Mt 12.1-8; Mr 2.23-28)*

## 6

<sup>1</sup> Tamonu samaatenu juuca, Jesuuri trigo cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shu-quojoriquiaa na corequetanura. Na nuhuaji, na jajau



miojonuuriquiaari. <sup>2</sup> Fariseocuacaari na niqutiariquiaa. Nojoriiri Jesu pueya juaarii:

—¿Casaara nia tojitiaaquiya Moisés Rootasanoni, taa na sequequiaaricuajani maja pa poonijionura samaatenu juuca?

<sup>3</sup> Jesuuri nojori riucuaaree:

—¿Majateeri nia serojonu quiquiaacuaja casaa supuetana David miiquiaari na miaajesacarini, mariyata na cojiniaa miaajesacarijiuhuj? <sup>4</sup> Nojuajaari Pueyaso Secojjua tiajinia tiuquiquiaari. Pueyasora niojosano pan pooquiaariiri. Na sareeri. Mariyata nata quiniaa niqutiojoreeri nojori sanurajuhuj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaaniu quiquiaari naa David miiniuucua.

<sup>5</sup> Jesuuri socua cuno Fariseocuaca sequequiaari:

—Janiyacuaajaari Pueyaso Jiyarosononi. Jiyaniijara jiy-atesaaquiarinijia cua sequenura casaate samaatenu juuca miishiyani, Pueyaso pa shuquiritiniuria.

*Jesu jecasacari pueyano juaashiquia, cuseetucojuara joojequetano*

*(Mt 12.9-14; Mr 3.1-6)*

<sup>6</sup> Tamonu samaatenu juuca, Jesuuri Pueyaso Secojjua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara. <sup>7</sup> Moisés Rootasanojiniji niishitiojona, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jecare samaatenu juuca. <sup>8</sup> Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeree:

—¡Quia sanere! ¡Niya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracujani. <sup>9</sup> Jesuuri nocuara tonujunu panijiaaca pueya sequeree:

—Nia nequesotareeraj. Cua sequere, ¿taa pa niishitiojosaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cuso-suhuate naatanijiohiya, puetushiyajanaa monu soj? ¿Taa nia sequeyani?

<sup>10</sup> Jesuuri puetunu na shocuaqueya quiniaajanaa niqinijioree. Na nuhuaji cusosu sequereeri:

—¡Quia juaashiquia quia shiitiore!

Pueyanoori na juaashiquia shiitioree. ¡Na juaashiquiaari ritia jeequequee! <sup>11</sup> Cuno pueyari jiyanohua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

*Jesu saquiriojosacari doce pueya na jiyaramiquishocoriquiano*

*(Mt 10.1-4; Mr 3.13-19)*

<sup>12</sup> Jiyacaritij, Jesuuri tamonu tuhuananuucua quiaquiaari, Pueyaso na secojonura. Puetunu niucujanaa secojoriquiaa Pueyasoori. <sup>13</sup> Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijinojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. <sup>14-15</sup> Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. <sup>16</sup> Santiago

nnyanu Judasri saquiriojosaaquiaarijiuhuj, Judas Iscariotenio. Nojuajaari quiquiaari Jesu quiateriquiano mosocoriquiano.

*Jesu niishitiojosacari queraatia pueya*

*(Mt 4.23-25)*

<sup>17</sup> Na nuhuaji, Jesuuri tuhuananujiniji rosetaquiaariuhua na saquiriojosano pueyata, jamatujiniara. Cuno jamatujinia, queraatia na nuhuajiniaa pueyari tari nocuaji quiriqiaa. Mariyata jiyanoehua queraatia pueyari tii quiriqiaa puetunu Judea jiyajinijinio, Jerusalén tiacajinijiojuhuj, shoniniacu caminia shuriuquiumia quijiacajinijinio pueyano. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyano. Puetunu cuno pueyajanaari cuniquiria nijioquiaari nojori tojiniuria Jesu, na cusonujiniji nojori naatanijosaanurajuhuj. Jesuuri nojori naatanijioree. <sup>18</sup> Naajuhuj, taraatia samaruhua miishano pueyari naatanijosaaquiaarijiuhuj. <sup>19</sup> Puetunu cusosuhujanaari Jesu quianu paniriquiaa, naatanijosano nojori quiniuria. Jesu cumaacari jiyanoehua poonijioriquiaa. Naaratej, puetunu pueyajanaari naatanijosaariquiaa, saaja nojori quiasacari nojuaja.

*Jesu pohuatasano shuquiriaatia quijiajiniji, taraatia quijiajinijinio*

*(Mt 5.1-12)*

<sup>20</sup> Na nuhuaji, Jesuuri na pueya niquirii na pocuanura. Naa sequereeri:

—Niaari Pueyaso shuquiritasano, niaa jaara niishiriquia nioojia saaja sesa miijia. Niaa jaara niishiri nioojia naa quiyatej, niaari Pueyaso jiitiasano pueya quiniutianiya.

<sup>21</sup> 'Niaari Pueyaso shuquiritiasano, niaa jaara maninia miiija quiniuucua jiaatiaa, taa miaajeyano pueyano mi-quesanoocua jiaatiaacuaani. Niaa jaara naa quiniuucua jiaatiaa, Pueyasocujaari nia jataniniutianiya maninia quijiara nia quiniuria.

'Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutianiya nia shuquiriniutia, niaa jaara jiyanooshaarohua.

<sup>22</sup> 'Niaari Pueyaso shuquiritiasano, pueya jaara nia niqiniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojijiaca nia quishacari. <sup>23</sup> Niaa jaara naa miishaaretej, jiyanoohua nia timiri. Nia jaacuatare nia shuquiriniutia. Niaa jaara naa nia miishacari rejeretajaca quiri, Pueyasoori nia niishishoo casaa racatasano jiitiaa jiyocuacaanu, na niqitiosocoriquiano niajaniya. Nia paraa supuetanaari naa taraatia miiiquiaari tariucuacaanu Pueyaso sequenu panishano caminiujiuniaa pueyajuhua.

<sup>24</sup> 'Niaari saniniuujia taraatia quijiaca quiniutianiya, jamuejaca casamiriaca pueyanaa. Niaacuajaari tari shuquiriaatia quiquianu, puetunu nia panishanojuanaa nia jiitiasacari.

<sup>25</sup> 'Taraatia quijiacaari niajaniya, cante sequejani: "Janiyacujaja maninia pueyanoni. ¿Janiyatucua casaara paniri Pueyaso jiyanooniuria janiyani?" Naa sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

'Taraatia quijiacaari niajanijajuhua, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutianiya Pueyasooju nia quishacari pueyaracaanu.

<sup>26</sup> 'Taraatia quijiacaari niajaniya, puetunu pueyajanaa jaara maninia pohuataquiaa niajanijajiniji, maninia nia cojiniuucua cuno pueya, Pueyaso tojiyashijiaca pueyani.

Cuno pojori supuetanaacuajaari naa shuquiritiaquiaari cuno sapojonuujuaa, canapuete maja seetanujuanaa Pueyaso sequesano caminiujiuniaa quiquiaaricuajani.

*Pa paraa panijiaca pa quirij*

*(Mt 5.38-48; 7.12)*

<sup>27</sup> 'Niajaniya, cante niya cua tojitiaacuajani, cua tojitiuri. ¡Nia paraa nia paniri! Maninia nia miiri nia niqiniu paniyashijia pueya. <sup>28</sup> Saaja maninia nia riuquare nia juayano pueyano. Sesa nia miijiaca pueyacuara nia secojore Pueyaso. <sup>29</sup> Pueyano jaara quia maseca piri, quia jiyanoori nojuaja. Jaara taquijiria pirijihuaaj, socua quia jiyanoori. Majaari na naminiu. Pueyano jaara shiniquiaacuaji quia cushishano toque jaariutiare, quia cacojoqui quia niqitiorejuhuaj. <sup>30</sup> Pueyano jaara quia sequere quia casamijiniji quia niqitionura nojuaja, quia niqitiore nareja. Pueyano jaara quia casaa jaariutiare, majaari na sequenu: "Cua niqitiorohua". <sup>31</sup> Maninia nia miiri tamasaca, taa nia paniquiaa tamasaca miiniuria niajanियacuani.

<sup>32</sup> 'Niaa jaara saaja nia panijiaca paniri quia, majaari nia jiyaniniu Pueyasoori nia shuquiritiaa naa nia miishacari. Sesa miijiaca pueyari naa paniquiaa nojori panijiaca-juhuaaj. <sup>33</sup> Maja puera maninia miiji niajaniya, niaa jaara maninia miiquiaa saaja noo pojori, canapuete maninia miiquiaa niajanियacuani. Sesa miijiaca pueyari naa maninia miiniu niishiquiaajuhuaaj, noo pojori canapuete maninia miiquiaa nojoricuaani. <sup>34</sup> Maja puera maninia miiji niajaniya, niaa jaara nia masena niqitioquiaa na panishano, nia niishishacari nojuaja ritia niqitionutaniuhua niajanियajiniji na masano casaa. Sesa miijiaca pueyari na casaa rupaquijira niqitioquiaa narta sesa miiji pueyajuhuaaj, na niishishacari nojori ritia niqitionutaniuhua nojori masano casaa rupaquijira. <sup>35</sup> Nia paniri nia paraa. Maninia nia miiri nojori. Nia casami nia niqitiore nareja, pueya jaara na paniya rupaquijira.

Majaari nia taraajenu cuno pueyano jaara nia niquitioyaquiriohua nia casaa. Naa nia miishacaritij, niaari seetanujuanaa Jiyocuacaanu Quijia muerasu. Pueyasoori socua jiyanoehua queraatia nia niqutionutaniya tamasa nia niquitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niqutiojoquiaa sesa miijiaca pueya, mariyata canapuate na sequeyashiji-acani “paacarasho”. <sup>36</sup> Naaratej, jyanootio nia quiri, taa nia Que Pueyasocuaani, jyanoojia.

*Maja sesa nia niishiriojonu niarta pueyanooacara*

*(Mt 7.1-5)*

<sup>37</sup> Maja nia rimiaaquenu tamasaacuara, Pueyaso mariqui saniniuujia nia jyanoyaquiriiri. Naa jaara tamasaacuara tonujiyashijia quiri, naajuhuj, Pueyasoori maja na saneenu quiniutianiya sesa nia miishanojuhuaj. Naa jaara jyanootio quiri, Pueyasoori nia jyanooniutianiyajaacuhuj. <sup>38</sup> Naa jaara tamasa niqutioquiaa na panishano, Pueyasoori naa nia niqutionutaniya nia panishanojuhuaj, maninia shanacusano, jiuuquiutiasano, maninia quianujusano, mishaja quera nitiyano. Pueyasoori mariyata juhua nia shanacutajajiniya niqutionutaniya nijaniya, taamueca shanacutajajinia nia niqutioquiaa pueyacuaani.

<sup>39</sup> Jesuuri socua niishitiojoquiaari pueya, nio miriqui sequesanta:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totentaniya raama. <sup>40</sup> Pueyanoori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhuj, juhua na niishitiojonaja.

<sup>41</sup> ¿Casaara nia niquiya rucucua maano quia tarajanu namijajiniani, naa jaara puereetuca maca jiiitiaa tama nia namijajiniajaaja? <sup>42</sup> Naa jaara puereetuca maca

shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiaaja nia pare coteenu cuno maca. Na nuhuaji cutara nia naata maninia niqiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanoocuara.

*Naanaari niishishano na jajaujiniji*

*(Mt 7.17-20; 12.34-35)*

<sup>43</sup> Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeca jajau muetunu. <sup>44</sup> Puetunu naanajanaari maninia niishishano na muetusanojiniji. Majaari pa naata satuna carojonu shuuniajiniji. Naajuhuj, majaari pa naata tuhuaracona carojotanu saarianajiniji. <sup>45</sup> Naajuhuj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishiriojoquiaa poojiajiniani, paari cuno pocuaani.

*Miriqui Jesu pohuatasano cumueeca jiyajiniji, sasaca jiyajinino*

*(Mt 7.24-27)*

<sup>46</sup> ¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojitiaaquiquiaa? <sup>47-48</sup> Cua tojiri. Cante cua rupuenara quirii cua rootasano tojijia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucujaji. Na nuhuaji, moo jaara pajaashiquiaari, pajaacaari jiyanoohua cajiquiaari cuno tiaacua. Naajaa, majaari na mueecurujutanu quiquiaari, maninia nujuatejosano na morijiuucua quishacari cumueeca jiyajinia. <sup>49</sup> Saniniuujia, cante najuhuana cua niishitiojosano tojiyaquiquiaani, na miyaquishacari cua

sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanoohua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

## 7

*Jesu naatanishacari Romano capitán seru*  
(Mt 8.5-13)

<sup>1</sup> Jesu jaara pueya niishitiojonu puecaquiaari, na puey-ata quiaaree Capernaum tiacajiniaari. <sup>2</sup> Romano soldadohua capitánri quiniqui quijia quiquiaari. Jiyanoohua na panishano seruuri cusosu matariquiaa. Quera cusoriquiaari. <sup>3</sup> Capitán jaara tojjiquiaari Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuara niiria nocua na seru na naataniniuria. <sup>4</sup> Judiocuaca camarucuaari Jesuucua quiojoquiaari. Nojoriiri juhuacatecara Jesu secojonu coteequiaari jiyanoohua, nojoritia na quianura. Nojoriiri Jesu sequere:

—Cuno Romano capitánri canaa jiyaroreeni, ¡nojuajaari jiyanoohua maninia pueyano! ¡Quenaaja quia miiri na panishano! <sup>5</sup> Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumanecatajaaja!

<sup>6</sup> Naacuajitij, Jesuuri nojoritia quiaquiaari capitán tiajiniara. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujiuniuria na sequesano Jesura. Naaratej, nojoriiri naa Jesu caminiujiushii capitán sequesano:

—Jiyaniijianaa, capitán naa sequeya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. <sup>7</sup> Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua



seru naatanura. Janiyari niishiyani, quiaa jaara naa sequere, cua seruuri naatanutaniuhua. <sup>8</sup> Janiyari niishiyajaaniuhuj, cuno cusuuri quia tojiniutianiya taa cua tojiquiaa cua jiyaniijianucuacuaani. Janiyari cua jiyaramiquishano soldadohua jitiaajuhuj. Janiya jaara tamonu sequereni, ‘Quia quiaare’, nojuajaari quiaquequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyanjia quiaari jiyano cumaacaracajuhuj”.

<sup>9</sup> Jesu tojishacari cuno pojori caminiujiushano capitán sequesano, Jesuuri jiuujiateree. Jesuuri na nuhujiniaa pueya niquinioree. Nojori sequereeri:

—Seetanujuanaa nia sequeyanijia, puetunu parta Israel pueyajinijiojuanaani, jijaari quenaaja cua niquiniu quiquianu Pueyasocua tiuujia pueyano juhua nio tahue!

<sup>10</sup> Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

### *Jesu samiitianishacariuhua mashiquio niyanu*

<sup>11</sup> Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaajuhuj, socua queraatia tamasaca pueyano.

<sup>12</sup> Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucuaata macu nuhuaji sacuariquiaa, jamajiniara nojori quiojosacari. <sup>13</sup> Jesu niquishacari mashiquio, nocua taraajereeri. Na sequereeri:

—Maja nujuquenu.

<sup>14</sup> Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequereeri:

—Mashajanaa, janiya quia sequeyani: “¡Quia sanere!”

<sup>15</sup> ¡Macuuri cajiQUII! Juhuacatecara pocuareeri. Jesuuri na nucuaacua na jaatucuree. <sup>16</sup> Puetunu pueyajanaa jaara naa Jesu miishano niquiquiaari, jiyanoHua pueretureeri. Nojoriiri Pueyaso shuquiritiaree jiyanoHua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajinia! ¡JiyanoHua cumaacaraca!

Nojoriiri naa sequetureejuhuaaj:

—¡Pueyasoori shusha quiaritia na saquiriojosano Israel pueya niishiriohuacuhuaaj, na cumaquiniuria pajaniya!

<sup>17</sup> Jesujiniji pueya pohuatasanoori caminiu-jiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaanio.

*Tiuquinijiona Juan jiyaramiquishano pueya nequesoreesacari Jesu*

*(Mt 11.2-19)*

<sup>18</sup> Tiuquinijiona Juan pueyari puetunu Jesu miishano-juanaa pohuataquiaari Tiuquinijiona Juan. Na nuhuaji, Tiuquinijiona Juanri caapiqui na pueya sequequiaari:

<sup>19</sup> —Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucua-caanu sequesano niriQUIANOTEJ, tamonute sashishiyajara soj?”

<sup>20</sup> Naaratej, Tiuquinijiona Juan jiyarosano pueyari Jesuucua quiujoquiaari. Na sequetuseeri:

—Tiuquinijiona Juanri canaa jiyaroree quiocuan, canaa nequesotanura quiajaniya: “¿Quiaatena Cristo, Pueyasojiniji niriQUIANOTEJ, canaate tamonu sashiyajara soj?”

<sup>21</sup> Nojori tiuquiiijosacari Jesuucua, jiyacaritij, Jesuuri queraatia pueya naatanijioree nojori niquiara; cusosuhua, pueyaracaanu nootunejaca, samaruhuaraca pueyano. Mariyata queraatia cariyojuarujuri jiyaterohua

niquijiacaraari. <sup>22</sup> Na nuhuaji, Jesuuri naa Tiuquinijiona Juan pueya sequere:

—Nia quiaarohua. Tiuquinijiona Juan nia pohuata-suhua taa nia niquiriicujani, nia tojishanonio. Nia sequesuhanoj: “Cariyojuarujuriiri niquijiacara quiriohua. Shipiiniuquiujuniaru maninia rucoorohua. Lepra cusotajacaari cushiritishaarohua juhua juhuanaraja nojori quiniuhuara. Numueejunucuaari tojijiacara quiriohua. Macunucuaari samiitianijiosaarohua. Casamijuniucua pueyari Pueyaso rupaa pohuataasaaree, Pueyaso pueyara nojori jiyatesaanura. <sup>23</sup> Shuquiriaatia quijia cutaraari nooj, cante cucua tiuuniu tarinitiaaquiyani”.

<sup>24</sup> Tiuquinijiona Juan jiyarosano pueya jaara quiojo-quaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniuucua nia quiojocanu cariiquia jiyajiniani? ¿Niaate noojia niquijijoteja niquiniuucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua. <sup>25</sup> ¿Casaa niquiniuucua nia quiojocanunitioj? ¿Niaate maniniuqui toque cushijia niquiniuucua quiojocanu? Niaacuajaari niishiya, shanohua toqueya cushiyonuujuaari saaja jiyaniijianucua tiajinia quiyano niquishano. Nojoriiri tama na panishanojuaaja mijjiaca. <sup>26</sup> ¿Taateerinitioj? ¿Casaa niquiniuucua nia quiojocanuurini? ¿Pueyaso sequenu panishano caminiujiuniate quiquianu? Taaquiririni. Nia niquishano pueyanoori seetanujuanaa socua tojishano pueyano puetunu Pueyaso sequenu panishano caminiujiunijianaa. <sup>27</sup> Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajiniijiri naa naajiotasaaquiaritij:

“Cua sequenu panishano caminiujiuriquiano jiyaroyanijia, na puetanura quiajaniya, nuu

jeenucuariquiano quiocuaji”.

<sup>28</sup> Seetanujuanaa nia sequeyanijia, puetunu Pueyaso sequenu panishano caminiujiuniaajinijiniojuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiuushacarini, Pueyasora, nojuajaari socua cutara pueyano Tiuquinijiona Juanjiniji.

<sup>29</sup> Puetunu pueyajanaa, mariyata cumaneeca masejona Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyasojinijiiri seetanu rupaajanaa quiqianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijiosaacanu.

<sup>30</sup> 'Saniniuujia, Fariseocuaca, mariyata Moisés Rootasanojiniji niishitiojonaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijiosaanu quiqianu, nojori seetanuucua nojoriiri sesa mijiicajuhuj. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiqianu.

<sup>31</sup> Jesuuri socua sequeree:

—¿Quiarjia nio pa quishacari pueyarjijataj? <sup>32</sup> Nojoriiri juhua naatujoori, na tacuarishijionu panishacari, na cajitiushacari tiaca jiuujiajinia cajitiucua curaasanoinia. Nojoriiri narta naatujooriicua naca: “Canaari juucua naajua jonenejiyani. Majaari nia nianujunu paniniu. Canaari taraatia jaaquequejosano jaaquequejiyani. Majaari nia sapuenu paniniujiuhuj”. <sup>33</sup> Naajuhuj pueyanaa, niaari Tiuquinijiona Juan tojiyaquiquianu Pueyaso rupaa na pohuatasacari nia niquiara. Nojuaja cutaraari miaquesano miaqueyashijia quijia, vino ratuyashijiano. Naaratej, niaari na sequeja, “samaruraca”. <sup>34</sup> Na nuhuaji, janiyari niqianuni. Janiyari

saniniuujia miaquesano miaquejojuani, vino ratujua-juhuaj. Cunora niaari cua sequequiaa: “Cunoori sacuaraatia miaquejoru, ratunu porocuanio, sesa miijiaca rupueja sacuaraatia, mariyata pa soosano cumaneeca masejonaa rupuenanio”. Naa nia sequesacaritij, niaari cua tojiti-aaquiyajaacuhuaj. <sup>35</sup> Naajaa, pueya jaara canaa pohu-atasano tojiijaca quiri, jiyacari cutara nia naata niishiniu canaa niishitiojosanoori seetanjuanaa Pueyasojiniji, cua tojiijaca jatasacari maninia quijiacara.

*Jesu miaquesacari Fariseo Simón tiajinia*

<sup>36</sup> Tamonu Fariseo pueyanoori Jesu masuuquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri. <sup>37</sup> Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhuaj. Shiitianiyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. <sup>38</sup> Maajiiri Jesu cashacuucuma mojoquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muecacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. <sup>39</sup> Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanjuanaa Pueyaso sequenu panishano caminiujiunia quiri, mariqui niishiri cante na coyani, taamueca maajitijianojoni”. <sup>40</sup> Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucuaaree:

—Cua sequere, Niishitiojonanaa.

<sup>41</sup> Jesuuri na sequeree:

—Caapiqui pueyanoori cumaneeca masequiaari rupaquiara tamonu cumaneeca niqutiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijosanojiniji masesano. Tamonu pueyanoori masequiaari nareja juhua cincuenta juuca poonijosanojiniji masesano. <sup>42</sup> Na nuhuaji, nojori sequesano juuca jaara tari quiquiaari na camaru nojori niqutionuhara na cumaneeca, majaari nojori jiitianu quiquiaari cumaneeca. Naaratej, cumaneeca niqutiojonaari nojori sequeree: “Naajaa, maja socua nia niishiriojonu nia niqutionuhara tarijia cua niquticosano cumaneeca nijaniya”. Cumaneeca niqutiojonaari naa cuno caapiqui pueya jiyanooquiaari. Simónnaa, cua sequeretoj, ¿teyano cuno caapiqui pueyanojinijiniote socua cuno cumaneeca niqutiojona panijara quiniutianiyani?

<sup>43</sup> Simónri Jesu riucuaaree:

—Cunocujani, cante socua queraatia cumaneeca niq-uitiosaaquiaaricujani.

Jesuuri na sequeree:

—Taaquiririnij.

<sup>44</sup> Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niqutionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muecacataari. <sup>45</sup> Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari. <sup>46</sup> Naajuhuj, majaari quia totanu quirii muesu nunacu cua nacaacua. Nio maaji cutaraari cua niohuacaacua totaree shanohua jaanutaja. <sup>47</sup> Naaratej cua tojiri. Nio maajiiri jiyanohua sesa mijia quiriquiaa. Naaratej, jiyanohua cua paniyari

puetunu sesa na miishanojinijijianaa cua jiyanooniucua nojuaja. Saniniuujia, cante secaja sesa na miishanojiniji jiyanooshaareeni, naajuhuj, nojuajaari secaja panijia na jiyanoonia.

<sup>48</sup> Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

<sup>49</sup> Narta masuusano pueya nata cajitiuyanoori juhucatecara tama sequetooreejaaja:

—¿Cantucuaa nio pueyanoni, sesa miijia jiyanooriquianoni?

<sup>50</sup> Jesuuri maaji sequeree saaja:

—Cucua quia tiuushacari, quiaacuajaari tari jiyanooshaaree. Juhujaniya quia quiaarohua.

## 8

### *Jesura pueraquenaa maajipohujiniji pohuatasano*

<sup>1</sup> Na nuhuaji, Jesuuri rucuanajoquiaari queraatia tiacajinia, shiitianiyojua tiacajiniajuhuj. Nojuajaari tii Pueyaso rupaa pohuatariquiaa, taa Pueyaso jiitanu paniya na muerasuni. Na doce saquirojosano pueyari na cojiriquiaajaacuhuj. <sup>2</sup> Noojiaqueya maajipohuari na tarajiriquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatanijioquiaari samaruhaatej. Nojorijinijinoori quiquiaari María Magdalena. Jesuuri cuno Maríajiniji tohuatanijioquiaari siete samaruhua. <sup>3</sup> Quiriquiaajaariuhua Juana, Cuza niquiocuani. Cuzaari jiyaniijia Herodes jiitasano casami cojuana quiquiaari. Susaanaari nojorijinijinio quiquiaarijuhuj. Socua queraatia maajipohuari quiriquiaa. Puetunu cuno maajipohujanaari Jesu naacutaquiaari tama nojori jiitiasano casaatajaaja. Nojoriiri

nera pueraquenuunaa quiquiaarjihuaj, tiqiyocua nojori rucuanijosacari Jesuta.

*Jesu pohuatasano natoojona pueyanojiniji*

*(Mt 13.1-9; Mr 4.1-9)*

<sup>4</sup> Queraatia cuno jiya tiacajinjinio pueyari nijioquiaari nojori niqiniuria Jesu. Jaara nocua rerequeejoquiaari queraatia pueya, Jesuuri nojori niishitiojoquiaari miriqui, nio pohuatasanota. Nojori sequereeri:

<sup>5</sup> —Tamonu pueyanoori na cuhuariquiajinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na miojoquiaari. <sup>6</sup> Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. <sup>7</sup> Tajaacaari toteree riyocuaca tajinia. Riyocuacaari socua ritia maashiquiaari. Na natasanoori tarinitiucua quirii. <sup>8</sup> Socua tajaacaari maninia jiyajinia toteree. Tii maashiquiaari maniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niqiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—¡Niaa jaara numaaraca quiri, nia tojitiare cua pohuatasano!

*Casaarate miriqui pohuatasanoni*

*(Mt 13.10-17; Mr 4.10-12)*

<sup>9</sup> Na nuhuaji, Jesu pueyari na nequesotaree casaa na miriqui pohuatasano niishitiojonu paniani. <sup>10</sup> Jesuuri nojori riucuaaree:

—Niaari saquiriojosaaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuaaanu pueya niishishoo. Janiyari tamasaca pueya niqiuara pohuataquiaa miriqui cutarani. Naacuajitij, nojoriiri cua pohuatasano niishiyaquiquiaa na



tojitasacari. Naajuhuj, cua cumaacata cua miishano cariyoshitiuquiaari, nojori niquiara cua miishacari.

*Jesu niishitiojosacari na pueya, miriqui na pohuatasano natoonajiniji*

*(Mt 13.18-23; Mr 4.13-20)*

<sup>11</sup> 'Nia niishitiojoreera miriqui cua pohuatasano natoonajiniji. Pueyano natoosano jajauri juhua Pueyaso rupaa. <sup>12</sup> Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojajinijiiri, maja nocua na tiuuniuria, nojuaja mariqui jiyanooshaareeri. <sup>13</sup> Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasocua tiuquiaa shuquiriaatiaari. Naa miijia-caari juhua puera shiitianiyojua nujuacaraca. Naacua-jitij, nojori jaara saniniujiushaare, nojoriiri ritia Pueyasocuaaji rupatequiaa. <sup>14</sup> Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinitiuuara riyocuaca tariyoshitishano. <sup>15</sup> Maninia jiyajinia toteno jajauri saniniuujia juhua noo pueya, canapuate maninia tojitiarecuaja Pueyaso rupaani. Na racataa maninia noojajiniaari. Pueyaracaanu na tojtiaquiaari. Majaari na pishiniu Pueyasocuaaji. Naacua-jitij, nojoriiri juhua queraatia muetujua natau.

*Pueyaso muerasuuri juhua samaritiu cuhuataja*

*(Mr 4.21-25)*

<sup>16</sup> 'Majaari pueya noshitiniu quiquiaa samaritiu, na jamotasocoriquiano conatu cariquiaco, maquetu cariquiaconio. Samaritiu jaara noshitishaare,

morijiuucua morotashiyari na cuhuatanura, pueya tiuquitasacari tiajiniaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pahuatasaaria puetunu pueya niqiarajanaa.<sup>17</sup> Puetunu jamojosano casaajanaari riuriatasaanutaniya. Puetunu jiyasohuaja nia miijiosanojuanaari niishishaanutaniyajuhuj. Cuhuataasaanutaniyari maninia niquishocoriquiano.<sup>18</sup> Cunora, cua sequesano tojitiajaca nia quiri maninia. Cante maninia jitiiaa cua rupaani, nojuajaari socua na niishijara jiyatesaanutaniya. Saniniuujia, cante cua rupaa tojiyashijani, secaja najuhuana na niishishanoori jaariutiasaanutaniya, puetunu shaaquiriajanaa.

*Jesu tapueyocuaca tiuquiiijosacari Jesuucua nojori nucuata*  
(Mt 12.46-50; Mr 3.31-35)

<sup>19</sup> Jiyacaritij, Jesu nucua Jesu tapueyocuacata tiuquiiioquiaari Jesu quishaqui. Majaari nojori naata tiuquitianu quiri quiaa Jesuucua. Jiyano hua queraatia pueyari nocuara ritiariquiaa saaja tia tohuateyaji.<sup>20</sup> Tamonuuri Jesu numooteree:

—Quia nucua quia tarajanuhuata jati carijiniacuma quiya. Quia niqitiuniu paniaquinia.

<sup>21</sup> Jesuuri tii quiniaa niqiara sequeree saaja:

—Canapuate seetanjuanaa Pueyaso Rupaa tojitiajajani, nojoriiri cua nucua cutara, cua tarajanuhuanio.

*Jesu pueyajetesacari paratu, mohuacanio*  
(Mt 8.23-27; Mr 4.35-41)

<sup>22</sup> Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa.<sup>23</sup> Nojori niuuti-asacari, Jesuuri maqueriquiaa. Canashiyaquiji paratuuri juhuacatecara piyarojonu coteeree jiyano hua. Mohuaca

queyaqueteriquiaa bote jiniacumaraari. Boteeri quera tiuquitiariquiaa tari. <sup>24</sup> Jiyacaritij, na pueyari Jesu niucua-jasee ritia. Na sequetuseeri:

—¡Niishitiojonanaa! ¡Niishitiojonanaa! ¡Paa tari tiuquitiaani!

Jesuuri sanemaa. Paratu sequereeri, mohuacanio:

—¡Tariucuja! ¡Nia suraajere!

Paratu, mohuacaari ritia suraajequee. Paratu piyaronuuri tajimiaa, caminia queyocuaanonio. <sup>25</sup> Jesuuri na pueya sequerohua:

—Niaacuja juucua Pueyasoocua tiuujiaa. ¿Casa nia tojetareerini?

Nojoriiri Jesuucujaji jiuujiatecoree. Shiriiqui-tiuriquiaari Jesu miishano nojori niquishacari. Tama nojorijiaarijia nequesoreetooriquiaa:

—¿Cantucuaanojoni? ¡Paratu, mohuacaari na tojirii na sequesacari!

*Gerasa jiyajinijinio samaruhuaraca pueyanojiniji pohu-  
atasano*

*(Mt 8.28-34; Mr 5.1-20)*

<sup>26</sup> Na nuhuaji, nojoriiri shiitiaseequiaari Gerasa jiyajinia, Galilea jiya taquijiria. <sup>27</sup> Jesu jaara rosequiaari botejiniji, jiyacaritij, samaruhuaraca pueyanoori nocua niquiaari, cuno jiya tiacajinijinio pueyano. Cuno pueyanoori pueyaracaanu samaruhuaraca quiquiaari. Majaari toque na cushiniu quijia. Naajuhuj, majaari tiajinia na quiniu quijia. Saaja raacajinia quijiaari, macunucua nucuhua paaquiosaqui. <sup>28</sup> Na niquishacari Jesu, na cariquimiaji mojoquetaseeri. Jesuucua nacareeri:

—¿Casaara quia niyaree miji canaa quia cushitionurani Jesunaa? ¡Quia niishiyanjia! ¡Quiaacujaari Jiyaniijia-janaa Pueyaso Niyanu! ¡Cua tarinitiare quenaaja! ¡Maja naquiya cua miiniu!

<sup>29</sup> Samaruhuaraca pueyanoori naa sequeriquiaa Jesutej, Jesu sequesacari tari nojuaja, cuaara tohuataara cuno pueyanojiniji. Samaruuri sequeyarucua cuno pueyano miitiquiaari sesa. Narta pueyari juucua na cashacucua, na numatucua morojoquiaari cumayocua jiyocua ship-inishanota, na cojuasaanura maninia. Samaruhuaraca pueyanoori saaja na turojotaquiaari. Samaruuri na mashiquijia tiquiyocua, pueya quiyaquishaqui na quini-uria. <sup>30</sup> Jiyacaritij, Jesuuri na nequesotaree:

—¿Taateja quia sesani?

Samaruuri na riucuree:

—Cua sesa “Queraatia”.

Naa Jesu sequequiaariiri jiyano hua queraatia samaruhua na jiitiasacari. <sup>31</sup> Samaruhuari jiyano hua secojoree Jesu, maja nojori na jiyaronura puequeetuuju raama saniitiosocoriquiano. <sup>32</sup> Jiyacaritij, queraatia cushiyari miaquenuuriquiaa cateca naataja, tuhuananujinia quiniqui. Samaruhuari cunora Jesu secojoree nojori na tiuquitianiniuria cushiyajinia. Jesuuri nojori tarinitiaree. <sup>33</sup> Cunora, samaruhuari pueyanojiniji tohuareetaquee. Cushiyajinia tiuquitiaseri. Puetunu cushiyajanaari cocuateree. Tacobiniji totesee caminiajiniaari. Tii shushiniuuriiri.

<sup>34</sup> Cushiya cojuanaa jaara niquiquiaari naa miishanotej, nojoriiri netecuatuquiaari na shiriiquiniutia, Jesu miishano nojori pohuatanura tiacajinia, cuhuariquiacajiniajuhuaj, tee pueya quiriquiaacuajani. <sup>35</sup> Puetunu pueyajanaari Jesuucua nijioquiaari na tiacajiniji, pueya pohuatanuusanojiniji nojori niqiniuria. Nojori tiuquijiosacari Jesuucua, nojoriiri cuno pueyano niquishii, canajiniji samaruhua tohuareetareecuajani. Nojuajaari Jesu shuriucua cajiriquiaa toqueraca, panaatia na quishacariuhua. Naa pueya niquishacari nojuajatej, pueretuquiaariiri.

<sup>36</sup> Jiyacaritij, Jesu miishano niquitiuniaari shusha nijiono pueya pohuataree taa samaruhuaraca pueyano naatanishaarohuani. <sup>37</sup> Cunora, puetunu Gerasa jiyajinijinio pueyajanaari jiyanoehua puereturiquiaa. Naaratej, ¡Jesu secojotureeri na quianura nojori jiyajinijil! Naaratej, Jesuuri botejinia tacataquiaariuhua na pueyata na quianuhuara. <sup>38</sup> Cuno pueyano, canajiniji samaruhua tohareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

<sup>39</sup>—Quia tiajinia quia quiaarohua. Quia pueya niquiara quia pahuatasuhua taa Pueyaso miirii maninia quia-janiyani.

Pueyanoori quiaarohua. Puetunu na tiacajiniajanaa pahuatasuhuari taa Jesu miiriucuaa maninia nojuajani.

*Jesu naatanishacari Jairo niyatu, Jesu toque quiana maajinio*

*(Mt 9.18-26; Mr 5.21-43)*

<sup>40</sup> Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. <sup>41</sup> Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyajinia quiquiaari cuno tiacajinia. Jesu cariquimiaji mojoquetaseeri na secojonura na tiajinia Jesu quianura. <sup>42</sup> Neyatuniyojuaari quera cusoriquiaa jiyacari. Majaari socua niquiohuaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanoehua queraatia pueyari nata quiojoriquiaajuhuj. Pueyari jiyanoehua na tanuujuriquiaa, nata nojori quiojosacari nucuaco.

<sup>43</sup> Tamonu maaji cusosuuri cuno pueya tajinia quiriqiaajuhuj. Doce marijiaari tari na shocojoquiaari pueyaraaanu na naatesacari. Cuno maajiiri puetunu na cumaneeca puecaquiaarijianaa najuhuanaj, na

naarajosaanura juucua. Naarajonaari maja na naata na naataniniu quiquiaari. <sup>44</sup> Maaji cusosuuri Jesu nijiniji catecanoquiaari nocua. Na tucuaque toque casaca quiasee jiyasohuari. ¡Na nanacaari ritia curetaquee!

<sup>45</sup> Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniya.

Pedroori Jesu sequeree:

—Niishitiojonanaa, ¿majateeri quia niqiniucuja? Queraatia pueyacuajaari quia tanuujiya.

<sup>46</sup> Jesuuri saaja sequeree:

—Maja. Cusosu cua quiareeni. Niishiyanjia cua cumaacari tari na naatanirii.

<sup>47</sup> Maaji niishishacari na miishano jiyasohuaja tari niishishaaree, Jesuucua nimiaari. Na puerenuta teteriquiaari. Jesu cariquimiaji mojuquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareejaariuhuj taa na naataquee ritiani, Jesu na quiasacari. <sup>48</sup> Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhuajaniya quia quiaarohua.

<sup>49</sup> Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeseeri:

—¡Quia niyatu tari cusoquee! Maja najuhuana riniu paniniu Niishitiojona quia tiajinia.

<sup>50</sup> Jesu tojishacari cuno pueyano sequesano, Jairo sequeereeri:

—Maja puerenu. Cucua quia tiuuri saaja. Quia niyatu-cuaja naatanutaniuhua.

<sup>51</sup> Jesu tiuquishacari Jairo tiajina, nojuajaari maja na shanacunu quirii quenaaja tamonu pueyano tiuquini-uria macuucua. Saaja nata tiuquitiamaa cutaraari Pedro, Santiago, Juan, maaji samiriu que, na nucuanio.

<sup>52</sup> Puetunu tii quiniaa pueyajanaari maaji samiriuucua nujuqueturiquiaa. Sapiyonuuriquiaajaariuhuj. Jesuuri nojori sequeree:

—Maja najuhuana nia nujuquenu. Maaji samiriu maja macu, nareja maqueyano.

<sup>53</sup> Naa Jesu sequesaciritij, pueyari na saroojotaree saaja. Nojoricuajaari niishiriquiaa maaji samiriuuri seetanujuanaa macu quiriquiaa. <sup>54</sup> Jiyaciritij, Jesuuri macuucua tiuquiquii. Na juaashiquiajiniji na quiaseeri. Jiyanoehua na sequereeri:

—Maaji samiriuniaa, ¡quia sanere!

<sup>55</sup> Na sohuanuuri nocua tacatemohua jiyacari. Samiiti-amohuari. Ritia sanequeeri. Jesuuri na nucua sequeree na mianuutenura. <sup>56</sup> Na queyari jiyanoehua jiuujiateree. Jesuuri nojori sequeree, maja nojori pohuatanura tamasaca niquiara na miishano.

## 9

*Jesu jiyaramiquishacari na doce pueya Pueyaso rupaa nojori pohuatanura*

*(Mt 10.5-15; Mr 6.7-13)*

<sup>1</sup> Jesuuri na doce saquiriojosano pueya rerejotequiaari na jiyaramiquishocoriquiano. Nojori niqutioree cumaacari, puetunu tamaatia sesa samarhuajanaa nojori tohuatejonura, cusosuhua nojori naatanijionurajuhuj.

<sup>2</sup> Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooniü paniya nojorini, na muerasu nojori quiniuria. Nojori jiyaramiquiriijaariuhua cusosuhua nojori naatanijionura. <sup>3</sup> Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toque-taja nia quiaare cutara. Maja socua toque nia panu

nia cushishocoriquiano. <sup>4</sup> Niaa jaara tamonu tiajinia tiuquishiiquia, niocua cuniqui jiyojetaseequiaja, niaa jaara cuno tiacajiniji quiaarejaatijia. <sup>5</sup> Niaa jaara tamonu tiacajinia tojiniu paniyaquishaare, cuno tiacajiniji nia quiaare. Nia nuhuajiria, cuno pueya niquiara niocua nia nioluacajiniji cuno tiaca jaaquia nuutare. Naacua-jitij, cuno pueyari niishiniutianiya, Pueyasoori nojori jiyanoaquiniutianiya, nojori tojitianu paniyaquiniuucua Pueyaso rupaa pohuatanaa.

<sup>6</sup> Na nuhuaji, Jesu pueyari quiojoquee puetunu cuno jiyajinia shiitianiyojua tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanu-uquiaari pueya jiyanooshaanura, Pueyaso pueya nojori quiniuria. Naajuhuj, cusosuhua naatanijiotuquiaariiri.

*Jiyaniijia Herodes niishiniu panishacari cante Jesuni  
(Mt 14.1-12; Mr 6.14-29)*

<sup>7</sup> Jiyaniijia Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuajaari jiyaniijia Herodes nacatanishano Tiuquinijiona Juan samiitianohua”.

<sup>8</sup> Tamasaca pueyari Jesujiniji sequeriquiaajuhuj: “Supuetana Elíascuaja tari tiuquiriohua”. Nojuacuajaari tariucuacaanu Pueyaso sequenu panishano caminiujiunia quijia. Saniniuujia, tamasa pueyari sequeriquiaajuhuj: “Jesucuajaari tamonu tariucuacaanu Pueyaso sequenu panishano caminiujiunia samiitianohua”. <sup>9</sup> Herodesri saniniuujia sequeree:

—Janiyacujaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojiniuyani.

Cunora, Herodesri jiyanohua Jesu niqiniu paniriquiaa juucua.



*Jesu mianuutesacari cinco mil pueya  
(Mt 14.13-21; Mr 6.30-44; Jn 6.1-14)*

<sup>10</sup> Jesu jiyaramiquishano pueya tacatesacariuhua, nojoriiri Jesu pohuataquiaari puetunu nojori miishanojuaanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. <sup>11</sup> Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhuj.

<sup>12</sup> Tenacariishacari, Jesu doce pueyari nocua catecanoquiaari. Na sequetureeri:

—Pueya quia jiyaramiquiri cateca tiacajinia, nojori cuaara cuniqui pajenuura na miaquenuusocoriquiano, na maquetujuarajuhuj. Nojori panishanoori shaaqui niya pa quishaquini.

<sup>13</sup> Jesuuri nojori sequeree saaja:

—Niaa mariqui nojori mianuutere saniya.

Nojoriiri Jesu sequeturee:

—¿Canaateeri miaquesanoracajaarani? Canaa saaja cinco panniyojua jiitiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

<sup>14</sup> Cuniqui nojoritia quiriquiaa naasucuaari cinco mil pueya. Jesuuri na pueya sequeree:

—Pueya nia raquiriojotare maninia. Cuaara cajitiuuria cincuenta jatiqui, socua cincuenta tamaqui. Mianuutesocoriquiano puetunu pueyajanaa, cuaara naa cajitiuuriatej.

<sup>15</sup> Nojoriiri Jesu sequesano miirii. Puetunu pueyajanaari cajitiurii. <sup>16</sup> Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu maureeri na Que Pueyaso na secojonura miaquesanoocuaara. Na nuhuaji na neecasereeri. Na pueya na niquitioreeri puetunu pueyajanaa nojori serotasocoriquiano.

<sup>17</sup> Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishini-jiosaaquiaari pan raacuata, sapitiaaja raquiquiatanio.

*Pedro sequesacari Jesuuri seetanujuanaa Cristo*

*(Mt 16.13-19; Mr 8.27-29)*

<sup>18</sup> Tamacari, Jesuuri Pueyaso secojoriquiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

<sup>19</sup> Nojoriiri na riucuaaree:

—Noojiaqueya pueyari quia sequequiaa, quiaana nacatasano samiitianohua Tiuquinijiona Juan. Tamasacaari quia sequequiaajuhuj, quiaana Elías, tariucuacaanu Pueyaso sequenu panishano caminiujiunia. Tamasacaari saniniuujia quia sequequiaa, quiaa naasucuna tamonu tariucuacaanu Pueyaso sequenu panishano caminiujiunia samiitianohua.

<sup>20</sup> Jesuuri saniniuujia nojori nequesotaree:

—¿Niajanियariuhuj? ¿Taa nia sequeyani, cante janiyani?

Pedroori na sequeree:

—Quiajanियacuajaari Cristo, Pueyaso Jiyarosano.

<sup>21</sup> Jesuuri jiyanoehua nojori rootaree maja nojori pohu-atanura tamasaca niqiara cante nojuajani.

*Jesu numootesacari na pueya, nojuaja mosaanutaniya*

*(Mt 16.20-28; Mr 8.30-9.1)*

<sup>22</sup> Jesuuri naa nojori sequerohuacuhuj:

—Janiyari jiyanoehua naquiya miishaanutaniyani. Pa Judiocuaca camarucuaari cua niqiniu paniyaquiniutianiya, na tojitianu paniyaquishacari janiya. Naajuhuj, pa pueyacuara secojonaa jiyaniijianucuaari cua niqiniu paniyaquiniutianiya, Moisés Rootasanojiniji niishitiojon-aanio. Nojoriiri cua monutaniya. Naajaa, jiuujianaraca juucajinia, janiyani samiitianutaniuhuani.

<sup>23</sup> Na nuhuaji, Jesuuri puetunu pueyajanaa sequere:

—Cante cua nuhuajiniu paniyani, cua pueyano na quiniuria, nojuaja cuara niyajetaara tama na miiniu panishanojuaja. Cuara panitiaara tama na cuaqueyajaaja puetunu juucajanaa, cua tojjia na quiniuria seetanujuanaa. <sup>24</sup> Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanhua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutaniya, pueyaracaanu shuquiriaatia na quiniuria. <sup>25</sup> Pueyano jaara puetunu nio jiya casamijanaa jiitiana quiri, cuno maara najuhuana quiri, nojuaja jaara na shaajesacari jataaare mani quiquiojinia Pueyasooju. <sup>26</sup> Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiyani cua tiuquishacariuhua Jiyaniijia cua quiniuria. Janiyari shanhua niquishano quiniutianiya cua tiuquishacariuhua cua Que shacantuuca cumaacatani, na seya cumaacatajuhuaj. Naa-juhuaj, cante cua rupaa pohuatanu caririquiya sesa mijiaa pueya niquiarani, janiyari nojori seera caririquiniutianiyajuhuj. <sup>27</sup> Seetanujuanaa nia sequeyanijia, nojiaqueya niajanijiniinooori maja nia cusonuunu quiniutianiya juhuanajuaja, niaa cuara niquirijiaatijia Pueyaso cumaaca tiuquiyano cucua, na muerasu jiitiariquianoni.

*Jesu jatasacari shacantuucara*

*(Mt 17.1-8; Mr 9.2-8)*

<sup>28</sup> Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. <sup>29</sup> Jesu secojosacari Pueyaso, na jiquiocoori tamaatiara jataquiaari. Na toqueeri jiyanhua cohujara jataquiaar-ijuhuj, shacantuquera. <sup>30</sup> Jiyacaritij, caapiqui pueyari

nocua muetaquiaari. Jesuta pocoojoriquiaari. Nojoriiri quiriquiaa supuetana Moisés, supuetana Elíasnio. <sup>31</sup>Nojori nujuatusaquiiri shacantuuca quiriquiaa puetunu nojori shocujanaa. Nojoriiri pocoojoriquiaa taa Jesu mosaanutaniya Jerusalén tiacajiniani. <sup>32</sup>Jiyacaritij, Pedroori jiyanohua maquenuujuriquiaa, nata quiniaajuhuj. Naajaa, majaari nojori maquenu quiriquiaa. Naacuajitij, nojoriiri Jesu shacantuuca niquiquiaari. Cuno caapiqui supuetanaa niquitiurijiaariuhuj, Jesuta pocoojiyano. <sup>33</sup>Cuno caapiqui pueya quiojonu panishacariuhua Jesu shuriucuaji, Pedroori Jesu sequeree najuhuanaj:

—¡Niishitiojonanaa, canaa namitia niya quiyani!  
¡Canaa suhuororeera jiuujianaraca suhuorotucua; quiara, Moisésra, Elfasranio!

Pedroori naa najuhuana pocuariquiaa. Majaari na niishiniu quiquiaari casaa na sequeriquiaani. <sup>34</sup>Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. <sup>35</sup>Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequereeri:

—¡Niioori cua Niyanu, cua saquiriojosano nia Jiyaniijia na quiniuria! ¡Nojuaja nia tojitiare!

<sup>36</sup>Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitariquiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhujaatijaj.

*Caya samijajiniji Jesu tohuatesacari samaru  
(Mt 17.14-21; Mr 9.14-29)*

<sup>37</sup>Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. <sup>38</sup>Cuno pueya tajiniji, tamonu pueyanoori naa nacaquiaari:

—¡Niishitiojonanaa, cucua quia taraajere quenaaja!  
 ¡Cua niyanuniyojua quia niquiri! ¡Jiyaniojuanaari quiya-  
 nuniyojua! <sup>39</sup> ¡Samaruuri na miiquiaa taraatia! ¡Na  
 sariyotequiaari! ¡Na taquiriocuatequiaajaariuhua! ¡Na  
 rupaamajiiri cushaaquiaa! ¡Na cuaqueya miiquiaa mo-  
 quituriuriaari! Majaari ritia na cartenu paniniu quiquiaa.  
<sup>40</sup> Janiyari juucua quia pueya sequereeni, cuno samaru  
 nojori tohuatenura. Majaari nojori naata quiriquiaa na  
 tohuatenura.

<sup>41</sup> Jesuuri sequeree:

—Pueyaso tojitiaashijiacanaa, niaaqui Pueyasocua  
 tiuyashijiacajuhanajaj. ¿Janiyateeri pueyaracaanu re-  
 jeretanutaniya niajaniyani? Miji quia niyanu quia jaatu-  
 cure.

<sup>42</sup> Caya samijia catecanosacari Jesuucua, samaruuri na  
 pojotequee. Na taquiriocuatereri. Jesuuri samaru se-  
 queree na tohuatanura. Caya samijia naataniriiri. Na niq-  
 uitiorohua na queeri. <sup>43</sup> Puetunu pueyajanaari jiyano-  
 hua jiuujiateree nojori niquishacari Jesu miishano Pueyaso  
 cumaacata.

*Jesu pacutesacari pohuatanu nojuaja mosaanutaniya*

*(Mt 17.22-23; Mr 9.30-32)*

Pueya jiuujiatesacarijia puetunu Jesu miishanojiniji-  
 jianaa, Jesuuri na pueya sequeree:

<sup>44</sup> —Maninia nia tojiri casaa cua sequenutaniya nia-  
 janiyani. Majaari na niyajetanu. Janiyari niquitiosaanu-  
 taniyani pueya miiniuria janiya taa nojori paniyacuajani.

<sup>45</sup> Majaari na pueya niishiniu quiriquiaa Jesu seque-  
 sano. Juhua miriqui sequesanoori quiriquiaa nojoriria.  
 Naacuajitij, majaari nojori naata niishiniu quiquiaari.  
 Nojoriiri Jesu nequesotanu puereturiquiaajuhua, casaa  
 nojori na pohuatasano sequenu paniriquiaani.

*Cante jiyaniijijajanaa cutarani*

*(Mt 18.1-5; Mr 9.33-37)*

<sup>46</sup> Jesu pueyari juhuacatecara juayonuutariquiaa teyano nojorijinijiniote jiyaniijiajanaa quiniutianiyani. <sup>47</sup> Jesuuri nojori niishiriojosano niishirii. Naaratej, Jesuuri naatujua nujuateree na shuriucua. <sup>48</sup> Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuan, nojuajaari cua rupueyajuhuj. Cante cua rupueyani, cua Jiyarona rupueyajaariuhuj. Naacujitij, cante tama na cuaqueyajaaja jiyateya pueya shocoteyashijia na quiniuria juhua naatujuan, nojuajaari jiyaniijiajanaa quiniutianiya puetunu narta Pueyaso muerasujinijinojuanaa.

*Cante maja pa paracani, nojuajaari pa jiyano*

*(Mr 9.38-40)*

<sup>49</sup> Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijiyano quia cumaacata. Canaari na tenujurucuaani nojuaja quiyaquiniuucua pajaniyajini-jinio.

<sup>50</sup> Jesuuri na riucuaaree:

—¿Casaara nia tenujurucuaarinioj? ¿Niaateeri ni-ishiyaquiya, cante pa paraca quiyaquiyani, nojuajaari pa jiyano?

*Jesu nacasusacari Santiago, Juannio*

<sup>51</sup> Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. <sup>52</sup> Jerusalén tiacaacuara nuu cajiniocua Samaria jiyajinia Jesu quishacari na puey-ata, noojiaqueya na pueyajinijini puerateree tamonu tiacajinia nojori masenura tia nojoriicuaajiiri. Naacujitij, na pueyari Samaria jiyajinia quijia shiitianiyojua tiacajinia quiojoquiaari tií Jesu maquejara nojori pajenura. <sup>53</sup> Cuno Samaria pueya jaara niishiquiaari Jesuuri

Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. <sup>54</sup> Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanuji, cuno pojori na catijianura, taa tariucuaaanu Pueyaso sequenu panishano caminiujiunia Elías miiquiaaricuaani?

<sup>55</sup> Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua niniu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

<sup>56</sup> Na nuhuaji, nojoriiri tamonu shiitianiyojua tiacajinia quiojiyaree tii maquenura.

*Tamasaca pueya quiniu panishacari Jesu pueyara juucua  
(Mt 8.19-22)*

<sup>57</sup> Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu paniyanijia. Janiyacua quia tarajareni puetunu tiquiyocua quia rucanejosacarijianaa.

<sup>58</sup> Jesuuri na riuquaree:

—Quioojuapueeri na raaca jiitiaa cutara. Shuhuari na jesuhua jiitiaajuhujaj. ¿Saniniuujia Pueyaso Niyanuuri-ataj? Majaari cua jiitianu tama cua maquejarajaaja.

<sup>59</sup> Jesuuri tamonu pueyano sequereee:

—Cua nuhuajiniara quia quiri.

Nojuajaari saa sequereaja:

—Cuaara Jiyaniijianaa. Cua que cuaara cua niqiara shaajeerajaara. Janiya jaara na jamoreni, janiyacua na nuhuaji quiata rucanejore cutarani.

<sup>60</sup> Jesuuri na riuquaree:

—Naajaa, quia tarinitiare. Cua tojitiaashijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanajore cutara Pueyaso rupaa quia pohuatanura.

<sup>61</sup> Na nuhuaji, tamonu pueyanoori Jesu sequeree:

—Jiyaniijianaa, janiya cutara quiata quianu paniyani. Coteenu cua tiajinia quiquooraj, cua pueya cua niqiniuria cua nuhuajiria.

<sup>62</sup> Jesuuri miriqui na riucaaree:

—Pueyano jaara na juyaca poonitijiya, jiya jiacataja na jayotanura na cuhuariquia na jeenucuanura, maja cumaati na nijiniara na niqiniu. Na camaru jaara na nijiniara niqiri, sesa naaniutianiyari shuyorocotiuyocua. Naajuhuj, cua pueyano jaara na quiquojinia tacatenu panijiohua quiri, nojuajaari maja maninia Pueyasora poonijiona.

## 10

*Jesu jiyaramiquishacari setenta y dos na pueyajinijinio, Pueyaso rupaa nojori pohuatanura*

<sup>1</sup> Nio nuhuaji, Jesuuri socua setenta y dos pueya saquiriojoquiaari, nojori puetanura nojuaja, puetunu Israel pueya tiacajiniajanaa Pueyaso rupaa nojori pohuatanura. Jesuuri nojori nuhuaji tii quianu paniriquiaajuhuj. Puetunu nojorijianaa jiyaramiquiriiri caapiqui, caapiqui.

<sup>2</sup> Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuujia, secaja na senoon-aari quiya. Cunora, cuhuariquia camaru nia secojore, socua senoonaa na jiyaramiquiniuria puetunujuanaa na senoosanura. <sup>3</sup> Nia quiojiyare pueyanaa. Nia niishiri, janiyari nia jiyaramiquiya juhua borrego niqiohuani puereeta sareya tajinia. Pueyaso paraari juhua puereeta sareya. <sup>4</sup> Nia quiojosacari, majaari nia caashoque nia



patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhuatasacari. <sup>5</sup> Tamonu tiajinia nia tiuquishacari, coteenu nia saruhuatatare na camaru nio sequesano: “Juhuajaniya nia quiri, nio tiajinia quiniaanaa”. <sup>6</sup> Cuno tiajinia quiniaa pueya jaara jiyanoojiaca quiri, naa nia sequesacarifij, Pueyasoori nojori miiniutianiya maninia. Nojori jaara juaajiaca quiri saniniuuja, Pueyasoori nojori shuquiritiyaquiniutianiya. <sup>7</sup> Tee nia masesaareni, cuno tiajinia nia jiyojere. Nia miaquere, nia rature nojori niqitiosano niajaniya. Nia pohuatanuucua Pueyaso rupaa nojori niquiara, niajaniya cuaara niqitiosaria nia panishano. Majaari tamasa tiajinia nia pacunujunu tii nia miaquenura. <sup>8</sup> Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. <sup>9</sup> Cusosuhua nia naatanijiore cuno tiacajinia. Pueya niquiara nia sequere: “Pueyasoori quiarjia nia jiyatenu paniya na muerasu nia quiniuria”. <sup>10</sup> Nia tiuquishacari tamonu tiacajinia, pueya jaara tii nia tojiniu paniyaquiri, niocua cuno tiaca nuucujinia naa nacare pueya niquiara: <sup>11</sup> “Nia tiacajinijinio jaaquiani, canaari canaa nioluacaacujaji na majiriuutiaani. Cunoori nia niishiniuria, Pueyaso jaara nia saniitio, majaari canaacua na tiutiasaanu quiniutianiya. Pueyasocua jaari nia jiyanooni paniriquiaa juucua, na muerasu nia quiniuria”. <sup>12</sup> Seetanujuanaa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanoohua saniitiosaanutaniya Sodoma tiacajinia quiniaa pueyajiniji.

*Jesu piriyojosacari Pueyaso tojtiaashijia pueya  
(Mt 11.20-24)*

<sup>13</sup> ¡Corazín tiacajinia quiniaa pueyanaa, mariyata Bet-saida tiacajinia quiniaa pueyanaa! Cua tojiri. ¡Niaari jiyanoohua saniitiosaanutaniya! ¡Niaari socua Pueyaso

tojiyashijiaca quiya cuno tariucuacaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhuj, nojori maara juaca niojoquiaari nojori nacaacua quera nojori macaashacari, sesa miijiaca nojori quiniuucua. <sup>14</sup> Naa cutaraari cua cumaacata cua miiijosano niquijiaca. Naajaa, majaari nioojia nia tacatonu quiquianu Pueyasoocua. Naaratej, Pueyaso saniitionu juucajinia, ¡niaari socua jiyanohua saniitiosaanutaniya Tiro tiaca pueyajiniji, Sidón tiaca pueyajinijinio! <sup>15</sup> Nijaniyarijiataj, Capernaum tiacajinia quiniaa pueyanaa, ¿niaateeri jiyaniya niaari jiyocuacaanu quiniaara jiyatesaanutaniya? ¡Maja! ¡Niaari puequeetu-  
uju raama quejoosaanutaniya saniya!

<sup>16</sup> 'Cua pueyanaa, cante nia tojitiajacani, nojoriiri cua tojitiajacajuhuj. Naajuhuj, cante nia ruuretaa cua rupaa nia pohuatasacarini, nojoriiri cua ruuretaajuhuj. Cante cua ruuretaani, nojoriiri cua Jiyarona ruuretaajuhuj.

*Jesu jiyaramiquishano setenta y dos pueya tiuquiiijosacariuhua nocua*

<sup>17</sup> Jesu jiyaramiquishano setenta y dos pueyari Jesuucua tiuquiiioquiaariuhua. Nojoriiri jiyanohua shuquiriaatia quiriqiaa. Jesu sequetureeri:

—¡Jiyaniijianaa, samaruhuari canaa tojitiaacanuni canaa tohuatanijosacari nojori, canaa jiyaniquishacari quia sesa!

<sup>18</sup> Jesuuri nojori sequeree:

—Taaquiriirinij. Janiyari Sesaaca niquiquianuni juhua niaco tiyano jiyocuacaanuji. <sup>19</sup> Janiyacuajaari cua

cumaaca nia niquitioacanuni, juhuajaniya nia rucua-nenura sacocua caco, turucuaniniu caconio. Cua cumaa-cata, niaari puetunu Sesaaca cumaacajanaa shocotanu-taniya, juhuajaniya panaatia nia rucuanefonura, cua ru-paa nia pohuatanura. Majaari quenaaja tamonu casaa miiniu quiniutianiya naquiya niajaniya. <sup>20</sup>Naajaa, majaari saaja shuquiriaatia nia quiniu samaruhua tojitianuucua niajaniya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

*Jesu shuquirishacari*  
(Mt 11.25-27; 13.16-17)

<sup>21</sup> Jiyacaritij, Pueyaso Sohuanuuri Jesu shuquiriritii jiyanohua. Cunora, Jesuuri na Que Pueyaso sequere:

—¡Quia shuquiritiaanjia cua Quena! ¡Quiaacuajaari Jiyaniijajanaa quiya jiyocuacaanu, mijiriano! ¡Quiaari maninia miiri! Cua pueyari juhua naatujoori, maja puera niishijiaca. Naajaa, quiaari quiarijia nojori niishitirii quia niishishano, quia jamosano mijiria niishijiacaacuaji. Jaa, cua Quena, quiaacuajaari naa nojori panitaja.

<sup>22</sup> 'Cua Queeri tari cua niquitioquiaari puetunu na jiiatasanojuanaa, Jiyaniijiarano cua quishacari. Majaari tamonu niishiniu quenaaja cante Pueyaso Niyani, saaja cua Que cutaraari cua niishiya. Naajuhuj, majaari tamonu niishiniu cutara cante cua Queni. Saaja janiya cutaraari na niishiyani. Naajuhuj, noo pueyari na niishiya, canapue cua niishitiniu paniya cua Quecuajani.

<sup>23</sup> Na nuhuaji, Jesuuri na pueyacu tacateree. Saaja nojori sequereeri:

—Shuquiriaatia quijiaca cutaraari niajaniya, nia niquiniuucua puetunu nia niquishanojuanaa nia rupeenuucua janiya. <sup>24</sup> Seetanujuanaa nia sequeyanijia, queraatia tariucuacaanu Pueyaso sequesano caminiujiunaa pueya, mariyata jiyaca

jiyaniijianucuanio, nojoriiri nia niquishano niquiniuucua jiaatiaquiaari juucua. Majaari na niqutiuniu quiquiaari. Nojoriiri cuata nia quishacari nia tojishano tojtianuucua jiaatiaquiaari juucujuhuj. Majaari na tojtianiuniu quiquiaari.

*Samaria jiyajinijinio maninia miijajiniji pohuatasano*

<sup>25</sup> Na nuhuaji, Moisés Rootasanojiniji niishitiojona pueyanoori Jesuucua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaraanu rishijia cua quiniuriani?

<sup>26</sup> Jesuuri na riucuaaree:

—¿Taate Moisés Rootasanojinia naajiotasanoni? ¿Taa quia niishiriojoquiaani, quiaa jaara na serojoquiaa?

<sup>27</sup> Moisés Rootasanojiniji niishitiojonaari Jesu riucuaaree:

—Naa sequeyano:

“Quia Jiyaniijia Pueyaso quia paniri puetunu quioojiatajanaa, puetunu quia sohuanutajanaa, puetunu quia cumaacatajanaa, puetunu quia niishitiajatananao. Naajuhuj, quiarta pueyano quia paniri taa quia paniyacuaa tama quia cuaqueyajaajani”.

<sup>28</sup> Jesuuri na sequeree:

—Quiaacujaari maninia riucuaaree. Naa quia miishacarij, quiaari pueyaracaanu rishijia quiniutianiya.

<sup>29</sup> Moisés Rootasanojiniji niishitiojonaari tama nocuaji tacunu paniriquiaajaaja, maninia quijia na quiniuria Pueyaso niquiara. Naaratej, naa nequesotarohua Jesuuri:

—¿Canteeri cuarta pueyanoni?

<sup>30</sup> Jesuuri nio pohuatasano na pohuataree na niishitiojonura nojuaja. Naa coteereeri:

—Tamonu parta Judio pueyanoori Jericó tiacajiniara quiariquiaa juucua, Jerusalén tiacajiniji. Nohuasenuujuaca pueyari na quiaree. Puetunu na jítiasanojuanaa na

jaariuutiatureeri, na cushishano toquenio. Na piquitiuri-iri. Quera macu na tiujiatuqueeri. <sup>31</sup> Na nuhuaji, puey-acuara secojonaari cuno nucuaco quiariquiaajaacuhuj. Na niquishacari piquishano narta Judio pueyano mataano nuu shuriuquiocora, na shocortamaa saajaari. <sup>32</sup> Na nuhuaji, Levita pueyanoori cuno nucuaco quiariquiaajuhuj. Na niquishacari narta Judio piquishano pueyano, nojuajaari saaja na shocortamaajuhuj. <sup>33</sup> Na nuhuaji, Samaria jiyajinijinio tahueri cuno nucuaco quiariquiaajuhuj. Na niquishacari parta Judio pueyano mataano, Samaria jiyajinijinio tahueri nocua taraajeree. <sup>34</sup> Na cacataseeri. Nohuasenuujuaca piquiyashiquia matejoree shiyocuataari, vinotanio. Na nuhuaji, na piquiyashiquia morojoreeri. Na nuhuaji, na niataree tama na seru nijinijaarijia. Ritia na jiyataaree rucoojuuca tiuquijiojua tiajiniaari. Cuniqiu na cojuatareeri. <sup>35</sup> Tariqui, cuno tahue quianu panishacariuhua, nojuajaari caapiqui cumaneeca pueraree. Ruconaa tia camaru na niquitioreeri. Na sequereeri: “Cucua quia jiyanoori. Nio pueyano quia cojuatare quiria. Quiaa jaara socua quia cumaneeca nocua puecare, janiyacia saniniuujia quia niquitiorhuanijia cua tacatesacariuhua”.

<sup>36</sup> Nio pohuatanu nuhuaji, Jesuuri cuno pueyano nequesotaree:

—Quiarijiani, ¿taa quia sequeyani? Cuno jiuujianaraca ruconaa pueyajinijinioni, ¿teyano cuno pojorijinijiniote narta pueyanoocua taraajeja cutarani?

<sup>37</sup> Moisés Rootasanojiniji niishitiojona pueyanoori Jesu riuuaree:

—Cuno Samaria jiyajinijinio tahuecuajani, nocua taraajequiaarini.

Jesuuri na sequeree:

—Taaquiriirinj. Quia quiaarohua. Naa pueyacia taraajeja quia quirijiuhuaj, taa cuno tahue taraajequiaaricuaani.

*Jesu quishacari Marta, María tiajinia*

<sup>38</sup> Socua na rucuanesacari, Jesuuri tamonu tiacajinia tiuquiquiaari na pueyata. Cuno tiacajinia na quishacari, tamonu maajiiri na masuuquiaari. Naaratej, na tiajinia na tiuquinitiareeri. Cuno maaji sesa quiquiaari Marta.

<sup>39</sup> Martaari tarajanu jiitiaja. Na sesaari quiquiaari María. Maríari Jesu niohuaca shuriuquiumia cajiriquiaa, na tojiniuria Jesu pohuatasano. <sup>40</sup> Marta cutaraari poonijioriquiaa queraatia na miishocoriquiano na jiitiasacari. Cunora, Martaari Jesuucua catecanoree. Na sequereeri:

—Jiyaniijianaa, ¿majate cucua quia taraajenu? Cua tarajanuuri cua tarinitiaquee niquiriyatujua, puetunu nio poonijiosanotajanaa. ¡Quia sequere na naacutanura janiya!

<sup>41</sup> Jesuuri saaja na sequeree:

—Martanaa, quioojia quia cajitiri sanaunaa. Quiaari puera quia miishano tacaatia. <sup>42</sup> Saaja niquiriyatu casaa cutaraari jyanohua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

## 11

*Jesu niishitiojosacari na pueya nojori secojonura Pueyaso  
(Mt 6.9-15; 7.7-11)*

<sup>1</sup> Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinioori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijiona Juan niishitiojoquiaari na pueyacuaani.

<sup>2</sup> Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuara niishiiria quiaari tojetaarucujanaa sesa

miyashijia. Pueya cuaara seetanjuanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiyacuaani. <sup>3</sup> Canaa quia niqutioriquia canaa miaquesocoriquiano canaa panishano puetunu juucajanaa. <sup>4</sup> Canaa quia jiyanoori sesa canaa miishanojiniji, taa canaa jiyanooquiaacuaa sesa canaa miiniaani. Naajuhuj, canaa quia cojuare, maja sesa canaa miitishaanura”.

<sup>5</sup> Jesuuri naa sequerejuhuaj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura nojuajiniji, ¿nojuajatucua taa quia sequereni?, quiaa jaara na sequere: “Cua rupuenanaa, cua niqutiore jiuujianaraca pan. <sup>6</sup> Tamonu cua cjiniaari shusha tiuquiriohua tucuacaanuji, miaajeyari. Shaaquiiri cua sumatuu cua miaquetesocoriquiano nojuaja”. <sup>7</sup> ¿Quiaatucua taa miirini quia rupuenta jaara na tiajiniaacumaji quia riuucare?: “Maja cua taajetenu. Cua tia tiotiu tioree tarinijia. Tari cua mueya mataa maquetujinianijia. Maja cua naata sanenu cua niqutionura quia panishano”. <sup>8</sup> Jaara naa sequeretej, niaa jaara na tia tiotiu piquiniu tarinitiaaquiri, janiyari seetanjuanaa nia sequyani, nojuajaari sanenutaniya na niqutionura niajaniya puetunu nia panishanojuanaa. Majaari na sanenu quiniutianiya saaja nia rupuenta na quiniuucua. Sanenutaniyari pueyaracaanu taajeta nia piquishacari na tia tiotiu. <sup>9</sup> Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatate. Tiotiu nia piquiriquia. Niaara riataaanutaniyari. <sup>10</sup> Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riataaanutaniyari.

<sup>11</sup> ¿Niaatucua nia niyanu niqutiore saajia, neecaruu na masesacari nijaniya? Maja. ¿Niaatucua soconu niqutiore nia niyanu, sapitiaaja na masesacari nijaniya? Maja. <sup>12</sup> ¿Niaatucua turucuaniiinu niqutiore nia niyanu, caacaraja riuriuquiu na masesacari nijaniya? Maja. <sup>13</sup> Puetunu nijaniyajanaari sesa miiniu niishijiaca. Naajaa, niaari maninia casaa niqutionu niishiya nia niqiohuhua. ¿Taatucuaa socua jiyocuaaanu Quijia nia Que Pueyasoni, tojetaarucujanaa sesa miyashijiani? Seetanujuanaa capora na quishacari, nojuacuajaari na Sohuanu niqutionu niishijia na muerasu, canapuate na masequiaacuajani.

*Pueya sequesacari Jesu, samaru cumaacaracana  
(Mt 12.22-30; Mr 3.20-27)*

<sup>14</sup> Tamacari, Jesuuri samaru tohuataniriquiaa tamonu pueyanojiniji. Cuno pueyanoori tiquia quiquiaari samaru na jiitasacari. Samaru jaara tohuataquiaari cuno pueyanojiniji, pocujara quiriohuari. Pueya niquishacari naatej, nocuaji jiuujiatereeri. <sup>15</sup> Tamasaca pueyari saa sequequiaarijia:

—Cuno pueyanoori samaruhua tohuatanijiya samaruhua jiyaniijia Satanás cumaacata.

<sup>16</sup> Tamasaca pueyari Jesu saniniujiuniu paniriquiaa. Naaratej, nojoriiri na sequeturee na cumaacata na miiniuria casaa, na niqitiniuria nojori, nojori niishiniuria nojuajaari seetanujuanaa Pueyasojinijinio. <sup>17</sup> Jesuuri nojori niishiriojosano niishiriquiaa. Nocuaji nojori sequereeri:

—Tamonu jiyajinia, cuno pueya jaara miaquetoobjiya tama nojori pueyatajaaja, nojoriiri maja na naata na paraa nujuatanu, na paraa jaara nocua tiuquitiare raquiritano nojori quishacari. Naajuhuj, niquiriyatu tiajinia quiniaa jaara tama nojorijiaaja juayonuujutaquiaa, nojoriiri maja na naata jatiqiu quiniu. <sup>18</sup> Naajuhuj, niaari cua sequeriquiaa, janiyana samaruhua tohuatanijiya



Satanás cumaacatani. Jaara naa quiriritij, ¿Satanástucua taa pueyaracaanu quiri jiyaniijiani, nojuaja jaara tama na samaruhuaaja tohuatanijiya tama na cumaacatajaaja? <sup>19</sup> Naajuhuaaj, janiya jaara samaruhua tohuatanijiya Satanás cumaacatani, taa nia sequeyacuajani, ¿nia niishitiojosano pueyariuhuaaj, cana cumaacata nojori tohuatanijioquiaa samaruhuaani? ¿Taa nia sequeyani? ¿Satanás cumaacataree? Majaruhua. Naacujitij, tama niajaniya-jaaja nia niishiri, niaari jiyajeneya. <sup>20</sup> Naa Pueyaso cumaacata cua tohuatanijosacari samaruhuatej, naacujiti nia niishiri, Pueyasoori tari nia masuya seetanujuanaa na muerasu nia quiniuria.

<sup>21</sup> 'Niojinia nia niishiriojorejuhuaaj: cumueeca pueyano jaara na tia cojuaa queraatia na miaquejotaja casaata, majaari tamonu naata na jiitiasano casami jaariuutianu.

<sup>22</sup> Saniniuujia, socua cumueeca pueyano jaara nocua tiuquiri, na miaquejotaja casaa jaariuutiaari, cuno, nocua na tiuushano juucuanu. Na nuhuaji, na jaariuutiasano casami paari, na pueya na serotasocoriquiano. Naajuhuaaj, janiyari Satanás jiitiasano jaariuutiajani.

<sup>23</sup> 'Cante cua jiyano quiyaquiyani, nojuajaari cua paraca. Cante cua naacutaaquiyi pueya rerecojonura Pueyasorani, nojoriiri saaja pueya cocuataa Pueyasocujaji. Naaratej, jacaria nia niishiriojore casaa nia niishiriojiya janiyajinijini.

*Samaruhuari riujiuujia na quiquiojiniohua*

*(Mt 12.43-45)*

<sup>24</sup> 'Samaru jaara tohuatare pueyanojiniji, joojuashiquio rucuaneyiyari na samaatejara na pajenura. Jaara na riuriataaquiri, niishiriojiyari: "Cua quiquiojinia riujiuyarohuaraqui teje cua tohuatacanucujani". <sup>25</sup> Samaru tiuquishacariuhua cuno pueyanoocua, na riuriatasuhuari shaaco, juhua maninia netoonujusano tia, maninia jeenucuanuojuhuaaj. <sup>26</sup> Naaratej, cuno samaruuri socua sesa

miijiaca nojuajiniji siete narta samaruhua riquiohua nata na quiniuria. Puetunu nojorijianaari cuno pueyanojinia tiuquitasuhua. Naacuajitij, cuno pueyanoori socua sesara jiyacateja, tarijia na quiniujiniji.

*Seetanjuanaa shuquiriaatia quiniu cutara*

<sup>27</sup> Jesu pohuatasacari nio, tamonu maajiiri jiyacari pueya tajiniji naa nacaree:

—¡Shuquiriaatia quijia cutaraari cuno maaji cante quia raquiaarini, cante quia canashitiquiaarini!

<sup>28</sup> Jesuuri saaja na riuquaree:

—Socua shuquiriaatia quijia saniya sajara cante Pueyaso rupaa tojjiani, cante Pueyaso panishano miiquiaajaaniuhuj.

*Sesa pueyari saaja Pueyaso cumaacata miishano niqiniu panjiaca*

*(Mt 12.38-42; Mr 8.12)*

<sup>29</sup> Socua queraatia pueyari Jesuucua rerejoriquiaa puetunu na shocuaqueyajanaa. Jesuuri juhuacatecara naa pohuataree nojori niquiara:

—Nio pa quishacari pueyari sesa miijiaca. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosanoni. Seetanjuanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás miishaaquiaaricuaani. <sup>30</sup> Jonás miishaanuuri nocuaji jiuujiatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyaajaaniuhuj, nio pa quishacari pueya niishiniuria janiyari Pueyaso Jiyarosanoni. <sup>31</sup> Cua supuetana Salomón jaara Israel pueya jiyaniijia

quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanhua tucuacaanuji niquiaari narta jiyaniijia Salomón tojiniuucua, jiyanhua niishijia Salomón quishacari. Jiya puequesacari Pueyaso saniniujiushacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijajanaa cutara Salomónjiniji. Cuno Niishijiaari niya nia tajinia quiyacuaja. Janiyacuajaari nojuajani. <sup>32</sup> Naajuhuj, cuno tariucuacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyajuhuj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiunia Jonás jaara Pueyaso rupaa pohuataquiaari nojori niquiara. Pueyaso sequenu panishano caminiujiunia quiarjia nia tajinia quiyani, nojuajaari socua cutara Jonásjiniji. Janiyacuajaari nojuajani.

*Pueya jiuujia cuhuatanajiniji pohuatasano*

*(Mt 5.15; 6.22-23)*

<sup>33</sup> 'Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuacaanu na morotanu, tiaco tiuquitianaa cuhuatariquiano. <sup>34</sup> Pa namijiaari juhua pa cuaqueya cuhuatanajuhuj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casaa niquiniuucua jiaatiaja quiri, paari ninishiqui quiya puetunujuanaani. <sup>35</sup> Tama nia cuaqueyajaaja nia cojuare, niaa mariqui nioojia cuhuatana maquishajareeri. <sup>36</sup> Niaa jaara puetunujuanaa juhua cuhuashiqui quiya,

sesa casaacua jiaatiaashijia nia quishacari, niocua maninia niqijiara quiri puetunujuanaa, juhua samaritiu cuhuatasacari nijaniya. Naacujitij, niocua niishijia quiri, maninia miijia nia quiniuria.

*Jesu nacasusacari Fariseocuaca, Moisés Rootasanojiniji ni-  
ishitiojonaanio*

*(Mt 23.1-36; Mr 12.38-40; Lc 20.45-47)*

<sup>37</sup> Jesu puecasacari pocuanu, tamonu Fariseo pueyanoori na masuuquiaari na tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishiijianaari. <sup>38</sup> Fariseo pueyanoori jiuujiatequiaari na niquishacari Jesuuri shuquitioo tari cajiriquiaa miaquenura. Judiocuacaari jiyanjia, nojori rucoojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. <sup>39</sup> Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niaari juhua noo pueya, canaputee saaja na ratujua cuaqueya jeequejoquiaacua-jani, saaja na miacojua cuaqueyano. Majaari na jini-acuma na jeequenu. Niaari naajuhuj. Niaari sa-puenu maninia pueya niquishano. Saniniuujia nioojia-caari jiyanohua sesa quiya, casami nia masejonuucua nia nohuasejonuta, puetunu sesa nia miiniutijanaajuhuj. <sup>40</sup> Mosanucuaanaa, ¿niaateeri niishiyaquiya, pa cuaqueya Shipininiiaari poojia shipiniquiaarijiuhuj? Naaratej, nioojia nia jeequere cutara, maja saaja nia cuaqueya. <sup>41</sup> Niaa jaara puetunu nioojiajinia nia jiiitasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

<sup>42</sup> ¿Niaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucujinijiniojuanaa,

Pueyasora nia niqutiosocoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuajani. Naajaa, Moisésri niishitiojoquiaarjiihua maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu na sequesanojuanaa tojjijaca nia quiri. Majaari saaja jaamasucua niqutiojojuaca nia quiniu.

<sup>43</sup> ¡Niaari taraatia miishaariquiano, Fariseocuacanaa! Niaari jiyaniijanucua shuriucua cajiniuucua jiaatiaquiaa, Pueyaso secojojua tiajinia nia quishacari, juhua cutara pueya nia quiniuria pueya niqiara. Naajuhuj, niaari pueya paniquiaa nojori saruhuatanura nijaniya juhua jiyaniijanucua, nia rucuanajosacari tiacajinia.

<sup>44</sup> ¡Niaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucoquiaa na niishiyaquishacari. Naajuhuj, pueyari juhuajaniya nia rupuequiaa, nojori niishiyaquishacari nioojaari jiyanohua sesa, juhua pueyano mocua jama-jinia.

<sup>45</sup> Jiyacaritij, tamonu Moisés Rootasanojiniji niishitiojonaari Jesu sequeree:

—¡Niishitiojonanaa, naa quia sequesacari Fariseocuatej, quiaari canaa sequeyajuhuj!

<sup>46</sup> Jesuuri na riucuaaree:

—Taaquiririnij. ¡Niaari taraatia miishaariquiano-juhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanohua niiquia casaa nitiasocoriquiano. Majaari nia tojjitajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeretanu nia niishitiojosano.

<sup>47</sup> 'ĴNiaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiuniaa nucuahuacuaji, teyano nia supuetanaa puecooquiaaricuajani.

<sup>48</sup> Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nuchua.

<sup>49</sup> 'Naacuajitij, Pueyasoori na niishiniutia sequequiaari: "Janiyari cua sequenu panishano caminiujiuniaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhuj'".

<sup>50</sup> Cunora, Pueyasoori nio pa quishacari pueya naminiutianiya puetunu na sequenu panishano caminiujiuniaa nanacaacuajanaa, canapuate nio jiya coteejajiniji puecoosaaquiaaricuajani. <sup>51</sup> Coteenujanaa mosaaquiaariiri Abel. Na nuhuaji, queraatia Pueyaso sequesano caminiujiuniaari puecoosaaquiaari. Na nuhuaji, Zacaríasri socua jaatesaaquiaari monujuhuj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasooacara catijiasaqui shuriucua. Seetanjuanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

<sup>52</sup> 'ĴNiaari taraatia miishaariquiano, Moisés Rootasanojiniji niishitiojonaanaa! Niaari najuhua Pueyaso Rupaa jiiitiaa. Majaari nia tojiniu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

<sup>53</sup> Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jiyanhua juaaquioree. Jiyanhua nojori juaaquiiosacari, nojoriiri

Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. <sup>54</sup> Nojoriiri nocuara tonujunu paniriquiaa juucua, jaara sesa quiri na sequesano.

## 12

*Jesu niishitiojosano, maja sapuenu maninia pueyano niquishano pa quiniuria*

<sup>1</sup> Jiyacaritij, jiyanohua jiyanohua queraatia pueyari Jesuucua rerejoree. Tama nojorijiaaríjia rapijiotooriquiaa puera nojori rerequeejasacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuaji. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijiaca pueya niquishano tamasaca niquiara. Saniniuujía, nojori jiuujiaari saa sesaja pueyaracaanu. <sup>2</sup> Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuj. <sup>3</sup> Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuj, nia sasacojosano tama nia sohuacamaraajani, cunoori jiyocuacaanu tia nijiniji nacatasaanutaniya puetunu pueya tojishocoriquianojuanaa.

*Cante puereshiya cutarani*  
(Mt 10.26-31)

<sup>4</sup> Cua rupeuanaana, majaari nia puerenu canapute nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. <sup>5</sup> Seetanujuanaa nia sequereeraj, cante puereshiya cutarani. Noo nia puerere cutara, cante

cumaacaraca cutara na jatanura niajaniya mani quiquio-jiniani, na cusojuanu nuhuaji niajaniya. Saaja nojuaja nia puerere cutara.

<sup>6</sup> 'Cinco shuhuari saaja caapiqui cumaneecaniyojuata masesano. Pueyara, cunoori najuhuanaj. Naajaa, majaanari Pueyaso niyajetanu cuno shuhua jaara puecoosaare. Nojuajaari na niishiya cutara. <sup>7</sup> Naajuhuj, nia mue-suuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanohua Pueyaso panishano cutara queraatia na cojuasano shuhujiniji.

*Tamasaca niquiara pa sequere paari Jesucristo pueyani  
(Mt 10.32-33; 12.32; 10.19-20)*

<sup>8</sup> 'Cua tojitiare. Cante tamasaca niquiara sequejani: "Janiya Jesucristo pueyanoni", naajuhuj, janiyari cua Que Pueyaso seya niquiara sequenutaniyani: "Nojuaja cua pueyano". <sup>9</sup> Cante saniniuujia tamasaca pueya niquiara seetaa janiyajinijini, cua pueyano na quishacarini, janiyari cua Que Pueyaso seya niquiara na tamacanutaniyajujuaj.

<sup>10</sup> 'Cante cua sesacareeni, nojuaja na naata jiyanooshaanu. Saniniuujia, maja cutaraari na naata jiyanooshaanu cante Pueyaso Sohuanu sesacareeni.

<sup>11</sup> 'Cua muerasu nia quiniuucua, niaari Pueyaso sec-  
ojuua tiajiniaqueya jiyatasaanutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari niajaniya, majaanari nia niishiriojonu taa nia riucuanutaniyanoj, casaa nia sequenutaniyajaani-  
uhuj. <sup>12</sup> Nia riucuanu panishacari, Pueyaso Sohuanuuri jiyacari nia niishitiojonutaniya taa nojori nia riucuanu-  
taniyani.

*Puereetaari casamiriaca pa quishacari*

<sup>13</sup> Tamonu pueyanoori pueya tajiniji naa Jesu seque-  
quiaari:



—Niishitiojonanaa, cua tarajanu quia sequere na niq-  
 uitionura janiya canaa shipininio jiitiasanojiniji, taa  
 canaa shipininio sequequiaari canaacuajani, saminio na  
 quishacarijia.

<sup>14</sup> Jesuuri saaja na riucuaaree:

—Pueyanonaa, ¿janiyateeri pueya nequesoreenara jiy-  
 atesaaquiaarini, cua serotanura niajaniya nia shipininio  
 casamini?

<sup>15</sup> Jesuuri naa nojori sequequiaarijihuaj:

—Jiyanohua nia cojuare tama nia cuaqueyajaaja, maja  
 casamiicua jiaatiajaca nia quiniuria. Pa naata shuquiri-  
 aatia quiniu casamiiju. Queraatia casamiiri maja na  
 naata seetanujuanaa shuquiriaatia quijiacara na jiyatenu  
 pajaniya.

<sup>16</sup> Na nuhuaji, Jesuuri pueya niishitioree nio miriqui  
 pohuatasanota. Naa sequereeri:

—Tamonu pueyanoori quiquiaari, jiyanohua  
 casamiriaca. Na cuhuariquiajinia na natoosanoori  
 jiyanohua muetuquiaari. Naacuajitij, queraatia  
 miaquesocoriquiano jiitiaquiaariiri na cuhuariquiajiniji  
 na carojotasano. <sup>17</sup> Tama sequereejarijia: “¿Taa cua  
 miiniutianiyani? Cua tiajosano cua racatajara cua  
 carojotasanoori puetunujuanaa tari mishaja quiya. ¿Tee  
 cua racatanutaniya shusha cua carojotasanoorinitioj?

<sup>18</sup> ¡Jaj, niishiquiinijia! Coteenu cua tiajosano cua  
 casamiicuaaji niyaroorohuaraquij. Janiyari socua  
 puereetucocuara tijaonutaniyani. Janiyari cuniqui  
 mishinijionutaniya puetunu cua carojotasano cua  
 cuhuariquiajinijiojuanaani, puetunu cua jiitiasano  
 casamijianaanio. <sup>19</sup> Na nuhuaji, janiyari tama cua  
 cuaqueyajaaja sequenutaniyani: ‘Pueyanonaa, quiarijia  
 cutara juhuajaniya quia quiri. Quiaari queraatia  
 casamiriacacuaja, queraatia marijiara. Quiaari queraatia  
 quia miaquesocoriquiano jiitiaacuaja. Quiarijia cutara

quia samaatere. Quia miaquere. Quia rature. Tama quia cuaqueyajaaja quia shuquiritiri' ". <sup>20</sup> Cuno niucuaja, Pueyasoori na sequequiaari: "Mosecanaa, quiaari quiarijia macu juhuaquenutaniya. ¿Canteeri puetunu quia jamuesano casamijanaa jiitianutaniya quia nuhuajini? ¿Canra na quiniutianiyarini?" <sup>21</sup> Naa miishaanutaniyari puetunu pueyajanaa, cante saaja tama nerajaaja reratequiaa casamini. Cuno, jamuejaca casamiriaca pueyani, nojoriiri seetanujuanaa casamijiuniucua Pueyasora.

*Pueyasoori na muerasu cojuaja maninia*  
(Mt 6.25-34)

<sup>22</sup> Na nuhuaji, Jesuuri na saquiriojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenutaniyani, casaa nia cushiniutianiyani. <sup>23</sup> Pueyaso jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaariuhuj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. <sup>24</sup> Riquiacujua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na miojosocoriquiano. Naajuhuj, majaari nojori jiitianu na miojosano na racataja. Majaari tiaca nojori jiitianu na carojotasano nojori racatajarajuhuj. Naajaa, Pueyasoori nojori miojotequiaa. Niaa cutaraari socua jiyanohua Pueyaso panishano cuno riquiacuhujiniji. <sup>25</sup> Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanohua nia tacaaniutia? Maja nia naata. <sup>26</sup> Naaratej, nia tacaaniu jaara najuhuana quiya socua shiitianiyojua nia rishiniuria, ¿niaatucua casaara tacaari tamonu casaacuani?

<sup>27</sup> 'Natau shuucuaca nia niquishurij, taa nojori coreque-taani. Majaari nojori poonijionu. Majaari na cusupuenu-unujuhuj. Supuetana jiyaniijia Salomónri jiyanhua shanhua toqueyaraca quiquiaari. Cuno jiyanhua shanhua niquishano na cushishano toqueni, naajaa, ma-jaari na shocotanu cuno natau shuucuaca. <sup>28</sup> Pueyasoori cuno natau shuucuaca shipiniquiaari rupaquijia naa shanhua niquishocoriquianotej. Jaara sorere, tariqui catijashiya saniniuujia pan majeetetajara. Pueyaso jaara naa maniniushitiyacuaa shuucucatej, ¿majateeri na naata cushitiniu nijaniyajuhuj, jatarinitiaja Pueya-soocua tiuujiacanaa? <sup>29</sup> Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. <sup>30</sup> Pueyaso niishiyashijia pueyari pueyaracaanu na panishano casaacua tacaquiaa. Nijaniya cutaraari Queraca. Nojuacuajaari tari niishiya puetunu nia panishanojuanaa. <sup>31</sup> Naaratej, nia niishiriojore Pueyaso panishano nia miiniuria. Nojuajaari saniniuujia nia niquitionutaniya puetunu nia panishanojuanaa.

*Nia casami nia racatare Pueyaso shuriucua*

*(Mt 6.19-21)*

<sup>32</sup> 'Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, ¿nia niquitionutaniya puetunu na jii-tiasanojuanaari! <sup>33</sup> Nia casami nia niquitiojore cumaneecara. Na nuhuaji, cuno cumaneeca nia niquitiojore nareja casami-ijuniucua pueya. Naa nia miishacaritij, niaari jiyocua-caanu racataa nia jii-tiasano. Tee Pueyaso racataa nareja nera nia niquitiosanocujani, cuniqui, nia cumaneeca quiquioori maja na piquiniu. Niaari tii nia racatasano jii-tianutaniya pueyaracaanu. Majaari nohuasejojua na naata nocua tiuquiniu na nohuasenura. Naajuhuj, surequeyari maja na naata miaquenu nia casami tii. <sup>34</sup> Nia casami jaara naa racatasano quiya jiyocuaaanu

Pueyaso shuriucuatej, niaari saaja Pueyasooocua niishiri-  
ojonutaniya, tee nia casami racatasano quiyacuaani.

*Jeenucuasano nia quiri nia Jiyaniijiaacuaji*

<sup>35</sup> 'Juhuata jeenucuasano nia quiri pueyaracaanu, nia sashishacari nia Jiyaniijia, taa tiajiniaaco maninia sey-  
acuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshi-  
tishanojuhuaj. <sup>36</sup> Naa jeenucuasano nia quirijiuhuaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohu-  
ateya piquishuhua, nojoriiri ritia nocuaji riatanutaniya tia tohuateya. <sup>37</sup> Shuquiriaatia quijiaca cutaraari cuno seya, canapue te na jiyaniijiaacuaji suteyajaani, na jiyani-  
ijia cuaara tiuquiriohuajaatijia. Seetanujuanaa nia se-  
queyanijia, nojori jiyaniijiaari nojori cajitijionutaniya mi-  
aquejajinia. Na toque maniniuqui jocuanutaniyari na mi-  
anuutenura nojori. <sup>38</sup> Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaa-  
tia quijiaca quiniutianiyari cuno seya, nojori jaara suteya-  
jaa tia tohuateya riatariquiano nojori jiyaniijiaacuaji. <sup>39</sup> Nio nia niishirijiuhuaj, tia camaru jaara niishiri taacari  
nohuasejojua niniutianiyani, nojuaja maara sutere na tia cojuanura, maja nohuasejojua tiuquiniuria na casami  
na nohuasenura. <sup>40</sup> Naajuhuj, jeenucuasano nia quiri pueyanaa, juhua cuno sutejaca seyaja. Naa jaara jiyaniya  
juhuanojuaja maja cua tiuquiniu quiniutianiuhua, jani-  
yari jiyacari nia jiyajenetenutaniyani.

*Jesu pohuatasano maninia serujiniji, sesa serujinjinio  
(Mt 24.45-51)*

<sup>41</sup> Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja,  
puetunu pueyarajanaa soj?

<sup>42</sup> Jiyaniijiaari na riucuaree:

—Tamonu seru jaara maninia seru quiri, nocua tiu-  
ushano, niishijajuhuj, na jiyaniijiaari cuno na seru jiy-  
atenutaniya narta seya jiitiariquiano na niti na niyacari.  
Nojori jiyaniijia niyacari, cuno seeratasano seruuri narta  
seya mianuutenutaniya maninia, taa nojori jiyaniijiajanaa  
mianuutequiaa nojoricuaani. <sup>43</sup> Cuno seruuri shuquiriaa-  
tia quiniutianiya na jiyaniijia jaara na riuriatasuhua naa  
maninia miyanojua, taa na sequesaaquiaari na miiniuri-  
acuajani. <sup>44</sup> Seetanujuanaa nia sequeyanijia, na jiyaniiji-  
aari cuno maninia seru jiyatenutaniya puetunu na jiiti-  
asano casamijianaa cojuana na quiniuria. <sup>45</sup> Saniniuujia,  
cuno seru jaara sesa miiniuria niishiriojore, na jiy-  
anishacari na jiyaniijiaari jiyanojua tarishiniutianiya, no-  
juajaari niishiriojonutaniya nojuaja na naata miiniu na  
panishano. Cunora, nojuajaari narta seya majoonu co-  
teenutaniya, seya maajipohuanio. Naajuhuj nojuajaari  
saaja miaquejonutaniya. Pueyaracaanu rarujunutaniyari.  
Mashaasequejonutaniyajaariuhuj. <sup>46</sup> Na jiyanishacari  
na jiyaniijia juhuanonjuaja maja na tiuquiniu quiniutiani-  
uhua, jiyacaritij, cuno juucaja, na jiyaniijiaari tiuquiniu-  
tianiuhua canashiyaquiji. Naa cuno seru miiniuucua  
sesatej, na jiyaniijiaari jiyanojua na saniitionutaniya. Na  
jatanutaniyari Pueyaso tojiyashijiaca pueyata na sani-  
itiosocoriquiano.

<sup>47</sup> Tamonu jiyaniijia jaara na seru rootare maninia,  
taa nojuaja miiniutianiyani, cuno seru jaara jeenu-  
cuaquiri na jiyaniijiaacuaji, mariyata jaara miyaquiri taa  
na jiyaniijia sequequiaari na nuhuajiriacuajani, noju-  
ajaari jiyanojua majacusaanutaniya cutara. <sup>48</sup> Saniniuujia,  
tamonu seru jaara sesa miiri na niishiyaquiniuucua na  
jiyaniijia panishano na miiniuria, nojuajaari saaja secaja  
majacusaanutaniya. Naajuhuj, cante queraatia niq-  
uitiosaareeni, cuno serujiniijiiri queraatia masenu pan-  
ishaanutaniya. Naajuhuj, cante jiyatesaaree queraatia ji-  
itiana na quiniuriani, na jiyaniijiaari nocua tiuuniutianiya

socua jiyanoehua maninia miijia na quiniuria.

*Jesuucua tiuujiaacari narta pueya panishoo*  
(Mt 10.34-36)

<sup>49</sup> Mijiria niquiaarinijia, juhua mani cua noshitiniuria pueya tajinia. ¡Seetanujuanaa na noshitiriquia tarinij! Cua rupaari juhua mani quiniutianiya. <sup>50</sup> Coteenu, janiyari jiyanoehua saniniuujushaanutaniya juhua manitiani. Nocuaji coojaari tacaya janiya jaara naa miishaarejaatijia. Seetanujuanaa na jiyateriquia tariucua tucuateenonij. <sup>51</sup> ¿Niaateeri jiyaniya janiyari niquiaarini mijiria quiniaa quiniuria juhuajaniya? ¡Maja! Seetanujuanaa nia sequeyanijia, janiyari niquiaarini pueya cua raquiriojotanura. <sup>52</sup> Naaratej, pueyari quiarijia juayonuutanu coteenutaniya. Pueyano jaara necocuata jiitiare jiuujianaraca niquioehua na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashjiacaari saniniuujia nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraafia pueyari naa tama tacaresetanutaniyajaacujua. Naacua-jitij, tamonu tiajinia, querajaa pueyari caapiquiriyatu cucua tiuujiaa juaajiaa quiniutianiya. <sup>53</sup> Pueyari necohua paracaajia quiniutianiya, necohua tiuushacari cucua. Naajuhuj, necohuari na que paracaajia quiniutianiya na que tiuushacari cucua. Naajuhuj, maajipohuari necojori paracaajia quiniutianiya necojori tiuushacari cucua. Naajuhuj, necojoriiri na nucua paracaajia quiniutianiya na nucua tiuushacari cucua. Naajuhuj, maajipohuari necohua niquiocohua paracaajia quiniutianiya, necohua niquiocohua quiniucua cucua tiuujiaa. Naajuhuj, pueya niquiocohuari na quinia paracaajia quiniutianiya-juhuj, cucua tiuujiaa na quinia quiniucua.

*Pueya cuaara niishiiria quiarijia Pueyaso miishanojiniji, casaa na niishitiniu paniyani*

*(Mt 16.1-4; Mr 8.11-13)*

<sup>54</sup> Jesuuri naa sequequiaari pueyajuhujaj:

—Niaa jaara niqutioocua niqiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari.

<sup>55</sup> Naajuhujaj, paratu jaara piyarojoquiaa pananu shuucuaji, niaari sequequiaa: “Tacareejonuqui quiniutianiya”. Naa quiquiaari. <sup>56</sup> Pueyanaa, ¿niaateeri seetanujuanaa niishijiaca? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniuujia, nia niquishacari quiarijia Pueyaso miishano nia niqiara, majaari cuno nia niishiniu, casaa na sequenu paniyani. Naaratej, majaari seetanujuanaa niishijiaca niajaniya.

*Niaacuara tonujunata nia jecatoore*

*(Mt 5.25-26)*

<sup>57</sup> Niaacuajaari niishiya, sesa miijiacaari saniitiosaanutaniya. Naaratej, tama niajanijajaaja nia niishiriojore, casaate maninia nia miiniuriani. <sup>58</sup> Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanoocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jecatoyaquiri nata, nojuajaari quiocuara saquiriojotanutaniya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniuujia quia niqutionutaniya na pueya, quia nujuatesaanura nujuatejojuajinia. <sup>59</sup> Seetanujuanaa nia sequeyanijia, majaari nia tohuatanu quiniutianiya nujuatejojuajinjiji, niaa jaara puetunu nequesoreena sequesano cumaneceajanaa niq-uitiorejaatijia niaacuara tonujuna pueyano.

## 13

*Nioojia nia tacatore sesa nia quiniujiniji*

<sup>1</sup> Jiyacari, tamasaca pueyari Jesuucua tiuquiiioquiaari. Cuno pueyari naa Jesu pohuataquiaari:

—¿Jiyaniijia Pilatoori Galilea jiyajinijinio pueya puecoorucuaa! ¡Na nuhuaji, nojori nanaca cojitiriiri Pueyasooacara nojori puecoosano seya nanacata!

<sup>2</sup> Jesuuri nojori sequeree:

—¿Niaateeri jiyaniya cuno Galilea pueyari naa mi-ishaarucuaa socua jiyanohua sesa miijiaca nojori quini-uucua narta Galilea pueyajiniji? <sup>3</sup> Seetanujuanaa nia sequeya cutaranijia, nojoriiri maja socua sesa miijiaca quiquianu niyajaniyajiniji. Niyajaniyajuhuj, niaa jaara tama nioojiajaaja tacatoyaquiri sesa nia miiniujiniji, ni-aari taraatia puecoosaariquianojuhuaj. <sup>4</sup> ¿Cuno diecio-cho pueyariuhuj, canapuate cusuucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiquianu narta Jerusalén tiacajinia quiniaa pueyajiniji? <sup>5</sup> Seetanujuanaa nia sequeyanijia, nojoriiri maja socua sesa miijiaca quiquianu niyajaniyajiniji. Janiyari quiarijia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

*Miriqui Jesu niishitiojosano muetuhuo naanajiniji*

<sup>6</sup> Jesuuri na nuhuaji pueya niishitiojoquiaari nio miriqui pohuatasanota:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaari na niquiniuria. Na jajau mianu paniriquiaa juucuaari. Shaanoori quiriquiaa. <sup>7</sup> Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuana niquiaani na jajau pajenura. Pueyaracaanu muetuyaquiyari. Tari na shocojorucuaari



jiuujianaraca marijia. ¡Quia nure! Tamonu cuaara na nujuasaqui natasaaria, na muetunura cutara”. <sup>8</sup> Cuhuariquia cojuanaari na riucuaaree: “Jiyaniijianaa, quia tarinitiarejaara tamonu marijiara. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutianiyani. <sup>9</sup> Janiya jaara naa na miirini, muetunutaniya naasucua. Jaara muetuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

*Jesu jeeacasacari porocuatucua samaatenu juuca*

<sup>10</sup> Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. <sup>11</sup> Tamonu maaji cusosuuri tii quiriquiaajuhuj. Dieciocho marijiaari na shoconujuquiaari porocuatenu na quishacari. Samaruuri naa na jiyatequiaari. Majaari quenaaja na naata maninia nujuanu quijia. <sup>12</sup> Jesu jaara na niquiquiaari, na sequereeri:

—¡Maajiniaa miji! ¡Quia nijiniacuaja tari jeequerohua!

<sup>13</sup> Jesuuri na juaashiquia niaree maajiicua. Jiyacartij, maajiiri maninia jeequequee. Nojuajaari Pueyaso maniniuhuaqueetenu coteeree naa na miishaanuucatej. <sup>14</sup> Pueyaso secojojua tiajinia jiyaniijiaari juaarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—¡Seis juucacuajaari quiya puetunu semaanajiniajanaa pa poonijionura! ¡Niocua cuno juuca nijioriquia nia naatanijiosaanura, maja samaatenu juuca!

<sup>15</sup> Jiyaniijia Jesuuri sequeree:

—¡Sapueno juhua maninia miijiaca niquishano pueyanaa, puetunu nijaniyajanaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! <sup>16</sup> ¿Nio maajiiriuhuj? Nojuaja cutaraari supuetana Abraham niquiohuacuajinio supueno. ¿Majateeri maniniajuhua

samaatenu juuca pa samaacatanura Satanás morojosano? Dieciocho mariijaari tari nio maaji shoconujurucuaa pueyaracaanu porocuatu na quishacari.

<sup>17</sup> Naa Jesu sequesacaritij, puetunu na paraajanaari caririquituri. Saniniuujia, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

*Miriqui Jesu pohuatasano mostaza jajaujiniji*

*(Mt 13.31-32; Mr 4.30-32)*

<sup>18</sup> Jesuuri sequequiaari:

—¿Taate cua naata niishitiojonu niajaniani, nia niishiniuria taa Pueyaso poonijiya pueya jiuujiajinia na rupaatani? <sup>19</sup> Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetucara caneyari. Naacuajitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiajinia puetunu nio jiyajiniajanaa maninia mijjiaca nojori quiniuria.

*Miriqui Jesu pohuatasano pan poreetajajiniji*

*(Mt 13.33)*

<sup>20</sup> Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? <sup>21</sup> Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhuj.

*Juhua shiitianiyojua tohuateyari quiya Pueyasocua pa quianura*

*(Mt 7.13-14, 21-23)*

<sup>22</sup> Jesuuri Jerusalén tiacajiniara quiariquiaa na pueyata. Nucuaco na quiasacari, pueya niishitiojoriquiaa tiacajini-aari, shiitianiyojua tiacajinianio. <sup>23</sup> Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuree miriqui:

<sup>24</sup> —Jiyanohua nia saniniujiuri shiitianiyojua tohuatey-aco nia tiuquiniuria, Pueyaso nia rupuenura. Juhuacarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniu-tianiya saaja. <sup>25</sup> Cua tojitiare. Tia camaru jaara sanere, tohuateya tionutaniyari. Nijaniya, cante na tia car-ijiniacuma quiyajaani, niaari tohuateya piquiniuuniu-tianiya najuhanaj. Niaa jaara naa nacare: “¿Jiyani-ijianaa, canaacuaji quia riatate tohuateya!”, nojuajaari nia riucuanutaniya: “Maja cua niishiniu tejenote nia-janiyani”. <sup>26</sup> Jiyacaritij, niaari juhuacatecara sequenu-taniya: “¿Majateeri canaa quia niishiniu? Canaacua-jaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucucacajinia niishitiojua”. <sup>27</sup> Tia camaruuri nia riucuanutaniya: “Janiyacujaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu nijaniyajanaa sesa miijiacanaa”. <sup>28</sup> Naa na taanu-usacari nijaniyatej, niaari nujuquetunutaniya. Niaari nia quica miaquenutaniya jiyanohua nia taraajenuta, nia niquishacari Abraham, Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyanocuaa. <sup>29</sup> Queraatia tamasaca pueyapueeri ni-jionutaniya puetunu jiyacajinijiniojuanaa Pueyaso shuri-ucua cajitiuniuria, nojori miaquenuunura nata. Nijionu-taniyari pananu muetasamaji, pananu tiuquishacojinio, pananu shuucujaji jiyacajinijinio, pananu muetasamaji

miaquetajara jiyacajinijiniojuhuaj. <sup>30</sup> Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojiti-ajaca nojori quiniuucua mijiria. Naajuhuj, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuana quijiaca quiniutianiya Pueyasora, nojori tojiti-aquiniuucua nojuaja.

*Jesu taraajesacari Jerusalén tiacajinia quiniaa pueyacua  
(Mt 23.37-39)*

<sup>31</sup> Jiyacari noojiaqueya Fariseocuacaari Jesuucua tiuquijioquiaari. Nojoriiri Jesu numooteree:

—¡Niiquiji quia mashiri! ¡Jiyaniijia Herodes quia monu paniya!

<sup>32</sup> Jesuuri nojori sequeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaaniuhuj. Janiyari naa miya quiarijiani, tariquijiuhuj. Janiyari tama tariqui tucuanutaniya puetunu cua miiniu panishanojuanaani”. Naa nia sequesuhua cuno pueyano. <sup>33</sup> Cuaara rupaquijia cua sashiiria. Janiya quiarijia rucuanenutaniyajaarani, tariqui, tama tariquinio. Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutaniya.

<sup>34</sup> ‘Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani,

taa caacaraja necohua rijioquiaacuaa na nesu cariquiaconi. Niaari saaja paniyaquiquiaa cua cojuanura niajaniya. <sup>35</sup> ¡Cunora, cua tojitiare! Nia quiquioori tojetaarucujanaa shaaqui quiniutianiya. Naajuhuj, majaari socua nia niqiniu quiniutianiya janiya, niaa jaara nia timitiasacari janiya sequerejaatijia: “¡Cuaara shuquiriaatia quiiria pa Jiyaniijia, Pueyasojiniji tiuquiuhuanol!”

## 14

### *Jesu naatanishacari cusosu poreeno pueyano*

<sup>1</sup> Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenura, socua tamasaca Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. <sup>2</sup> Jiyacaritij, tamonu pueyanoori Jesu tacoji nujuariquiaa, poreeno cusotaano. <sup>3</sup> Jesuuri Moisés Rootasanojiniji niishitiojonaa nequesotaree, Fariseocuacanio:

—¿Taa nia serojoquiaa Moisés Rootasanojiniani? ¿Maninate cusosu pa naataniniu samaatenu juuca?

<sup>4</sup> Nojoriiri saaja sanaa na tojitiariquiaa. Jesuuri cusosu quiaree jiyacari. Na naataniriiri. Na jiyarorohua na tiajiniaari. <sup>5</sup> Na nuhuaji, Jesuuri cuno Fariseocuaca sequere:

—Nia burro, nia juunu jaara raama tiyare samaatenu juuca, ¿niaatucua samaatenu juuca shocoterejaara, raamaji nia jaaniuhuara nia seru?

<sup>6</sup> Majaari nojori riucuanu quirii quenaaja.

### *Taa pa miyani queranacunura masuusano pa quishacari, taamueca pueyate masuushiyajaaniuhuj*

<sup>7</sup> Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuataree nio pohuatasano. Naa sequereeri:

<sup>8</sup> —Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajjiaranojinia, tamonu pueyano mariqui tiuquiriiri socua tojishano pueyano quiajanijajiniji. <sup>9</sup> Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajaniya: “Shiiquia. Quia sanere nio pueyanoocuaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. <sup>10</sup> Nocuaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajaniya, nojuajaari quia sequenutaniya: “Cua rupuenanaa, jniya quia cajishii socua panishano cajitiujiniani!” Naacuajitij, cuniqui quiata quiniaari niishiniutianiya, quiajanियाqui nia masuuna panishano pueyano. <sup>11</sup> Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararosaanutaniya. Saniniuuja, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

<sup>12</sup> Jesuuri na masuuna pueyano sequereejuhuj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhuj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuuja. Naacuajitij, quiaari tari namishaarohuacuaja. Cunora, majaari socua quia masenu quiniutianiya Pueyasojiniji. <sup>13</sup> Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujanucua pueya, cariyojuarujurinio. <sup>14</sup> Naacuajitij, quiaa

jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajaniya saniniuujia. Naaratej, Pueyaso cutaraari maninia miiniu-tianiya quiajaniya saniniuujia, na samiitianijosacariuhua maninia miijiaca pueya.

*Miriqui Jesu pohuatasano na queranacunujiniji*  
(Mt 22.1-10)

<sup>15</sup> Jesuta cajiyano pueyano tojishacari naa Jesu pohu-  
atanotej, Jesu sequereeri:

—¡Shuquiriaatia quijia cutaraari cuno, cante Pueyaso  
shuriucua miaquenutaniya jiyocuacaanuni!

<sup>16</sup> Jesuuri na sequeree:

—Tamonu pueyanoori queraatia sumatuquiaari puey-  
ata na queranacunura. Nojuajaari coteenu queraatia  
pueya masuquiaari. <sup>17</sup> Quera miaquenuusacari, na seru  
jiyaroreeri na masuusano pueya na sequenura: “Miji,  
puetunujuanaa tari jeenucuasaaree niaacuaji. Nia mi-  
aquesee”.

<sup>18</sup> Puetunu masuusano pueyajanaari juhuacatecara se-  
quequiaari maja na naata quianu miaquenuucua. Coteenu  
masuusano pueyanoori cuno seru sequeree: “Janiyari  
shusha maseree tamonu cuhuariquiani. Janiyari nocua  
quiaa na niquiniuucuanu. Cua jiyanoori quenaaja. Maja  
cua naata quianu quiata queranacunuucua”. <sup>19</sup> Tamonu  
masuusano pueyanoori sequeree: “Janiyari diez pooni-  
jiojuaca juyaca masereeni. Na saniniuucua quiaanijia.  
Quiocua cua jiyanoori cua quiaaquishacari queranacunu-  
jinia”. <sup>20</sup> Tamonu masuusano pueyanoori sequereejuhuj:  
“Shusha camiriinijia. Cunora, maja cua naata quianu”.

<sup>21</sup> Seruuri tamajaaja tacateyarohua na camarnu tijinio-  
hua. Na jiyaniijia pohuatasuhua na masuusano pueya  
sequesanoori. Na jiyaniijiaari juaaquii. Na seru se-  
quereeri: “Ritia quia quiaare tamasaca pueya masuunu-  
cua tiaca nucuaacaco. Miji quia rijiocoo casamiijuniucua

pueya, sesaruneca pueya, sesacujua pueya, cariyojuaru-juri pueyano”. <sup>22</sup> Seru tiuquishacariuhua, na jiyaniijia sequesuhuari: “Jiyaniijianaa, janiyari tari miiriini taa quia sequeree janiyacujani. Juhuanajuaja maja tia mishiniu”. <sup>23</sup> Na jiyaniijaari na sequeree: “Socua pueya quia pajecoo tiaca nucuaacaco, tamasaca tiacajiniara nucuaacaconio. ¡Socua pueya quia nenecojocoo nojori niniuria, cua tia mishiniuria! <sup>24</sup> Seetanujuanaa nia sequeyanijia, coteenu cua masuusano pueyajiniijini, majaari quenaaja niquiriyatu nojorijiniijinio saniniu quiniutianiya cua sumatusano”.

*Saaja tama na cuaqueya panitijajaarjia na naata Cristo nuhuajiniu*

*(Mt 10.37-38)*

<sup>25</sup> Jiyano hua queraatia pueyari Jesuta quiojori quiaa. Jesuuri nojoriicua tacateree. Nojori sequereeri:

<sup>26</sup> —Cante cucua niya cua pueyano na quiniuriani, nojuaja cuaara niishiiria nio. ¡Maja nia naata cua pueyano nia quiniu nia paniyaquishacari janiya socua nia quejiniji, nia nucujiniijinio! Nia niquiocua, nia niquiohua, nia tapueyocua, nia rimiatuhuajuhuj, nia panishacari nojori socua janiyajiniiji, ¡majaari nia naata cua pueyara nia quiniu! Naajuhuj, ¡majaari quenaaja nia naata tama nia cuaqueyajaaja panijia nia quiniu socua janiyajiniiji!

<sup>27</sup> Cante tama na cuaqueyajaaja panitiaaquijia cucuarani, majaari na naata cua pueyanora na quiniu. <sup>28</sup> Naa jaara jiyaconaja tia tianu paniri, ¿majate coteenu nia cajiniu nia niishiriojonura taa cumaneecate panishaanutaniyani, na tucuatunura puetunujuanaa? Naajuhuj, niaari niishiriojiya, queraatia quiyacujate nia cumaneeca. <sup>29</sup> Naa jaara coteenu naa miyaquiri, niaari najuhuaana morijiuca nujuatejonutaniya, na nuhuaji majaari socua nia cumaneeca quiniu nia tucuatunura nia tia. Puetunu nia tia niquiniaajanaari juhuacatecara nia macaatiutianiya.



<sup>30</sup> Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatenu quiariija”. <sup>31</sup> Naajuhuj, jiya jiyaniijia jaara quianu paniri narta jiyaniijata miaquetonura, ¿majate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? <sup>32</sup> Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Sanini-uujia, tucuaaanu narta jiyaniijia quishacariija, nocua jiyaramiquiniutianiya na pueyari, nata nojori pocoojonura maninia, nojori jiyanoootionura. <sup>33</sup> Naajuhuj, niaa jaara carteyaquiri puetunu nia jiiitasanojuanaa, majaari nia naata cua pueyanora nia quiniu.

*Miriqui Jesu pahuatasano shonijiniji*  
(Mt 5.13; Mr 9.50)

<sup>34</sup> 'Shoni jaara tiquiriiquia quiya, maniniaari, pa panishano. Jaara shaacara quiquii, ¿taate na naata tiquiriiquiara na quiniuhuanu? Maja na naata. <sup>35</sup> Najuhuaana quiyari. Majaari quenaaja maninia na quiniu cuhuariquijainia jatasocoriquiano maninia na moritianiniuria nataacuaca. Majaari quenaaja maniniajuhuaj, na paatishaanura na moquijianura, natau pajama niojosocoriquiano. Jaara naa maninia quiyaquiritij, nareja jatashiyari. Cante numaaracani, cuaara tojitiaara miriqui cua pahuatasano. Cuaara na niishiirijuhuj. Seetanujuanaa cua tojitiajaca pueyani, nojoriiri juhua shoni mijiria.

## 15

*Jesu pahuatasano miriqui tashucvano borregojiniji*  
(Mt 18.10-14)

<sup>1</sup> Roma tiacajinia quijia jiyaniijara cumaneeca masejonaa, mariyata sesa miijiaa pueyari Jesuucua nijori quiaa na pohuatasano nojori tojtianura. <sup>2</sup> Cuno pojoriiri Fariseocuaca soosano pueya quiriquiaa, Moisés Rootasanojiniji niishitiojonaa soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiquiaaja Jesuucua. Naa pocuaturiquiaa Jesuuri:

—Cuno pueyanoori sesa miijiaa pueya shanacuquiaa nocua nojori nijionura. ¡Juhuajaniya nojoritia miaquequiaajaariuhuj!

<sup>3</sup> Naaratej, Jesuuri nojori niqiuara pohuataree nio miriqui pohuatasano:

<sup>4</sup> —Niaa jaara cien borregohua jiitariquia, nojorijinijinio niquiriyatuniojua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri rupaquijia cuhuariquajinia, tashucuaano borrego nia pajenura, niaa cuaara na riuriatarohuajaatijia? Taaquiririnij. Niaacuajaari naa miiquiaaquiri.

<sup>5</sup> Niaa jaara na riuriatasee, niaari nia shuquiriniutia na paquiohua nia numueecuaji. <sup>6</sup> Niaa jaara na tiuquitiarohua nia tijiniohua, niaari nia rupueña, mariyata nia shuriucua quiniaa rerejotenutaniya nia sequenura nojori: “¡Cuata nia shuquiriri quiarijia! ¡Tari riuriatarohua cua borregoniojua tashucuanonijia!” <sup>7</sup> Seetanujuanaa nia sequeyanijia, naajaariuhuj, jiyocuacaanu quiniaari jiyanohua shuquiritiquiaa niquiriyatu sesa miijia jaara noojia tacatore sesa na miiniujiniji. Cuno pueyanoori socua jiyanohua shuquiritiasano tamasaca noventa y nueve pueyajiniji, canapuetucuaaja tari maninia pueyacuani.

*Jesu pohuatasano miriqui juurequetesano cumaneejiniji*

<sup>8</sup> Naajuhuaaj, tamonu maaji jaara diez cumaneecaraca quiri, jaara niquiriyatu juurequetere tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatarejaatijia. <sup>9</sup> Na riuriatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “¡Miji nia nimia! ¡Cuata nia shuquiriri! ¡Tari riuriatarohua cua juurequetesano cumaneenijia!” <sup>10</sup> Seetanjuanaa nia sequeyanijia, jiyocuacaanu Pueyaso seyari naa shuquiriquiaajuhuaaj sesa miijia jaara noojia tacatore sesa na miiniuujiniji.

*Jesu pohuatasano taa tamonu pueyano jiyanooquiaari neyanuni*

<sup>11</sup> Na nuhuaji, Jesuuri nio pohuatareejuhuaaj:

—Tamonu pueyanoori caapiqui niyanuraca quiquiaari.

<sup>12</sup> Socua naatujuaari na que sequeree: “Cua quenea, quiarjia cua niquitioire quia jiitiasanojiniji, quiria quiriqiano quiaa jaara shaajeyare”. Naacuaajitij, na queeri puetunu na jiitiasanojuanaa niquitiojoree necohua. <sup>13</sup> Socua naatujuaari rupaquijia camueenujuquiaari na que tiajinia. Na nuhuaji, puetunu na que niquitiosanojuanaa nojuajani, nojuajaari saniniuujia tamásaca na niquitiojoree na cumaneecara. Na nuhuaji, na cumaneecata quiaquiaari tucuacaanuuri, tamonu jiyajinia. Cuniqiu, puetunu na cumaneecajanaa puecaquiaariiri sesa na miiniutia. <sup>14</sup> Nojuaja jaara puetunu na cumaneeca puecaquiaarijianaa, cuno jiyajiniaari jiyanohua miaajesacari quiquiaari. Mashajaari juhuacatecara miaaquequiaari. <sup>15</sup> Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. <sup>16</sup> Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niquitionu quijia

quenaaja na miaquesocoriquiano. <sup>17</sup> Na nuhuaji, tama sequereearijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhuj. ¿Janiyarijiataj? ¡Janiyari niya quera cusoya cua miaajenutani! <sup>18</sup> ¡Cua queecua tacateyarohuaraj! Janiyacua na sequesuhuani: ‘Cua quenaaja, janiyari Pueyaso miiquianu sesani. Janiyari sesa miiquianu quiajanijuhuj. <sup>19</sup> Majaari socua cua sequenu quia niyanuta. Janiyari puera sesa mijiani. Cua jiyatere juhuari juhua quia seru cua quiniuria, quia cua poonijionura’ ”. <sup>20</sup> Naa na niishiriojonu nuhuajitij, mashajaari quiaquaiariuhua na queecua.

’Tucuacaanu na quishacarijia na que tiajiniji, na queeri na niquirii. Nocua taraajereeri. Nocua neteyareeri na naacunura. Na cacaseeri. Na nujuunsequereeariuhuj. <sup>21</sup> Neyanuuri na que sequere: “Cua quenaaja, janiyari sesa miiquianu Pueyasoni, quiajanianio. Majaari cua sequenu quia niyanuta”. <sup>22</sup> Na queeri saaja na tiaco seya sequere: “¡Ritia! ¡Socua maniniuqui toque miji nia riquioo! ¡Niocua quiyanu cushitirinioj! ¡Jaaniisho nia cushitiri! ¡Sapatu nia cushitirijuhuj! <sup>23</sup> Pa riuutianishano juunu niquiojua nia quiafoo mosocoriquiano. Quiarijia pa queranacure. Pocua miaquenuureni, quiyanu pa shuquiritiasacari. <sup>24</sup> Nio quiyanuniyojuaari juhua macu quiriquiaa. Quiarijia samiitiarohuari. Nojuajaari shaajequiaari. ¡Tari pocua muetarohuari!” Naacuajitij, nojoriiri juhuacatecara queranacuquiaari.

<sup>25</sup> ¡Jiyacaritij, jiyapueranuuri cuhuariquiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojirii jaaquenuyanoori, nianujuniuyanonio. <sup>26</sup> Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” <sup>27</sup> Seruuri na riuquaree: “Quia nuhuajishanacuaja tari tiuquiriohuano. Quia

queeri shuquiriaatia quiya maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”.<sup>28</sup> Jiyacaritij, jiyapueranuuri jiyanoehua juaaqui. Majaari tiajinia na tiuquiniu paniniu quiriquiaa. Nocuaji na queeri nocua tohuatamaa carijiniacuma, na nenecojonura tiajinia na tiuquiniuria.<sup>29</sup> Na que sequeree saajaari: “Quiaacuajaari niishiya, janiyari pueyaracaanu poonijioquiaa quiarani. Majaari quenaaja cua tarijionu quiquiaa quiajaniya. Naa maninia tojjia cua quishacari quiajaniyatej, ¡majaari quia niquitionu quiquiaari janiya quenaaja niquiriyatu cabraniyojua, cua queranacunura cua rupuentaata!<sup>30</sup> Quiarjia saniniuujia, quia niyanu seque tiuquishacariuhua, ¡quiaari querasapiquia juunu niquiojua moree nera! ¡Nojuajaari quia cumaneeca puecacanua paanatujuuicua!”<sup>31</sup> Na queeri na sequeree: “Sanajanaa, quiaari pueyaracaanu cuata quiya. Puetunu cua jiiatasanojuanaari quia casa.”<sup>32</sup> Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarjia samiitiarohua pajaniyaraari. Nojuajaari juhua tashucuacanu pocuaji. Quiarjia pocua muetarohuari”.

## 16

*Miriqui Jesu pohuatasano pueyanojiniji, cante na jiyaniijia cumaneeca riutiocojuani*

<sup>1</sup> Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiiitaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riutiocoriquiaa jiyasohuaja, tama nerajaaja.<sup>2</sup> Cunora, jiyaniijiaari cuno na seru sequeree: “¿Taa quia miiquiaa janiyani? ¡Quiaana sesa

miiquiaa! Quiarijia cua niquitiore quia naajiotasano puetunu quia miishanojinijijianaa. Majaari socua quia quiniu quiniutianiya cua casami cojuana”.<sup>3</sup> Cunora, cumaneeca cojuanaari niishiriojooquee. Tama sequereearijia: “¿Taa cua miiniutianiyarini cua jiyaniijia jaara cua jatare cua poonijosanojiniji? Janiyari maja cumueecani, cuhuariquiajinia cua poonijionura. Naajuhuj, jiyanojua cararaatiaari quiria, pueyajiniji nareja cua mashiniquijionura cua panishano.”<sup>4</sup> ¡Jaj! Tari niishiquiinijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio poonijosanojiniji jatasaareni”.<sup>5</sup> Naaratej, nojuajaari naa miiquiaari. Juhuacatecara sequequiaari pueyari, nojori nijionura nocua, canapue na jiyaniijia niquitiojoquiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niquitiojocanu quiajaniyani?”<sup>6</sup> Pueyanoori na riuquaree: “Cua niquitiojocanu cien patacocua mishaja shiyocuan”. Cumaneeca cojuanaari na sequere: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacocua mishaja shiyocua”.<sup>7</sup> Na nuhuaji, tamonu pueyano nequesotareeri: “¿Quiajaniyarihuaj? ¿Casaa cua jiyaniijia niquitiojocanu quiajaniyani?” Na riuquareeri: “Cua niquitiojocanu cien canaasatu mishaja trigoni”. Cumaneeca cojuanaari na sequere: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”.<sup>8</sup> Na jiyaniijia jaara niishiquiaari sesa na seru miishano, na sequereeri: “¡Quiaaqui jiyanojua niishijia tama quia cuaqueyajaaja quia cojuanura!”

’Seetanujuanaa pueyanaa, Pueyaso niishiyashijiaa pueyari socua jiyanojua niishijiaa cuhuashiqui quijiaa

pueyajiniji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

<sup>9</sup> Naarate nia nacasuyanijia, naa capora nia quiriji-uhuj, maninia nia miiniuria pueya. Maja nia casami nia jamuenu. Cunocujaari nareja Pueyasó niqitiosano nijaniya. Naacuajitij, capora nia quishacari mijiria jaara puequema, nia Jiyaniijiaari nia tiuquinitianutaniya pueyaracaanu quishaqui jiyocuaaanu, jiyanohua na shuquiritiasacari nijaniya.

<sup>10</sup> Pueyano jaara jiyatesaare secaja casami cojuana na quiniuria, nojuaja jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenu-taniya. Saniniuujia, cante jiyatesaare secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohujaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhuj.

<sup>11</sup> Naajuhuj, niaa jaara maninia jiidiaaquiquiaa mijiria casami, Pueyasoori niaacua tiyaquiniutianiya seetanujuanaa maninia jiyocuaaanuji casami nia jitianura.

<sup>12</sup> Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niqitiore niaarano na riuriotacani? Maja cutaraari nia niqitiosaanu quiniutianiya.

<sup>13</sup> Poonitijosano pueyanoori maja na naata caapiqui jiyaniijiaara poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niqiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijiotesaanutaniya saaja. Naacuajitij, Pueyasoori maja na naata nia poonifijionu nera.

<sup>14</sup> Fariseocuaacari jiyanohua cumaneeca panijiaa quijia. Naaratej, nojori tojishacari Jesu sequesano, nojoriiri

saaja na rerequeteree. <sup>15</sup> Jesuuri nojori sequeree:

—Niaacuaajaari tama nia cuaqueyajaaja jiyatequiaa sa-puenu pueyano maniniu nia niquishaanura. Pueyasocua-jaari nioojia niishiya. Niaari pueya jiyajenetequiaa nojori jiyanishacari niaari Pueyaso panishano cutara, queraatia casami nia jiitiasacari. Saniniuujia, casaa pueya jiyate-quiaa socua jiyanohua na panishanorani, Pueyasoori cuno soya cutara.

*Moisés Rootasanoori coteenu quiquiaari, quiarjia quiya cutaraari quiarinio Pueyaso Rupaa*

<sup>16</sup> 'Moisés Rootasano, mariyata puetunu tariucua-caanu Pueyaso sequenu panishano caminiuujunaa pohuatasanojuanaari pueya tojitiasocoriquiano quiquiaari, Tiuquinijiona Juan pohuatasanojuhuaj. Quiarjia saniniu-ujia, maninia rupaa Pueyasojinijiiri pohuatasaaquiaa, taa Pueyaso jiyanooni paniya pueyani, na muerasu nojori quiniuria. Quiarijiani, puetunu pueyajanaari jiyanohua saniniuujia Pueyaso muerasu nojori quiniuria.

<sup>17</sup> 'Nio jiyari shaajeriquiano, jiya cajiniocuanio. Saniniu-ujia, tariucuaaanu pueyara Pueyaso sequesano caminiu-ujunaa pohuatasano cutaraari maja na shaajenu quiniu-tianiya quenaaja.

*Jesu niishitiojosano, pueyano carteyaquiniuria necocua  
(Mt 19.1-12; Mr 10.1-12)*

<sup>18</sup> 'Pueyano jaara necocua cartere tamonu maajitia na caminiuria, cuno pueyanoori jiyanohua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

*Jesu pohuatasano casamiriaca pueyanojiniji, Lázarojinijinio*

<sup>19</sup> 'Casamiriaca pueyanoori quiquiaari. Jiyanohua maniniuqui toqueya cushiyojojuuari, juhua jiyaniijianu-cua toqueya. Jiyanohua na shuquiriniutia, puetunu



juucajanaa queranacujuaari. <sup>20</sup> Jiyacaritij, casamijiu pueyanoori quijiajuhuaj. Jiyanoehua sapueyaraca. Nojuajaari cuno casamiriaca pueyano tía tohuateyaji niojotasano puetunu juucajanaa. Na sesaari quijia Lázaro. <sup>21</sup> Nojuajaari casamiriaca miaquejajiniji totinijosano raacua miáquenu panijia juucua. Saaja sareyari na sapueya rimianacunuujua. <sup>22</sup> Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijuhuaj. Jamosaaquiaariiri. <sup>23</sup> Sesa mijiacarano quiquiojinia na quishacari, naquiya na miishacari tii, nojuajaari mauquiaari. Cuniqiji tucuaaanu niquirii Lázaroori, shuquiriaatia quiyano supuetana Abrahamta. <sup>24</sup> Casamiriaca pueyanoori nacaree: “¡Cua supuetana Abrahamnaa, cucua quia taraajere quenaaja! ¡Lázaro quia jiyarore cucua! ¡Cuaara na juaashiquia nacatu shiria mohuacajinia! ¡Cua niti shiniajaquee quenaajacua! ¡Janiyari puera jiyanoehua naquiya miya nio manijiniani!” <sup>25</sup> Abrahamri saaja na riuquaree: “Sanajanaa, quia niishiritaa jiyanoehua maninia quia quiquiaarini, pueyaracaanu jiyocua quia quishacari. Lázaroori saniniuujia jiyanoehua taraatia quiquiaari pueyaracaanu, jiyocua na quishacari. Lázaroori quiarjia niya cumanijiashiya. Quiaari saniniuujia naquiya miishiyacujua. <sup>26</sup> Naajuhuj, jiyanoehua tucuaa tacoori pa tajinia quiya. Cunora, cante niiquiji niuuniu paniya cuniqijiria quiocuani, majaari na naata. Naajuhuj, cante quia quiquiojiniji niuuniu paniya niiquijiriani, majaari na naatajuhuj”. <sup>27</sup> Casamiriaca pueyanoori supuetana Abraham sequerohuacuhuj: “Naa naasucuj cua supuetana Abrahamnaa. Naajaa, quia secojijianijia, Lázaro quia jiyarorohua cua que tajinia. <sup>28</sup> Tii quiyajaari cua tapueyocuaca. Cinco tarajanuhuaracanijia. Lázaro cuaara nojori numooteera, maja nojori quejoosaanu-

rajuhua nio saniitiosaqui quiquiojinia”. <sup>29</sup> Abrahamri na riucuaare: “Nojoricuajaari Moisés Rootasano jii-  
itaa, puetunu Pueyaso sequesano caminiujiuniaa naa-  
jiotasanojuanaanio. Quia tapueyocuaca cuaara tojiti-  
aara cuno”. <sup>30</sup> Casamiriaca pueyanoori riucuaare: “Naa  
naasucuatuhuj, cua supuetana Abrahamnaa. Naajaa,  
tamonu pueyano macunucujinijinio jaara muetarohua  
nojoriicua, nojoriiri noojia tacatonutaniya sesa nojori mi-  
iniujiniji”. <sup>31</sup> Abrahamri saaja na riucuaare: “Nojori jaara  
Moisés Rootasano tojitianu paniyaquiquiaa, Pueyaso se-  
quesano caminiujiuniaa naajionuutasanonio, majaari no-  
jori tojitianu quiniutianiyajuhuj, macu pueyano jaara  
samiitiarohua”.

## 17

*Pueretaari quiniutianiya sesa miijiacara*  
(Mt 18.6-7, 21-22; Mr 9.42)

<sup>1</sup> Na nuhuaji, Jesuuri na pueya sequequiaari:

—Mijiria, pueyari pueyaracaanu sesa miitishaaquiaa.  
Jiyanohua taraatia quijiaari cuno, cante sesa miitirii  
tamoni. <sup>2</sup> Jiyano pueyanoratej, maara socua  
maninia quiri nera, puereetuuca saajia jaara na  
riquiajiniji morotasaare, shoniniacu caminia jiuujiajinia  
jartasocoriquiano. Jaara naa miishaaretej, maara maninia  
quiri, maja sesa miijiaara na jiyatenura niquiriyatu  
nio muerasuniyojuajinijinio. <sup>3</sup> Cunora, tama nia  
cuaqueyajaaja nia cojuare maja quenaaja sesa nia  
miitiniuria pueya.

<sup>1</sup>Quia tarajanu jaara sesa miiri, quia nacasurenaj. No-  
juaja jaara taraajerohua sesa na miiniucua quiajaniya,  
quia jiyanoorinij. <sup>4</sup>Nojuaja jaara sequeyarucua sesa miya  
quiajaniya niquiriyatu juuca, naajaa, quia jiyanooriquia,  
nojuaja jaara quia sequere: “Sesa miirii quiajaniyanijia.  
Cua jiyanoori quenaaja”. Nojuaja jaara quia pacutejore

sesa miiniu siete cuno juucaja, naajaa, majaari na tarini-tianu jiyanooniu.

*Pueyasocua tiuujia pueyanoori jiyanoohua cumaacaraca*

<sup>5</sup> Jesu saquiriojosano pueyari Jesu sequequiaari:

—Jiyaniijianaa, socua jiyanoohua canaa quia tiutiri Pueyasocua, socua cumaaca canaa jiitianura.

<sup>6</sup> Jiyaniijia Jesuuri nojori riucuaree:

—Pueyasocua nia tiuuniu jaara quiri quenaaja juhua mostaza jajauniyojua, jiyanoohua shiitaniyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

*Pueyasora poonijionatucua taa miijia quiriquianij*

<sup>7</sup> Niaa jaara seruraca quiriquia, nojuaja jaara tia-jinia tiuquiriohua quia cuhuariquijiniiji tee na nami-tiariquiaacuajani, quia seya cojuanujiniiji soj, ¿niaatucua na sequere: “Miji, quia miaquesuhuaa”? <sup>8</sup> Majaruhua. Niaari saaja na sequenutaniya: “¡Quiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniujia miaquero-hua. Quiocua raturouahuajuhuj”. <sup>9</sup> Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? ¡Maja! <sup>10</sup> Naajuhuj, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitajajiniijiaaja cua miiniu quiquiaa cua Jiyaniijia. Janiyari saaja pueyaracaanu paniquiaa cucua na tequejonura juhua naatujuaacuani”.

*Jesu naatanijiosacari diez pueya, lepraraca cusosuhua*

<sup>11</sup> Jesuuri Jerusalén tiacajiniara na pueyata quiariquiaacuhuj. Jiyacari, Galilea jiya, Samaria jiya tajiniaaco quiariquiaari. <sup>12</sup> Quera na tiuquishacari shiitaniyojua tiacajinia, diez pueya lepraraca

cusosuhuari na naacuquiaari. Nojoriiri tucuaaanujijia Jesuucuaaji nujuatusee. <sup>13</sup>Nojoriiri Jesuucua nacaree:

—¡Niishitiojona Jesunaa, canaacua quia taraajere!

<sup>14</sup>Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricujani.

Nojori canujuucuatuseerijia, nojori cusonuuri shaajee-quee. <sup>15</sup>Tamonu nojorijinijinio niquishacari na cuaqueya tari cushiriiquii, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. <sup>16</sup>Jesu cariquimiaji mojuquetaseeri. Jiyocuara naniriiri. Jesu sequereeri: “¡Paacarasho Jesunaa!” Cuno pueyanoori Samaria jiyajinijinio tahue quiquiaari. <sup>17</sup>Jesuuri na pueya niqiara naa sequereeri:

—¿Majateeri diez cusosuhua naatanijiosaanu quirii? ¿Teeteeri narta naataconohua nueve pueyani? <sup>18</sup> ¿Saaja nio tahueteeri tacaterohua Pueyaso na maniniuhuaqueetanura?

<sup>19</sup>Na nuhuaji, Jesuuri cuno tahue sequereeri:

—Quia sanere. Quia quiaarohua. Quiaacuaja naatarohua cucua quia tiuuniuucua.

*Taa na quiniutianiyani, Jiyaniijia Cristo tiuquishacariuhua (Mt 24.23-28, 36-41)*

<sup>20</sup> Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijia na quiniuria mijiriani. Jesuuri nojori riucuaree saaja:

—Pueyaso Jiyarosano jiiitasacari na muerasu, majaari namijiata niquishano. <sup>21</sup> Majaari na naata sequesaa: “Niya quiya pa Jiyaniijia quiquio”, “Jati quiyaruhua”. Pueyasocuajaari tari niya jiiitiaa na muerasu nia tajinia.

<sup>22</sup>Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Ni-aari cua niquiniuucua jiaatianutaniya niaata cua quini-uria rupaquijia, taa niaata cua quiya quiarijiacuaani. Ma-jaari nia niquiniu quiniutianiya janiya. <sup>23</sup> Tamasacaari nia sequenutaniya: “¡Niya quiyacuaja nia Jiyaniijia!” Tamasacaari saniniuujia sequenutaniyacujua: “¡Nooj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhua-naj. <sup>24</sup> Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocuajanaa niquishaaquiaacuaani na nunujusacari. <sup>25</sup> Saniniuujia, mijiria cua quishacarijia, janiyari co-teenu jiyanohua naquiya miishaanutaniyani. Nio pa quishacari pueyari cua paniyaquiniutianiya. <sup>26</sup> Quera cua tiuquiniu panishacariuhua mijiria, naa quiniutiani-yari taa mijiria quiniaa pueya quiquiaaricuaa supuetana Noé quishacarini. <sup>27</sup> Naa quiquiaariiri cuno quishacari. Mijiria quiniaa pueyari juhuajaniya miaquenuujua. Raru-ujuaari. Juhuajaniya maaji camiyojuaari. Pueyari neco-jori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuuca buquejinia. Canashiyaquiji, maruuri jiyanohua niquiaari. Puetunu mijiria quiniaajanaari cusunuuquiaari pajaacajinia. <sup>28</sup> Naa quiquiaarijuhua supuetana Lot quishacari Sodoma tiaca-jinia. Cuno pueyari juhuajaniya miaquenuujua. Raru-ujuaari. Casami masejojuaari. Juhuajaniya na casami niq-uitiojojuaari. Na cuhuariquiaca natoojuaari. Na tiacara tiajojuaariuhuj. <sup>29</sup> Naa juhuajaniya nojori quishacar-itij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiy-ocuaaanuji. Puetunu cuno sesa miijiacajanaari manijinia catequiaari. <sup>30</sup> Naa quiniutianiyajaariuhua quera jiya puequesacari. Pueyari juhuajaniya quiniutianiya. Jani-yari jiyacari canashiyaquiji tiuquiniutianiuhuani.

<sup>31</sup> 'Cuno juuca, pueyano jaara na tia cacojiria quiya, cuaara roseyaquiiria na casamiicua tiajiniaaco. Naa-juhuaj, pueyano jaara na cuhuariquiajiria quiya, nojuaja cuaara tacateyaquiuhuara na tiajinia. <sup>32</sup> Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niqiniuucua, na casamicua na taraajesacari. <sup>33</sup> Cante saaja shuquiriaatia mijiria na quiniuria niishiriojojuani, nojuajaari na nuhuaji jiyanohua taraatia quiniutianiya Pueyasooju. Saniniuujia, cante tama na cuaqueyajaaja panitiaja cua tojjijara na quiniuriani, nojuajaari pueyaracaanu shuquiriaatia quijara jiyatesaanutaniya.

<sup>34</sup> 'Cua tojiri. Cuno niucujahuaj, caapiqui pueya jiuuriatoosacari juucua na maquetujinia, niquiriyatujuaari rishaanutaniya jiyocuaaanura, Pueyaso pueyano na quiniuucua. Tamonuuri tiujiasaanutaniya saniitiosocoriquiano. <sup>35</sup> Cuno juucajahuaj, caapiqui maajipohua riiquiniuushacari jatiqui juucua, cucua tiuujiaari tarajanu shuriucujaji rishaanutaniya. Tamonuuri tiujiasaanutaniya saniitiosocoriquiano. <sup>36</sup> Caapiqui pueya quishacari cuhuariquiajiria, cua pueyanoori rishaanutaniya. Tamonuuri tiujiasaanutaniya saniitiosocoriquiano.

<sup>37</sup> Jesu pueya tojishacari naa Jesu sequesantej, nojori-iri na nequesotaree:

—¿Tee nio quia pohuatasano niquishaanutaniyarini?

Jesuuri nojori riucuree miriqui:

—Tee casaa moqueyani, mohuari tii rerejiya.

Naajuhuaj, majaari quenaaja niquiriyatu Pueyaso tojjiyashijia cureenu quiniutianiya saniitiosoo.

## 18

*Jesu pohuatasano mashiquiojiniji, pueya nequesoreena pueyanojinijinio*

<sup>1</sup> Jesuuri na pueya pahuataquiaari nio miriqui pahuatasano nojori na niishitiojonura, nojori cuaara Pueyaso secojoora pueyaracaanu, nojori taacanuyaquiniutia. <sup>2</sup> Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequetejano. <sup>3</sup> Cuno tiacajiniaja tamonu mashiquioori quiquiaarijuhuaj. Mashiquioori cuno nequesoreenaacua rucuanesojua pueyaracaanu. Na secojojuuari sesa na miinia pueyano cuaara na niquitiohuara na casaa saniniuujia, sesa na miishanojiniji nojuaja. <sup>4</sup> Majaari nequesoreena tojiniu paniniu quijia pueyaracaanu cuno mashiquio. Naajaa, pueyaracaanu nocua na rucuanesojuaari, cuno nequesoreenaari socua tama sequequiaarijiaaja: “Janiyari maja Pueyaso puerejani. Janiyari pueya tojiyashijia cutarani. <sup>5</sup> Naajaa, naa nio mashiquio taajetesacari janiya pueyaracaanutej, janiyari quiarjia na panishano miiniuutianiya nerani, mariqui cua juaatijiore pueyaracaanuuri na nenecojosacari janiya”.

<sup>6</sup> Maninia na pueya niishiniuria na pahuatasano, Jiyaniijia Jesuuri naa nojori sequerohuacuahuaj:

—Naa miiquiaariiri, cuno pueya nequesoreena seque. Jiyanohua pueya rerequeteja quiquiaariiri, naajaa, nojuajaari maninia miiquiaari cuno mashiquiora. <sup>7</sup> ¿Nia que Pueyasoorijataj? ¿Niaateeri jiyaniya maja nojuaja tojiniu quiniutianiya na muerasu, canapuate na secojoquiaani juuca, niucuanio? ¿Pueyasoteeri nia sashitiniutianiyaajaara? ¿Maja! <sup>8</sup> Nojuajaari maja na tarishiniu quiniutianiya. Ritia nia naacunutaniyari sesa nia miijiaca pueyacuaji. Sesa nia miijiacaari namishaanutaniya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasocua tiuuijaca riuritanutaniya naa pueyaracaanu secojonuujucani?

*Jesu pahuatasano miriqui Fariseo pueyanojiniji, Romano jiyaniijiara cumaneeca masejojuajinjinio*

<sup>9</sup> Jesuuri socua nio miriqui pahuatasano pahuataquiaari noo pueya niquiara, canapуетe tama na cuaqueyajaaja jiyaniijiani nojoriiri maninia pueyano. Naacujitij, nojoriiri tamasaca pueya soojea, nojori jiyaniishacari cuno pueyari socua sesa miijiaca nojorijiniji. Cunora, Jesuuri nojori niquiara naa pahuataquiaari:

<sup>10</sup> —Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijiara cumaneeca masejoua pueyanoori quiaquiaari Pueyaso na secojonura tiijuhuj. <sup>11</sup> Fariseo pueyanoori nujuariquiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasaca pueyani. Tamasaca cutaraari nohuasenuujuaca, sesa miijiaca, maaji porocujuhuj. Naajuhuj, shuquiriaatia quiyaniija, janiyari maja sesa miijiani juhua nio pueyanoua niya cuata secojiyani, cumaneeca masejona pueyanoni. <sup>12</sup> Janiyari caapiqui juuca miaqueyaquiquiaani puetunu semaanajanaa cua shuquiritiniuria quiajaniya. Naajuhuj, janiyari pueyaracaanu puetunu cua masesanojinijijianaa niqitioquiaa quiarani, taa Moisés rootaquiaaricujani”.

<sup>13</sup> Cumaneeca masejonaari saniniuuja tucuaaanu ni nujuasee. Na secojosacari, majaari quenaaja na maunu quiriqiaa jiyocuaaanu. Tama nojuajaari na jiriqiaa piquiriqiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianija!” Naa secojoquiaariiri.

<sup>14</sup> Seetanujuanaa nia sequeyanija, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuuja jiyanoyaquishoo tacateyarohuacujua. Naacujitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararosaanutaniya.



Saniniuujia, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuanaa sesa miyaquijia na quiniuria.

*Jesu niasacari na juaashiquia conaajaacua*

*(Mt 19.13-15; Mr 10.13-16)*

<sup>15</sup> Jiyacaritij, conaajaari poosaariquiaa Jesuucua, Jesu nianura nojoriicua na juaashiquia, Pueyaso jiitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juarii. <sup>16</sup> Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. <sup>17</sup> Seetanujuanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniuriani, cuno pueyanoori maja na naata Pueyaso muerasura na quiniu.

*Casamiriaca pueyano pocoojosacari Jesuta*

*(Mt 19.16-30; Mr 10.17-31)*

<sup>18</sup> Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quijjara cua quiniuria Pueyasotani?

<sup>19</sup> Jesuuri na riucuaare:

—¿Casaara quia sequeya janiya maninia pueyanotani? Saaja Pueyaso cutaraari seetanujuanaa maninia. Majaari socua tamonu quiniu. <sup>20</sup> Pueyanonaa, quiaacuaajaari Moisés Rootasano niishijia. Naa naajiotasanocuaajaari quiya: “Maja quia camishoo maaji numuetucunu. Maja

monu. Maja nohuasenu. Maja tamonuucua saquirio-jotanu quia sapojonuta. Quia que, quia nucua tojjia quia quiri”.

<sup>21</sup> Pueyanoori Jesu riucuaaree:

—Janiyacuajaari cua naatujuajiniji puetunu cuno tojjijajanaani.

<sup>22</sup> Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jiitiasanojuanaa quia niqutiojore cumaneecara. Na nuhuaji, casamijiuniucua pueya cuno cumaneeca quia niqutiojore nareja. Naacuajitij, quiaari jiyanhua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

<sup>23</sup> Na tojishacari Jesu sequesano, nojuajaari jiyanhua taraajequee, jiyanhua queraatia casamiriaca na quishacari. <sup>24</sup> Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanhua jiyajenetaari Pueyaso muerasu nojori quiniuria. <sup>25</sup> ¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanhua jiyajenetaari Pueyaso muerasu na jatanishaanura.

<sup>26</sup> Pueya tojishacari naa Jesu sequesantej, nojoriiri naa na nequesotaree:

—¿Canteeri Pueyaso muerasura quiniutianianitioj?

<sup>27</sup> Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

<sup>28</sup> Pedroori Jesu sequeree:

—Jiyaniijianaa, ¿canaarijataj? Canaari puetunu canaa jiitiasanojuanaa tiujiaquiaarini canaa nuhuajiniuria quia-janiya.

<sup>29</sup> Jesuuri na riucaaree:

—Seetanjuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanoehua queraatia masenutaniya mijiria na quishacarijia. <sup>30</sup> Na nuhuaji, samiitianishano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

*Jesu pacutesacari pohuatanu, nojuaja mosaanutaniya  
(Mt 20.17-19; Mr 10.32-34)*

<sup>31</sup> Jesuuri saaja na doce saquiriojosano pueya jiyataaree tamocora. Naa nojori sequereeri:

—Paari quiarijia Jerusalén tiacajinia quiaani. Janiyari quiniqui puetunujuanaa miishaanutaniyani taa tariucuaaanu pueyara Pueyaso sequesano caminiujiuniaa sequequiaaricuaja janiyajinijini. <sup>32</sup> Naacuaajtij, janiyari tahua niquitiosaanutaniyani. Nojoriiri cua macaatiutiutianiya. Taraatia cua miitiutiutianiyari. Cua riocojotunutaniyari. <sup>33</sup> Cua piquitiutiutianiyajaarihuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutanihuani.

<sup>34</sup> Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

*Jesu jeeacasacari cariojuaru pueyano Jericó tiacajinia  
(Mt 20.29-34; Mr 10.46-52)*

<sup>35</sup> Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nucuaco. <sup>36</sup> Cariyojuaru tojishacari queraatia pueya tajiitano, pueya nequesotareeri:

—¿Casaatejanojoni?

<sup>37</sup> Pueyari na sequereeri:

—Nazaret tiacajinijinio Jesucuaaja tajiya.

<sup>38</sup> Cariyojuaruuri nacaquee:

—¡Jesunaa! ¡Supuetana David niquiohuacuajinio supueno pueyanonaa! ¡Cucua quia taraajere quenaaja!

<sup>39</sup> Jesu puetanaa pueyari na juaarii na sanaajanura juucua. Nojuajaari saaja socua jiyanoehua nacaree:

—¡Supuetana David niquiohuacuajinio supueno pueyanonaa! ¡Cucua quia taraajere!

<sup>40</sup> Jesu tojishacari nojuaja, nujuaseeri. Jesuuri pueya sequeree cariyajuaru cuara jaatucusaaria nocua. Cariyojuaru tiuquishacari nocua, Jesuuri na nequesotaree:

<sup>41</sup> —¿Casaa quia paniya cua miiniuria quiajaniyani?

Cariyojuaruuri Jesu riucuaee:

—¡Jiyaniijianaa, niquijiara quiniu paniuhanijia!

<sup>42</sup> Jesuuri na sequeree:

—¡Niquijiara quia quiriohua! Quia namijiacuaja tari jeequeroehua cucua quia tiuushacari.

<sup>43</sup> Jiyacaritij, cariyajuaruuri maninia niquijiara quiquii. Jesu nuhuaji sacuaareeri na shuquiritianuta Pueyaso. Puetunu Jesu miishano niqiniaajanaari Pueyaso maniniuhuaqueetariquiaa.

## 19

### *Jesu pocoojosacari Zaqueota*

<sup>1</sup> Jesuuri Jericó tiacajinia tiuquijioquiaari na puey-ata. Tiaca jiuujiaaco quiariquiaari. <sup>2</sup> Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijara cumaneeca masejonaa camarnu quiquiaari. <sup>3</sup> Nojuajaari Jesu niishiniu panijia juucua. Majaari na naata niqiniu quiriquiaa Jesu, puera jiyanoehua pueya quiniuucua Jesu shocua. Naajuhuj, Zaqueori puera posucuashi quijia. <sup>4</sup> Cunora, Zaqueori netequiaari Jesu tacoji. Nu shuucuaji sicómoro naanaacua macaseeri, maninia na niqiniuria

tiji Jesu, jaara cunoco tajimia. <sup>5</sup> Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, ¡ritia quia rosemohua! Janiya quiarijia quia tiajinia maquenutaniyani.

<sup>6</sup> Zaqueori ritia rosemohua. Jesu tiuquinitiaree na tiajiniaari jiyanoehua na shuquiriniutia. <sup>7</sup> Tamasaca pueya jaara Jesu niqiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturiquiaajaarijia: “Cuno pueyanoori sesa miijia pueyano tiajinia tiuquishii”. <sup>8</sup> Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijanaa, janiyari quiarijia quiocua tiuuriini. Naacuajitij, janiyari casamiijuniucua nareja niqutiojonutaniya puetunu cua jiitiasano cajiniocuajinijianaani. Naajuhuj, janiya jaara puera cumaneeca masecanu tamasaca pueyajiniji cua sapojonutani, janiyari nojori niqutionutaniuhua socua jiyanoehua queraatia cumaneecani cua nohuasesanojiniji nojori.

<sup>9</sup> Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocujaari supuetana Abraham niqiohuacuajinio supuenojuhuj. Nojuajaari cucua tiuurii taa Abraham tiuquiaari Pueyasooacuacaani. <sup>10</sup> Janiyacuajaari cunora mijiria niqiaarini, tashucuanu pueya cua pajenura, nojori cua jaariutianura Sesaaca.

*Miriqui Jesu pohuatasano diez cumaneecajiniji  
(Mt 25.14-30)*

<sup>11</sup> Tii quiniaa pueyari Jesu pohuatasano tojitiariquiaa. Jesuuri tari cateca quiriqiaa Jerusalén tiacajiniji. Pueyari jiyaniriquiaa Jesuuri Israel pueya jiyaniijia quiniutianiya tari, Pueyaso muerasu na jiitianura mijiria.

Nocuaji, Jesuuri nojori pohuataree nio miriqui pohu-  
 atasano, nojori na niishitiojonura. <sup>12</sup> Naa nojori niquiara  
 pohuatareeri:

—Tamonu jiyaniijia niyanuuri quiquiaari. Nojuajaari  
 tucuacaanu tamonu jiyajinia quiaquiaari jiyaniijiaara na  
 jiyatesaanura. Jiyaniijiaara na jiyatesaanu nuhuaji, nojuajaari  
 tacateriquianohua quiriquiaa, narta pueya jiyaniijia  
 na quiniuria. <sup>13</sup> Na nuhuajiria, nojuajaari diez na seya  
 sequeree nocua nojori nijionura. Nojuajaari puetunu  
 nojorijanaa niqitiojoree niquiriyatu cumanee, orojiniji  
 shipinishano. Nojori sequereeri: “Nio cumanee nia  
 poonitijiore, janiya cuaara tiuquiriohuajaatiinijiaj”. <sup>14</sup> Na  
 nuhuaji quiaqueeri. Na jiyajinijinio pueyari maja na  
 niqiniu paniniu quijia cuno pueyano. Cunora, nojoriiri  
 pueya jiyaramiquirii na nuhuaji, jiyaniijiajanaa nojori  
 sequenura: “Maja canaa paniniu cuno pueyano, canaa  
 jiyaniijia na quiniuria”.

<sup>15</sup> Naajaa, nojuajaari saaja jiyatesaaree jiyaniijia na  
 quiniuria. Na nuhuaji, na jiyajinia tacateyarohuari. Jaara  
 tiuquishuhua, na cumaneeca na niqitiojosano seya se-  
 quereeri, nocua nojori nijionura. Nojuajaari niishiniu  
 paniriquiaa taa cumaneeca socua nojori reratequiaarini,  
 nojori poonitijosacari na niqitiojosano cumaneeca.  
<sup>16</sup> Coteenu seruuri nocua nimiaa. Na jiyaniijia sequeeseeri:  
 “Cua jiyaniijianaa, cua poonitijosacari quia niqitiosano  
 cumanee janiya, janiyari socua diez cumaneeca rerate-  
 canuni”. <sup>17</sup> Na jiyaniijiaari na sequeree: “¡Maniniacuaja!  
 ¡Quiaacuajaari maninia cua seru! Quiaari secaja cua  
 niqitiosano quiajaniya poonitijioriquiaa shitimia quiria.  
 Naaratej, janiyari quia jiyatenutaniya diez tiaca jiyani-  
 ijiaara quia quiniuriani”. <sup>18</sup> Na nuhuaji, tamonu na seruuri  
 nocua nimiaajuhuj. Nojuajaari na jiyaniijia sequeree:  
 “Cua jiyaniijianaa, cua poonitijosacari quia niqitiosano  
 cumanee janiya, janiyari socua cinco cumaneeca rerate-

canuni”. <sup>19</sup> Na jiyaniijjaari na sequereejuhujaj: “Quiaari cinco tiaca jiyaniijjara quiniutianiya”.

<sup>20</sup> 'Na nuhuaji, tamonu na seruuri nocua nimiaa-juhuaj. Na jiyaniijja sequeeseeri: “Jiyaniijjanaa, niya quiya quia cumanee quia niqutiosano janiya. Janiyari na cojuacanu maniniani, toqueraujinia jiuniocosano. <sup>21</sup> Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacua taraa-jeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhujaj”. <sup>22</sup> Na jiyaniijjaari na juaarii: “Sesaacanaa, tama quia sequesanotajaaja janiyari quia nequesoreenutaniyani. ¿Naa-tee? ¿Quiaateeri niishiquianu janiyari pueyacua taraa-jeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhujaj? <sup>23</sup> Quiaa jaara jiyaniquianu janiya naa mijiani, ¿casaara cua cumanee quia niqutioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriata-suhuani, cua tijinia cua tiuquishacariuhua”. <sup>24</sup> Cunora, na jiyaniijjaari tii quiniaa pueya sequeree: “¿Cua cumanee nia jaariutiare cuno! Nia niqutiore cua maninia seru, cante diez cumaneeca jiitiaacuajani”. <sup>25</sup> Nojoriiri na sequeree: “Jiyaniijjanaa, ¿casaarateni? Nojuacuaja tari diez cumaneeca jiitiaa”. <sup>26</sup> Jiyaniijjaari saaja nojori riucuaaree: “Seetanujuanaa nia sequeyanijia, cante tari jiitiaani, nojuajaari socua niqutiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiuyashijia na quiniuucua. <sup>27</sup> Quiarijia, cua paraa saniniuujia, cuno pojori canapuate cua paniyaquiquianu nojori jiyaniijja cua quiniuriani, miji nia jayore nojori. Niya cua niqiuara nia puecoore cua ruuretajaca seque”.

*Jesu tiuquishacari Jerusalén tiacajinia  
(Mt 21.1-11; Mr 11.1-11; Jn 12.12-19)*

<sup>28</sup> Nio na pohuatanu nuhuaji, Jesuuri na pueya puetaareecuhuj Jerusalén tiacajiniara. <sup>29</sup> Jaara cateca quiriquiaa tari Betfagé tiaca, Betania tiacanio, Olivo cuhuariquia tuhuananujuhuj, Jesuuri caapiqui na pueya sequeree:

<sup>30</sup> —Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niari burro riuritanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niari na jaatucumohua miji. <sup>31</sup> Pueya jaara nequesotare nianianiya casaara nia samaacartaanoj, niocua na riucuar: “Jiyaniiija na paniya”.

<sup>32</sup> Jesu pueyari quiaaree. Nojoriiri na riuriatasee taa Jesu sequequiaaricujani. <sup>33</sup> Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

<sup>34</sup> Nojoriiri na riucuarree:

—Jiyaniiija na paniya.

<sup>35</sup> Na nuhuaji, nojoriiri na jaatucuyarohua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. <sup>36</sup> Na quiasacari Jerusalén tiacajiniara, pueyari na toqueya muevoquiaari nucuaco Jesuucujai. <sup>37</sup> Nojori rosetanu panishacari Olivo cuhuariquia tuhuananujiniji, puetunu Jesu pueyajanaari juhuacatecara nacoquiaari nojori shuquiriniutia. Nojoriiri Jesu maniniuhuaqueetariquiaa puetunu na cumaacata na miishanojuanaa nojori niquiniuucua. Nojoriiri cunora jiyanohua shuquiritariquiaa Pueyaso. <sup>38</sup> Nojoriiri naa nacooriaquiaa:

—¡Pueyaso cuaara shuquiritiiria pa Jiyaniiija, Pueyaso Jiyarosano na quiniuucua! Pueyaso pocua taraajerohuani.



Pa jiyanooriohuani. ¡Nojuajaari jiyanohua maninia! ¡Pa shuquiritiarenos!

<sup>39</sup> Cuniqui pueya tajinia quiniaa Fariseocuaca to-jishacari naa nojori sequesanoj, nojoriiri Jesu sequeree:

—¡Niishitiojonanaa, quia pueya quia sanaajare, maja naa nojori sequenura!

<sup>40</sup> Jesuuri saa sequerejaa:

—Seetanujuanaa nia sequeyanijia, nio pojori jaara sanaajetare, ¡sairi saniniuujia nacoanutaniyacujua!

<sup>41</sup> Tari Jesu quishacari Jerusalén tiaca shuriucua, na niquishacari cuno tiaca, Jesuuri cuno tiacajinia quini-aacua nujuqueree. <sup>42</sup> Cunora, juhua pueyano sequeree Jerusalén tiacaari:

—Jerusalén tiacanaa, quia niishitiriquia quiarijiani, casaa quia paniya jiyanooshano quia quiniuriani, shuquiriaatia quia quiniuriajuhuaj. Taraatia quijianaa, quia Jiyanooriquianoori juucua niya quiya. Majaari quia niishiniu nojuaja, juhua nimishitiu quia quishacari.

<sup>43</sup> Cunora, na nuhuajiiri jiyanohua taraatia quiniutianiya quiara. Quia paraari quia mataconutaniya quia shocuaqueya, na cosenura maninia quiajaniya quia mashiaquiniuucujaji. Naacuajitij, quia paraari quiocua juhuacunutaniya na miaquejonura quiajaniya.

<sup>44</sup> Quiaari jiyareta suresaanutaniya. Quia tiacajinia quiniari puecoosanutaniya. Quia tiacaari puetunu niyartasaanutaniyajanaa. Majaari tamonu saajia cureenu quiniutianiya quenaaja tamonu saajia caco mano. Quiaari naa miishaanutaniyatej quia niishiaquiniuucua, Pueyasoori quiocua niquiaari najuhanaj, quiocujaji na tacunura juucua. Quiaari saaja na ruuretacanu.

*Jesu jaacasacari seya niquitiojonaa Pueyaso Secojoua tia-jiniji*

*(Mt 21.12-17; Mr 11.15-19; Jn 2.13-22)*

<sup>45</sup> Na nuhuaji, Jesuuri Pueyaso Secojojua tiajinia tiuquiquiaari na pueyata. Nojuajaari juhuacatecara pueya tohuatanijioree, canapue te na seya niqutiojoriquiaacua-jani Pueyasoo cuara puecoosocoriquiano. <sup>46</sup> Jesuuri nojori sequeree:

—Tariucuacaanu Pueyaso Rupaajinia naa naajiotasaaquiariti Pueyaso sequesano: “Cua tiaari pueya secojonuujua janiya”. ¡Niaari saniniuujia na jiyatecanu nohuasenuujuaca quiquiora!

<sup>47</sup> Puetunu juucajanaa, Jesuuri jiyacari pueya niishitiojoriquiaa Pueyaso Secojojua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutaniya Jesuni. <sup>48</sup> Puetunu pueyajanaari saaja shamaatia tojitiariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

## 20

*Pueya nequesotasacari Jesu, cante na jiyaronani*  
(Mt 21.23-27; Mr 11.27-33)

<sup>1</sup> Tamonu juuca, Jesuuri Pueyaso Secojojua tiajinia niishitiojoriquiaa. Pueya niquiara pohuatariquiaari taate nojori naata Pueyaso muerasura quiniuni. Jiyacariti, pueyacuara secojonaa jiyaniijianucuaari Jesuucua nijioma. Moisés Rootasanojiniji niishitiojonaari nojoritia nijiomaajuhuj, narta Judiocuaca camarucuanio.

<sup>2</sup> Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniijia quia quiniuriani? ¡Canaa quia riu cuare! ¿Cante quia jiyaronani?

<sup>3</sup> Jesuuri nojori sequeree saniniuujia:

—Janiya nia nequesotanu paniyajuhuj. Cua riucature. <sup>4</sup> ¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

<sup>5</sup> Nojoriiri juhuacatecara tamajaaja pocoojoquiaari. Tama sequetooriquiaajaarijia:

—¿Taa pa riucanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?” <sup>6</sup> Saniniuujia, paa jaara na sequereni: “Juancuja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricujaari sequequiaa: “Juanna seetanjuanaa Pueyaso sequenu panishano caminiujiunia quiquiaari”.

<sup>7</sup> Nojoriiri cunora Jesu riucuaaree:

—Johuj. Maja canaa niishiniu canaquitijia Juan jiyaroquiaari na tiuquinijionura pueyatej.

<sup>8</sup> Naaratej, Jesuuri nojori sequereee:

—Janiyajuhuj, majaari cua sequenu quiniutianiya nia-janiya, cante cua jiyaroquiaarini naa cua miiniuriatej.

*Miriqui Jesu pohuatasano sesa miijiaca poonijionaajiniji*  
(Mt 21.33-44; Mr 12.1-11)

<sup>9</sup> Na nuhuaji, Jesuuri pueya niishitiojonu coteero-huacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva natooquiaari. Na nuhuaji, na niqutioquiaari tamasaca pueyari, nojori cojuanura nera. Na camaruuri tucuacaanu quiaaree, tii na shocotejonura marijia. <sup>10</sup> Uva quishacari noshuriujua, saniya cuhuariquia camarujanaari na seru jiyaroree cuhuariquia cojuanaa pueyacia. Jiyarosaareeri tiji na masenura na camarurajanaa, uva carojotasanojiniji. Na camarujanaacuajaari tarijia pocoojoquiaari cuhuariquia cojuanaa pueyata, taa nojori niqutionutaniya na carojotasanojinijini. Cuhuariquia

camaru seru tiuquishacari, ¡cuhuariquia cojuanaari na piquitiurii saaja! Na jiyaroturohua juhuasuuri. <sup>11</sup> Cunora, cuhuariquia camarujuanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuriiri. Na jiyaroturohua juhuasujaariuhuj. <sup>12</sup> Cuhuariquia camarujuanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

<sup>13</sup> 'Naaratej, cuhuariquia camaruuri tama sequereajaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niqitiuri, maja naasucua nojori rerequetenu quiniutianiya nojuaja”. <sup>14</sup> Saniniuujia, cuhuariquia cojuanaa jaara cuhuariquia camaru niyanujuanaa niquirii nojoriicua niyano, tama nojorijiaarijia sequetooree: “Nojuacuaja cuhuariquia camarura quiniutianiya na que niti, na que jaara shaajeyariquia. ¡Pa morej! Paari nio cuhuariquia camarura quiniutianiya saniniunijia”. <sup>15</sup> Naacujitij, cuno cuhuariquia cojuanaa pueyari cuhuariquia camaru niyanu jaatiurii cuhuariquiajiniji. ¡Cuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniuucua neyanutej, ¿taa na que miiniutianiya cuno sesa pueyarini? <sup>16</sup> Seetanjuanaa nia sequeyanijia, nojuajaari nocua quianutianiya nojori na puecoonura. Na nuhuaji, na cuhuariquia niqitionutianiya tamasaca pueyari, nera nojori cojuanura cutara.

Pueya tojishacari nio, nojoriiri sequequiaari:

—¡Juhuej! ¡Pueyaso cuara naa miyaquiriitej!

<sup>17</sup> Jesuuri nojori niqinijioree. Nojori sequereeri:

—¿Naatee? ¿Nio naajiotasanoorihuaj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia sojotanutaniya, nojori jyanishacari cuno saajia sesarujau. Na nuhuaji, cuno saajiaari socua panishano saajiaara jiyatesaanutaniuhua”.

<sup>18</sup> Cante cuno saajiaacua tiuriyani, nojuajaari juhua rashiquijiniutaniya. Cuno saajia jaara pueyanoocua tiyare, cuno pueyano jacanajonutaniyari. Shahuej.

<sup>19</sup> Jiyacaritij, pueyacuara secojona jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jiitanaa nojori quiniuucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu quiquiaari Jesu, nojori pueresacari Jesu panijia-pueya.

*Jiya jiyaniijia cuaara niquitiosaaria na sequesano cumaneeca*

*(Mt 22.15-22; Mr 12.13-17)*

<sup>20</sup> Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuatenura sesa juucua, nocuara tonujusaanura. Jesu jaara nojori riucuaquiaari sesa, maara Romano jiyaniijia niquitiosaaquiaari saniitiosocoriquiano. <sup>21</sup> Naacuajitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimiajata quia niquiniu pueya. Quiaacuajaari seetanujanaa niishitiojoquiaa, taa Pueyaso paniya canaa miiniuriacuajani. <sup>22</sup> Cunora, canaa quia sequere taa

canaa miiniutianiyani. Roma tiacajinia quijia jiyaniijjaari pa sequequiaari Judiocuaca cuaara cumaneeca niqutio-joora nera, na jiitiasano pueya pa quishacari. Naaratej, ¿maniniateeri pa miiniuria na sequesano?

<sup>23</sup> Jesuuri niishiquii nojoriiri nojuaja nequesotariquiaa najuhuanaj, nojori sapojonuta. Cunora, nojori sequereeri:

<sup>24</sup> —Cua niqutiri quia cumanee. ¿Niooriuhuaj? ¿Cana naaquiti nocuani? ¿Cana sesate nocua naajiotasanoni?

Jesu riuucatureeri:

—Cunocujaja canaa sequesano Roma tiacajinia quijia jiyaniijia César naaqui, na sesajuhuj.

<sup>25</sup> Jesuuri nojori sequeree:

—Jiyaniijia César cuaara tama na casaajaaja niqutiosaaria. Nojuacujjaari na camaru. Saniniuuja, Pueyaso nia niqutiore cutara nerano tama na casaajaaja. Nojuajaari pa camarnu.

<sup>26</sup> Saaja maninia Jesu riuucasacari pueya niquiara nojori, majaari nojori naata nocuara tonujunu quirii. Nojoriiri saniya jiuujiateree Jesu riuucasacari saaja maninia nojori. Naacuajitij, nojoriiri socua sanaajetaree.

*¿Paate samiitiaconutaniuhua?*

*(Mt 22.23-33; Mr 12.18-27)*

<sup>27</sup> Na nuhuaji, noojiaqueya Saduceocuacajinijiniori Jesuucua niquiiaari. Saduceocuacaari jiyanjia macunucua pueya maja na samiitiaconu quiniutianihua. Naaratej, nojoriiri Jesu sequeree:

<sup>28</sup> —Niishitiojonanaa, supuetana Moiséscujjaari pa rootaa na naajioneejinia, pueyano jaara cusoyare mueyaju, tarajanu cuaara camiiria mashiquio, mueya na mueratenura tarajanu niti. <sup>29</sup> Tamonu mashajaari seis tapueyocucaraca quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuoja. <sup>30</sup> Cunora, na nuhuajishanaari na mashiquio camirii. Nojuajaari muetuhuoja

cusoquiaarjihuaj. <sup>31</sup> Naaratej, neyaca tarajanuuri mashiquio camiquiaarjihuaj. Nojuajaari muetuhuojuua cusoquiaarjihuaj. Puetunu cuno mashiquiorjianaari naa camioquiaari cuno maajitia. Puetunu nojorjianaari cusonuquiaari muetuhuojuua. <sup>32</sup> Na nuhuaji, pueya mashiquioori shaajequiaarjihuaj. <sup>33</sup> Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiya? Cuno mashiquioajuajaari puetunu cuno siete pueya niquiocua quiquiaari.

<sup>34</sup> Jesuuri nojori riucuree:

—Mijiria pa quishacarjia, canuu, maajipohuari camioquiaa. <sup>35</sup> Saniniuujia, majaari noo pojori camiyonu quiniutianiya canapuate samiitianijiosaanutanihuacuajani, maninia quijiaa nojori quiniucua Pueyaso niquiara mijiria. <sup>36</sup> Majaari nojori shaajenu quiniutianihua. Nojoriiri shaajeyashijiaa quiniutianiya juhua Pueyaso seya. Nojori samiitiaconucua macujiniji, cunora, nojoriiri Pueyaso muerasujanaa quiniutianiya cutara. <sup>37</sup> Supuetana Moisésajuajaari pa niishitiquiaari, macunucuaari samiitianijiosaanutaniuhua. Moisésri naa naajioaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

<sup>38</sup> Naacuajitij, paari niishiyani, puetunu Pueyasoocua tiuujiaa shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuaajaari saminiucua quiya nera cutara.

<sup>39</sup> Noojiaqueya Moisés Rootasanojiniji niishitiojanaa pueya tojishacari naa Jesu sequesantej, nojoriiri Jesu sequere:

—Maniniacuajaari quia sequesano, Niishitiojonanaa.

<sup>40</sup> Naa Jesu riuhanesacari saaja maninia nojoritij, majaari socua pueya nequesoreenu paniniu quiriquiaa nojuaja.

*¿Cante Cristo supuetanani?*

*(Mt 22.41-46; Mr 12.35-37)*

<sup>41</sup> Jesuuri naa nojori nequesotaree saniniuuja:

—¿Casaara na sequesaaquiaacuaraarini, Pueyaso Jiyarosanonaari supuetana David niquiohuacuajinio supuenutaniya? <sup>42-43</sup> Supuetana Davidjanaacuajaari naa naajiotaquejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia’ ”.

<sup>44</sup> ¿Cristotucua taa David niquiohuacuajinio supuereni? Davidcuajaari na sequeya “cua Jiyaniijiata”.

Cuno pueyari maja na naata na riucuanu quiriquiaa.

*Jesu numootesacari na pueya, Moisés Rootasanojiniji niishitiojonaa pueyacuaji*

*(Mt 23.1-36; Mr 12.38-40; Lc 11.37-54)*

<sup>45</sup> Puetunu pueyajanaa tojitiasacarijia Jesu, Jesuuri naa na saquiriojosano pueya sequeree:

<sup>46</sup> —Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniuucuaji taa nojori miiquiaacuaani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanijosacari tiaca jiuujiajinia curotasano cajitiucuaajinia. Nojoriiri socua panishano cajitiucuaajinia cajiniu maniniucuaquiaa Pueyaso Secojoua tiajinia, tamasaca tiajiniajuhuaj, nojori jaara masuusaare queranacunura. <sup>47</sup> Naajuhuj, nojoriiri mashiquiopue tiaca masequiaa secaja cumaneecata nojori



sapojonuta. Naa jiyasohuaja nojori miiniu nuhuajitij, pueya niqiuara, nojoriiri najuhuana tucuayocua secojoquiaa Pueyaso, pueya jiyaniuria nojori maninia pueya cutara. Naa nojori miiniuucuatej, nojoriiri jiyanhua saniitiosano quiniutianiya.

## 21

*Casamijiu mashiquio niqitiosacari na cumanee juuranee Pueyasora*

*(Mr 12.41-44)*

<sup>1</sup> Pueyaso Secojojua tiajinia, Jesuuri casamiriaca pueya shootiariquiaa na cumaneeca niojiyano cumaneeca racataja quiquiojinia, nojori niqitiosano Pueyasora.

<sup>2</sup> Jesuuri tamonu casamijiu mashiquio niquiriijuhua caapiqui cumaneeniyojua niaano tiijuhuj. Na niasanoori nareja cobrejiniji shipinishano cumaneeca quiquiaari. <sup>3</sup> Jesuuri na pueya sequeree:

—Seetanujuanaa nia sequeyanijia, cuno casamijiu mashiquioori socua queraatia niqitiooree Pueyaso, cuno casamiriaca pueyajiniji. <sup>4</sup> Puetunu cuno pojorijianaari saaja na cureno cumaneecajiniji niqitiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaara na masetajara cumaneecajanaa niqitiooree.

*Jesu pahuatasacari, Pueyaso Secojojua tia niyartasaanutaniya*

*(Mt 24.1-2; Mr 13.1-2)*

<sup>5</sup> Noojiaqueya tii quiniaa pueyari pocoojoriquiaa Pueyaso Secojojua tiajiniji. Jiyanhua shanhua saitia shipinishano quiriquiaari. Nojoriiri na shootiariquiaa, naajuhuj taa na maniniushitishaaquiaari nareja pueya niqitiojosano casamitiani. Jesuuri nojori sequeree:

<sup>6</sup> —Puetunu cunojuanaa niaa na niqiyani, tamacari niyartasaanutaniyari. Majaari quenaaja tamonu saaja

cureenu quiniutianiya tamonu caco maano. Puetunu niyartasaanutaniyajanaari.

*Taa nio jiya puequenu panishacari quiniutianiyan*  
(Mt 24.3-28; Mr 13.3-23)

<sup>7</sup> Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niquiniutianiyarini, canaa niishinuria quia sequesanoori quera tohuateya?

<sup>8</sup> Jesuuri nojori riucuaaree:

—Tama nia cuaqueyajaaja nia cojuare niaa mariqui sapojosaareeri. Queraafia sapojonuujuaca pueyari supuenutaniya. Nojoriiri sequenutaniya: “¡Janiya Cristoni, Pueyaso Jiyarosano! ¡Nio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca. <sup>9</sup> Naajuhuj, majaari nia puerenu niaa jaara tojiri tamonu jiyajinijinio pueyari tamasaca jiyacajiniji pueyata miaquetoojiya, naajuhuj, pueya jaara juaatooquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanajuaja maja nio jiya puequesacari.

<sup>10</sup> Jesuuri naa nojori pohuatariquiaa socua:

—Tamonu rupaa pocuajacaari miaquetoojonutaniya tamaatia rupaa pocuajacata. Naajuhuj, tamonu jiyajinijinio jiyaniijiaari miaquetoojonutaniya tamonu jiyajinijinio narta jiyaniijiaata. Naa queraatia miaquetoojonuuri quiniutianiya. <sup>11</sup> Rijaari jiyanohua jiuuquiujiutianutaniya queraatia jiyacajinia. Jiyanohua mi-aajenuuri quiniutianiya queraatia tamonu jiyacajinijuhuj. Paaqueja cusonuuri quiniutianiya niya, tamaquicuajuhuj. Naajuhuj, jiyanohua puereeta casaari niqishaanutaniya jiyocuacaanu, mijiria quiniaa niishinuria jiya puequenuraari tari catecanoya.

<sup>12</sup> 'Cuno puereeta quiyaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso

secojonuujua tiajinaqueya nequesoresocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoresocoriquiano. Niaari naa miishaanutaniya nia pohuatanuucua janiyajiniji pueya niquiara. <sup>13</sup> Naacuajitij, nia naata cuno jiyaniijianucua niquiara pohuatanu janiyajiniji. <sup>14</sup> Nioojiaca nia cajitiri, maja juhuacarijia nia niishiriojonura taa nia riucuanutaniya nojorini. <sup>15</sup> Janiyacuajaari jiyacari nia niishitiojonutaniyani taa nia riucuanutaniyanoj, mariyata casaa nia pohuatanutaniya jyanohua cua niishitijajatani. Niaari nojori sanaajanutaniya maninia nia riuhanesacari saaja. Nia paraari maja na naata nia sequesano rerequetenu quiniutianiya. <sup>16</sup> Jiyacarijiuhuj, tama nia queyajaarijia nia tacartanutaniya, cua pueya nia quiniuucua. Nia tapueyocuacaari nia tacartanutaniyajuhuj, nia jiyasocuajinio supueno pueyajuhuj, nia rupuenanio. Nojoriiri noojiaqueya niajanijinijinio puecoonutaniya. <sup>17</sup> Puetunu mijiria quiniaa pueyajanaari nia niquiniu paniyaquiniutianiya cua pueya nia quishacari. <sup>18</sup> Naajaa, majaari nia puerenu. Majaari quenaaja niquiriyatu muesu shaajenu quiniutianiya nia nacajiniji, Pueyaso jaara paniyaquiri. Pueyaso jaara naa nia muesu cojuaacuaa, ¿maatucua casaara cojuaaquiri saniya niajanijani? <sup>19</sup> Naaratej, rejeretajaca nia qiri. Niaa cutaraari shacantuuca quijiacara jatanishaanutaniya pueyaracaanu nia rishiniuria, niaa jaara cumaatia nujuatare pueya miishacari sesa nijaniya.

<sup>20</sup> 'Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyajanaa maano. <sup>21</sup> Jiyacaritij, canapute Judea jiyajinia quiyani, cuno pojori cuara mashiiria tuhuananuhuacua. Canapute Jerusalén

tiacajinia quiyani, nojori cuaara ritia mashiiria tiji. Canapuate na cuhuariquiajinia quiyani, nojori cuaara tacateyaquiuhuara Jerusalén tiacajinihua. <sup>22</sup> Cuno quishacari, jyanohua saniitiosacariiri quiniutianiya. Jiyacaritij, puetunu Pueyaso Rupaajinia naajiotasanojuanaari tohuateenutaniya. <sup>23</sup> Jyanohua taraatia quiniutianiyari noo maajipohuara, canapuate manajaatohua quiya jiyacarini, mariyata canapuate conaaja supueja jiitiaani. Jyanohua naquiya quiniutianiyari cuno quishacari nio jiyajinia. Nio jiya pueyari jyanohua saniitiosaanutaniya. <sup>24</sup> Noojiaqueya nojorijinijinioori puecoosaanutaniya tahua miaquetoosacari nojoritia. Tamasaca nojorijinijinioori quioosaanutaniya. Nojoriiri puetunu jiyacajiniarajanaa rijiosaanutaniya poonitijosocoriquiano. Taucuacaari Jerusalén tiaca jiitianutaniya tama nojoririjaaja, Jerusalén tiaca nojori jiitianu cuaara puequerejaatijia, taa Pueyaso sequequiaari tamajacuajani.

*Taa na quiniutianiyani Jesu tacatesacariuhua  
(Mt 24.29-35, 42-44; Mr 13.24-37)*

<sup>25</sup> 'Mijiria quiniaa niishiniuria jiya quera puequeya, nojoriiri puereeta casaa niquiniutianiya pananujinia, racajinia, riyajiniajuhuaj. Shoniniacu caminiaacuaji shiriiquitiuniutianiyajaariuhuj, jyanohua na queyocuasacari. Nojoriiri cushitiiniutianiya na pueretunutajujuaj, jyanohua cojuata shoniniacu caminia cajiniuucuasacari. <sup>26</sup> Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniyani. Puetunu jiya cajiniocua Pueyaso shipinishano casaajanaari jiuuquiutiasaanutaniya jyanohua. <sup>27</sup> Jiyacaritij, mijiria quiniaari cua niqutiuniutianiya cohuaja najacajinia niyano, jyanohua shacantuuca cua cumaacata.

<sup>28</sup> Naaratej, niaa jaara nio cua pohuatasano niqiri tari coteyano, niocua tama cumaquitioorejaaja. ¡Niocua timiri! ¡Niaacuajaari quera rijiosaanutaniya niiquiji, pueyaracaanu cuata nia quiniuria!

<sup>29</sup> Jesuuri nojori pohuataree nio miriqui pohuatasano-juhuaj:

—Higo naana nia niqiri, tamonu jaranacujua naanano. <sup>30</sup> Na jaamasucua jaara mueratuure, niaari niishiya, tacareejonuqui quera quiniutianiya. <sup>31</sup> Naajuhuaj, niaa jaara puetunu cua pohuatasanojuanaa niqiri tari tohuateyano, niocua jiyacari niishiri, janiyari quera tiuquihuani, Jiyaniijiajanaa cua quiniuria.

<sup>32</sup> 'Seetanujuanaa nia sequeyanijia, puetunu cua sequesanojuanaari tohuateenutaniya Pueyaso tojitiaashijiaa pueya puequeyaquishacarijia. <sup>33</sup> Jiya cajiniocua, mariyata nio jiyari shaajenutaniya. Cua sequesanoori saniniuujia puetunu tohuateenutaniyajanaa cutara, taa cua sequeyacuajani.

<sup>34</sup> 'Tama nia cuaqueyajaaja nia cojuare niaa mariqui cua tojiyashijiacara quiriohuari. Naaratej, majaari shuquiriaatia nia quiniu paniniu juucua nia queranacunuunuta, nia mashaasequejonuta, mijiria casaacua nia niishiriojonutanio. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. <sup>35</sup> Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani. <sup>36</sup> Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taraatia quishacari, taa cua sequeyacuajani, mariyata juhuajaniya nia nujuatunura cua tacoji, cua nequesoreesacari puetunu pueyajanaa.

<sup>37</sup> Jesuuri puetunu juucajanaa niishitiojojua Pueyaso Secojojua tiajinia. Saniniuujia, niucua quiojojuaari Olivo cuhuariquia tuhuananujinia tii na quiniuria. <sup>38</sup> Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

## 22

*Judiocuaca camarucua roojotoosacari Jesu nojori quianura  
(Mt 26.1-5, 14-16; Mr 14.1-2, 10-11; Jn 11.45-53)*

<sup>1</sup> Quera Pascuara queranacunuusacari quiquiaari, pueya miaquesacari pan na poreetajaaju shipinishano.

<sup>2</sup> Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaquiniutia pueya. Nojoriiri narta pueya pueretujuaca, jiyanohua queraatia pueya paniniuucua Jesu.

<sup>3</sup> Jiyacaritij, Satanásri Jesu pueyano Judas Iscariote jiuujiajinia tiuquiquiaari. <sup>4</sup> Nojuajaari pueyacuara secojonaa jiyaniijianucuaacua quiaquiaari, Pueyaso Secojojua tia cojuanaa jiyaniijianucuaacuajuhuj. Judasri cuno pororitia pocoojoquiaari. Nojori sequereeri nojuaja na naata nojori quietenu Jesu. <sup>5</sup> Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. <sup>6</sup> Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quietenutaniya Jesu jiyasohujani.

*Jesu miaquesacari na nuhuajiria na pueyata  
(Mt 26.17-29; Mr 14.12-25; Jn 13.21-30; 1 Co 11.23-26)*

<sup>7</sup> Poreetajaaju pan miaquenu juucaari tari quiquiaari. Cuno juucajuhuaj, borregoori mosano quijia, Pueyaso niqiuara miaquesocoriquiano Pascuara queranacusacari. <sup>8</sup> Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequereeri:

—Nia quiaare. Borrego nia majeeteseecuaa pocuaji, pa miaquesocoriquiano quiarjia Pascuara.

<sup>9</sup> Nojoriiri na nequesotaree:

—¿Tee quia paniya canaa majeetenurani?

<sup>10</sup> Jesuuri nojori riucuaare:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano patacojinia. Niocua na nuhuaji rupaamia na tiajinia.

<sup>11</sup> Cuno tiajinia na tiuquishacari, niocua cuno tia camaru sequeese: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarjia Pascua niucuan?’” <sup>12</sup> Nojuajaari nia niquitiniutianiya puereetuca sohuaca, nataco na tiajinia, tariucua jeenucuasano. Niocua cuniqui miishii puetunujuanaa pa miaquesocoriquiano.

<sup>13</sup> Jesu pueyari quiaare. Nojoriiri puetunujuanaa riuriataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

<sup>14</sup> Jaara tari quiquiaari Pascuara miaquesacari niucua, Jesuuri na saquirojosano pueyata cajitiushii miaquejajinia. <sup>15</sup> Jesuuri nojori sequeeree:

—Janiyari jiyanohua niaata miaquenu paniriquiaa nio Pascua niucuan, pueya moyaquishacarijia janiya. <sup>16</sup> Seetanujuanaa nia sequeyanijia, majaari socua cua miaquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqumi miaquenutaniyani, Jiyaniijiajanaa cua quishacari.

<sup>17</sup> Na nuhuaji, Jesuuri ratujua pataree. Pueyaso sequeereeri:

—Paacarasho nio mashacara.

Na pueya sequeereeri:

—Jajaa, nio nia masetare. Nia rature puetunu niajaniyajanaa. <sup>18</sup> Seetanujuanaa nia sequeyanijia, majaari

socua cua ratunu quiniutianiya uva caacajiniji, janiya jaara tiuquiriohuajaatijia, Jiyaniijajanaa cua quiniuria puetunu Pueyaso muerasurajanaa.

<sup>19</sup> Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niquitiojoreeri. Nojori sequereeri:

—Nioori cua cuaqueya niaacuara mosocoriquiano. Niocua naa miiriquia pueyaracaanutej, nia niishirionura janiya.

<sup>20</sup> Nojori miaquenu nuhuaji, Jesuuri ratujua patareejuhuaj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

<sup>21</sup> 'Cua tojitiare. Quiarijiani, cante cua tacartanutaniya pueya na motenura janiyani, nojuajaari cuate miaqueya. <sup>22</sup> Janiyari naa miishaanutaniyani taa janiyajiniji juhuacarijia pahuatasaaquiaaricuajani tariucuaaanu Pueyaso Rupaajinia. Saniniuujia, cua tacartanaari jyanohua taraatia quiniutianiya naa na miiniuucua janiya.

<sup>23</sup> Jesu pueyari jiyacari juhuacatecara nequesoreetooree tama nojorijiaaja:

—¿Canteeri na tacartanutaniyani?

*Cante seetanujuanaa jiyaniijajanaani*

<sup>24</sup> Jesu pueyari tama juayonuutariquiaajaacujua, teyano nojorijinijiniote jiyaniijajanaani. <sup>25</sup> Jesuuri nojori sequeree saaja:

—Mijiria, jiya jiyaniijianucuaari jyanohua jiyaramiquiniu niishijia nojori jiitiasano pueya, juhua nojori poonitijosano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. <sup>26</sup> Niajaniya saniniuujia, majaari



naa nia quiniu juhua nojorijia. Cante socua tojishano pueyano quiya niajanijajiniinioni, nojuaja cuaara tama na cuaqueyajaaja jiyateyaquiiria na cumaaca paaretaja pueyacua. Cuaara quiiria jacaria pocuaja. Naajuhuj, cante jiyaniijajanaa quiya niajanijajiniinioni, nojuaja cuaara jiyateera tama na cuaqueyajaaja juhua nia serura. <sup>27</sup> ¿Taa nia sequeyani? ¿Cante jiyaniijajanaani? ¿Miaqueyano pueyanotee? ¿Na mianuutena soj? ¡Miaqueyano pueyanocuaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuj, naa maninia miijiaca nia quiriquia.

<sup>28</sup> 'Niaacuajaari pueyaracaanu cua cojiriquiaa janiya jaara saniniujiushaariquiaani. <sup>29</sup> Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. <sup>30</sup> Naacuajitij, niaari cua miaquejajinia cajitiuniutianiya cuata nia miaquejonura, cuata nia raruujunurajuhuj, Jiyaniijajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesorenaa nia quiniuria.

*Jesu sequesacari Pedro, nojuaja nocuaji seetanutaniya  
(Mt 26.31-35; Mr 14.27-31; Jn 13.36-38)*

<sup>31</sup> Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jyanohua na saniniujiuniuria niajaniya. Naacuajitij, niaari jyanohua saniniujiushaanutaniya, naatej, taa trigo quejooshiya jiyocuacaanucuaani, paratu panura na cocua. <sup>32</sup> Janiyari saniniuujia Pueyaso secjoree quiocuara cutarani Simónnaa, cucua tiuuniu quia tarinitiaaquiniucuaaji. Naacuajitij, quiaa jaara quiojia tacatorohua cucua, quiocua quiarta pueya cumaquiriohuajuhuj, nojori tiuuniuria seetanujuanaa pueyaracaanu cucua.

<sup>33</sup> Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajaniyajuhuj!

<sup>34</sup> Jesuuri na sequeree:

—Pedronaa, seetanujuanaa quia sequeyanijia, caacaraja niunijiyaquishacarijia quiarijia, quiaari tari naa cucuaji seetanu caminiujiuniutianiya pueya niquiara: “¡Maja cua niishiniu Jesu!”

*Quera Jesu miishacari taraatia*

<sup>35</sup> Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquiooju, sapatuujunio, ¿niaateeri nia panishano casaa niqutioy-aquishaaquiaari?

Nojoriiri Jesu riucuarree:

—Maja. Canaacuajaari puetunu canaa panishanojuanaa niqutiojosaaquiaarini.

<sup>36</sup> Jesuuri nojori sequeree:

—Quiarijia saniniujia, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucujaja mueruu jitiaaquiyani, cuno cuaara niqutioora na shiniquiaacuaji toque, nijiniaquetucujaja mueruu na masenura na toque samitia. <sup>37</sup> Seetanujuanaa nia sequeyanijia, tariucua-caanu Pueyaso Rupaaajinia janiyajiniji naajiotasanoori tohuateenutaniya. Janiyajiniji naajiotasanoori naa sequey-atej: “Nojuajaari jyanishaaree sesa miijia, sesa miijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

<sup>38</sup> Nojoriiri Jesu sequeree:

—Jiyaniijianaa, niya quiya caapiqui nijiniaquetucujaja mueruu.

Nojori riucuarreeri:

—Tariucuaja.

*Jesu secojosacari Pueyaso, Getsemaní cuhuariquiajinia*  
(Mt 26.36-46; Mr 14.32-42)

<sup>39</sup> Na nuhuaji, Jesuuri tohuataquiaari tiajiniji. Olivo cuhuariquia tuhuananujiniara quiaareeri. Nojuajaari cuniqui quianura jiitiquiaari. Na saquiriojosano pueyari na nuhuajiyaree. <sup>40</sup> Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

<sup>41</sup> Na nuhuaji, Jesuuri tamajaaja quiaaree socua nojori tacoji, juhua saajia tishaqui, pueyano jasacari. Tii mojoquetasee Pueyaso secojonuraari. <sup>42</sup> Naa secojoreeri:

—¡Cua Quenaa, maja cua miiniu paniniu naquiya! Naa-jaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

<sup>43</sup> Jiyacaritij, Pueyaso seruuri jiyocuacaanuji nocua nimiaa na cumaquiniuria. <sup>44</sup> Jesuuri jiyanohua naquiya miiriquiaa. Noojiaari quera jiaqueriquiaa na tacaaniutia. ¡Jiyanohua, jiyanohua secojoriquiaa Pueyasoori! Cunora, na paneyacaari puereetujuaaca juhua nanaca quiriquiaa, na caatesacari jiyocua. <sup>45</sup> Na secojonu nuhuaji, Jesuuri sanerohua. Na pueyacua tacateyarohuari. Nojori niquishuhua maquetiuyano saajaari, puera nojori taraajenuucua. <sup>46</sup> Jesuuri nojori sequeree:

—¿Casaara nia maquetiuyani? Nia saneecuatire. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

*Judiocuaca camarucua quiasacari Jesu*  
(Mt 26.47-56; Mr 14.43-50; Jn 18.2-11)

<sup>47</sup> Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano

pueyajinijinio quiquiaari. Judasri Jesuucua nimiaajanaa. Na saruhuataseeri na nujuunuta. <sup>48</sup> Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

<sup>49</sup> Jesu pueya niqushacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

<sup>50</sup> Tamonu nojorijinijinioori pueyacuara secojonaa jiyaniijia seru piri na mueruuta. Saaja na miaquetajara numoco jaatereeri. <sup>51</sup> Jesuuri na sequeree:

—¡Tariucujaja! Maja naa miiniu.

Jesuuri numoco ririi. Na ruporohuari. <sup>52</sup> Judasta quiriquiaari pueyacuara secojonaa jiyaniijianucua, Pueyaso Secojoua tia cojuanaa jiyaniijianucujahuaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucujaja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej?

<sup>53</sup> Pueyaracaanu cua quishacari niaata Pueyaso Secojoua tiajinia, majaari nia quianu quijia janiya. Naajaa, quiarijia cutaraari niajanियara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

*Pedro seetasacari Jesujiniji*

*(Mt 26.57-58, 69-75; Mr 14.53-54, 66-72; Jn 18.12-18, 25-27)*

<sup>54</sup> Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajiniaara. Pedroori tucuaaanuji na nuhuajiriquiaa. <sup>55</sup> Jiyacaritij, pueyari jiyaniijia tia carijiniacuma mani noshitirii. Na shocua cajitiuriuhuari. Pedroori nojori tajinia cajishiijuhuaj. <sup>56</sup> Cuno jiyaniijia serujinijinioni, niyacoori Pedro niquirii mani jitiuyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijia-juhuaj.

<sup>57</sup> Pedroori seetaree. Naa sequereeri:

—Niyacoonaa, ¡majaari quenaaja cua niishishano cuno pueyano!

<sup>58</sup> Na nuhuaji, tamonu pueyanoori Pedro niquiriijiuhuaj. Nojuajaari cuno jiyaniijia seru quiriqiaajuhuaj. Pedro sequereeri:

—¡Quiaaqui cuno pojorijinijinio pueyanojuhuaj!

Pedroori saa sequereejaa:

—¡Maja, pueyanonaa! ¡Janiya maja nojorijinijinioni!

<sup>59</sup> Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocujaari cuno pueyanota quijia. Nojuajaari Galilea jiyajinijiniojuhuaj.

<sup>60</sup> Pedroori saa sequereejaa:

—¡Pueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacarajaari niunijioree. <sup>61</sup> Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesanotej: “Quiaari tari seetanu caminiujiuniutianiya janiyajinijí pueya niquiara, caacaraja niunijiyaquishacarijia”. <sup>62</sup> Pedroori cuniquiji tohuataquee. Jiyanohua nujuquereeri na taraajenuta, sacuaraatia na seetanuucua.

### *Pueya macaatishacari Jesu*

*(Mt 26.67-68; Mr 14.65)*

<sup>63</sup> Jesu cojuanaa pueyari Jesu macaatiriquiaa. Nojoriiri na piquitiuriquiaa. <sup>64</sup> Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—¡Quia niishiritioj! ¿Cante quia piriini?

<sup>65</sup> Nojoriiri socua queraatia sesa casaa sequeturiquiaa na macaatiniuria Jesu.

*Judiocuaca jiyaniijianucua nequesoreesacari Jesu*

*(Mt 26.59-66; Mr 14.55-64; Jn 18.19-24)*

<sup>66</sup> Jaara juhuaquequiaari, Judiocuaca camarucuaari rerejoree pueyacuara secojonaa jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

<sup>67</sup> —Canaa quia sequere, ¿quiaate Cristo, Pueyaso Jiyarosano?

Jesuuri nojori riucuaaree:

—Janiya jaara nia sequereni: “Taaquiriirinij”, niaari saaja cua sequenutaniya: “Quiaa sapojiya”. <sup>68</sup> Saniniuujia, janiya jaara nia nequesoreere Pueyaso Jiyarosanojinijini, majaari nia riucuanu quiniutianiya janiya. <sup>69</sup> Naajaa, quiarijiani, janiyari puetunu cumaacaraca Quijiajanaa mi-aquetajara cajiniutianiya jiyocuacaanuni.

<sup>70</sup> Naa Jesu sequesacaritij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucuaaree:

—Taaquiriirinij. Naacuaaquiniatejaj, taa nia sequeyacuajani.

<sup>71</sup> Nojoriiri tama sequetooreejaaja:

—¿Paatucua casaara socua tamonu pueyano pajere nocuara tonujuriquianoni? Paacuajaari tari tama pa numaatajaaja sesa na sequesano tojitiareeni.

## 23

*Pilato nequesoreesacari Jesu*

*(Mt 27.1-2, 11-14; Mr 15.1-5; Jn 18.28-38)*

<sup>1</sup> Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua. <sup>2</sup> Cuniqwi, nojoriiri juhuacatecara Jesuucua saquiriojotaree na sajonota. Pilato sequeureeri:

—Canaari nio pueyano niishiyani. Nojuajaari canaa Israel pueya nasajoquiaa pocuara. Nojuajaari niishitio-joquiaajuhuj, maja canaa Israel pueya niqutijonura canaa cumaneeca pa jiyaniijajanaa Césarra, taa César sequequiaaricujani. Naajuhuj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

<sup>3</sup> Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiriirinj. Naacuaj, taa quia sequereecujani.

<sup>4</sup> Jiyacaritj, Pilatoori pueyacuara secojonaa jiyani-ijianucua sequere, pueya maanunio:

—Nio pueyano nequesoreere tarinjia. Nojuajaari maja sesa mijia.

<sup>5</sup> Nojoriiri saaja socua jiyacateee Jesuucua tonujunu. Naa sequeureeri:

—¡Nojuajaari puetunu canaa Judiocuacajanaa sesoya na niishitiojosa! Nojuajaari Galilea jiyajinia niishitiojonu cotequiaari. Quiarjia, niya niishitiojiyajaarihua Judea jiyajiniani.

*Jiyaniijia Herodes nequesoreesacari Jesu*

<sup>6</sup> Pilato tojishacari naa nojori sequesantej, nojori nequesotareeri:

—¿Nio pueyanote Galilea jiyajinjio?

<sup>7</sup> Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. <sup>8</sup> Nojuajaari pueyaracaanu

Jesu niquniuucua jiaatiaja juucua. Herodesri tari po-  
huatasaaquiaari Jesujiniji. Naaratej, Herodesri Jesu mi-  
ishacari na cumaacata niquniu panijia juucua. Naacua-  
jitij, na niquishacari Jesu, nojuajaari timirii. <sup>9</sup> Herodesri  
queraatia nequesoreeree Jesu. Majaari quenaaja Jesu riu-  
cuanu quiquiaari nojuaja. <sup>10</sup> Pueyacuara secojonaa jiyani-  
ijianucuaari tii quiriquiaajuhuj, Moisés Rootasanojiniji  
niishitiojonaanio. Cuno pojoriiri jiyanohua Jesuucua  
saquiriojotariquiaa queraatia sesa casaa. <sup>11</sup> Herodesri na  
soldadohuata Jesu rerequeteriquiaa. Na macaatiriiri. Na  
cushitirii jiyanohua shanohua toqueeri juhua jiyaniijia  
cushishano. Na nuhuaji, Herodesri pueya jiyarotrohua  
Jesu Pilatoocua. <sup>12</sup> Herodesri cuno juuca Pilato rupuenara  
quiquiaari. Coteenu, majaari nojori niqutioonu paniniu  
quijia. Nojoriiri saaja shocotetoojua.

*Puetunu pueyajanaa sequesacari Jesu cuaara mosaaria  
(Mt 27.15-26; Mr 15.6-15; Jn 18.39-19.16)*

<sup>13</sup> Na nuhuaji, Pilatoori pueyacuara secojonaa jiyani-  
ijianucua rerejotequiaari na tacoji, Judiocuaca camaru-  
cuajuhuj, tii quiniaa pueyanio. <sup>14</sup> Nojori sequereeri:

—Niaari nio pueyano jaatucuree cucua najuhuanaj. Ni-  
aari cua sequeturee, nojuajaari niarta pueya nasojouquiaa.  
Janiyacuaajaari na nequesoreeriquiaa nia niquiarani. Ni-  
aacuaajaari cua tojitiariquiaa cua nequesoreesacari no-  
juaja. Quiarijia niishiya cutaranijia, puetunu nocuara  
nia tonujusanojuanaari maja seetanujuanaa. <sup>15</sup> Jiyaniijia  
Herodesquiiri tari niishiyajuhuj, majaari seetanujuanaa  
nocuara nia saquiriojotasano. Cunora, Herodesri pocua  
na jiyarorohua. Seetanujuanaa, majaari sesa na miiniu  
quiquianu na mosaanura. <sup>16</sup> Janiyari na majacutenutaniya  
narejani, cartesaarohuari.

<sup>17</sup> Pascua juucara queranacusacari, Pilatoori nuju-  
atesano pueyano cartenu jiitiquiaari nujatejojuajiniji.  
Nojuajaari naa miiquiaari pueyaracaanutej, pueya na



shuquiritiniuria. <sup>18</sup> Jiyacaritij, puetunu pueyajanaari juhuacatecara jiyanoehua nacaree jatiqui:

—¡Jesu quia more! ¡Barrabás quia cartere saniniuuja!

<sup>19</sup> Tarijia cuno Barrabásri narta nasojosano Judiocucata Romano pueya taanuuquiaari juucua Jerusalén tiacajiniji. Nojuajaari jiyacari pueyano moquiaarjihuaj. Cunora, nojuajaari nujuatejojuajinia nujuatesano quiriqiaa. <sup>20</sup> Pilatoori Jesu cartenu panijia juucua. Naaratej, Pilatoori pueyata pocoojorohua socua.

<sup>21</sup> Pueyari saaja jiyacaterree jiyanoehua nacoonura jatiqui:

—¡Cuaara mosaaria niyacutesanojinia teetesano!  
¡Cuaara mosaaria!

<sup>22</sup> Pilatoori pueya sequenu pacuterohuacuahuaj:

—¿Maatucua casaara mosaarejaarani? ¿Sesa miiritijiaaraj? Janiyacuajaari tari na nequesoreereni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

<sup>23</sup> Pueyari saaja socua jiyanoehua nacooree niyacutesanojinia na mosaanura. Pueyacuara secojonaa jiyani-ijianucuaari mariyata pueyata jiyanoehua nacooriquiaa. Puera jiyanoehua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. <sup>24</sup> Naaratej, Pilatoori socua tariniriohua. Pueya panishano miiriiri.

<sup>25</sup> Pueya sequesano pueyano cartereeri, cante nujuatesaaquiaari nujuatejojuajiniacuajani na taanuunu paniniuucua Romano pueya, na monuucua pueyanujuhuaj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

*Niyacutesanojinia Jesu teetesacari*

*(Mt 27.32-44; Mr 15.21-32; Jn 19.17-27)*

<sup>26</sup> Pueya jiyatasacari Jesu puecoosacaria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajinijinio pueyano

quiquiaari. Na sesa quiquiaari Simón. Nojuajaari niyacutesano patesaaree Jesu nuhuaji.

<sup>27</sup> Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuriquiaari, nocua nojori taraajenuta. <sup>28</sup> Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaaja nia nujuquette, nia niquiohuacuano. <sup>29</sup> Na nuhuaji, jyanohua taraatia quishacariiri quiniutianiya niaara, jyanohua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuari, mariyata cante mueya supueteyashijianucujaniuhuj”. Mueyaraca maajipohuari jiyacari jyanohua taraajenutaniya, nojori niquishacari necohua miishacari naquiya. <sup>30</sup> Naquiya miishacari, jiyacaritij, pueyari tuhuananuhua sequenutaniya: “¡Canaacua quia jiyaretaare!” Naajuhuj, shiitianiyojua tuhuananuhua sequenutaniyari: “¡Canaacua nia tiyare canaa nia jamonura!” <sup>31</sup> Jiyacariiri jyanohua naquiya miishacari quiniutianiya. Quiarijia, janiya jaara naa naquiya miishiyacuaani, ¿taaqitijia Pueyaso tojitiaashijiaca miishaanutaniyatejaj?

<sup>32</sup> Caapiqui sesa miijiacaari jaatucunuusaariquiaa-juhuaj, mariyata teetejosocoriquiano Jesuta. <sup>33</sup> Nojoriiri puecoosaquí tiuquiiijiosee. Cuniquí pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiacaari teetejosaareejuhuj, niquiriyatu na miaquetajara, tamonu na muenecara. <sup>34</sup> Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—¡Cua Quenaa, quia jiyanoori nio pojori! Majaari nojori niishiniu casaa na miitiuyani.

Na nuhuaji, soldadohuari saitia tacuarishijioree, nojori niishiniuria taa nojori seraatianutaniya Jesu toqueni.

<sup>35</sup> Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naatanijiojua. Quiarjia, nojuaja jaara seetanujuanaa Pueyaso Jiyarosano Cristo quiri, cuara roseera niyacutesanojiniji pa niqiara.

<sup>36</sup> Soldadohuari Jesu macaatiriquiaajuhuaaj. Nojoriiri Jesu raateree piiquia vino juucua. <sup>37</sup> Jesu sequetureeri:

—Quiaa jaara Judiocuaca jiyaniijia quiri, ¡niyacutesanojiniji quia roserecuarajaj!

<sup>38</sup> Jesu nacaacuma, suruhuatuneeri rupotasaacquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriqiaari naa nocuara pueya saquirojotasano: “Nio pueyanoori Judiocuaca jiyaniijia”.

<sup>39</sup> Tamonu cuno sesa miijiacajinjinio Jesu shuriucua teetesano quiriqiaani, nojuajaari Jesu rerequeteriquiaajuhuaaj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. ¡Canaa quia roshinijiorejuhuaaj!

<sup>40</sup> Narta sesa miijiaari na juaarii:

—¿Quiaateeri Pueyaso puereyashijia? Quiaari mosaanutaniyajuhuaaj. <sup>41</sup> Pajaniya cutaraari sesa pa miiniucua naquiya miishiyani. Paacujaari maninia saniitioshiyani sesa pa miiniucua. Saniniuujia, nio pueyano pa tajinia nujuataani, ¡nojuajaari sesa miyashijia cutara!

<sup>42</sup> Na nuhuaji, narta sesa miijia juaaniaari Jesu sequeree:

—Jesunaa, majaari cua niyajetanuujuu, Pueyaso jaara quia jiyatere Jiyaniijiajanaa quia quiniuria.

<sup>43</sup> Jesuuri na riucuaaree:

—Seetanujuanaa quia sequeyanijia, quiarijiani, nio juu-  
caja, quiaari cuata quiniutianiya shuquiriaatia quishaqui  
cutara.

*Jesu cusosacari*

(Mt 27.45-56; Mr 15.33-41; Jn 19.28-30)

<sup>44</sup> Panacari, jjiyari ninishiquiria quiquiaari puetunu-  
juanaa, juhua niucua! Pananu piriushacari, cuhuate-  
mohuari. <sup>45</sup> Jiya quishacarijia ninishiqui, jiyacaritij,  
Jerusalén tiacajinia Pueyaso Secojoua tiajinia, jjiyanohua  
shiquiiquia toquejiniji sohuacaari noojiaacoji sutequiaari  
puetunujuanaa querajaquera! <sup>46</sup> Jiyacarijiuhuj, Jesuuri  
nacaree:

—¡Cua Quena, cua sohuanu quia cojuare!

Naa na sequenu nuhuajitij, Jesuuri cusoquee.

<sup>47</sup> Romano soldadohua jiyaniijia niquishacari puetunu  
niojuanaa, nojuajaari maninia sequeree:

—¡Seetanujuanaa, nio pueyanoqui sesa miyashijia  
quiquianu!

Naa na sequesanoori Pueyaso shuquiritirii.

<sup>48</sup> Puetunu pueyajanaa, canapete Jesu shootiariquiaa  
cusoyanoni, nojoriiri taraatia na tiajinia quiojoquiaari-  
uhua. Nojoriiri tama na jiriquiaaja piquiniuquiaari-  
uhua, jjiyanohua nojori tacaaniutia naa nojori monuucua  
Jesu. <sup>49</sup> Saniniuujia, puetunu Jesu niishishano pueya-  
janaari tii jiyojetarohujaa, maajipohujuhuj, canapete  
Jesu nuhuajiquiaari Galilea jiyajinijuajani. Puetunu  
nojorijianaari tucuacaanuji niquitiariquiaa Jesu.

*Jesu quete niasacari raaco*

(Mt 27.57-61; Mr 15.42-47; Jn 19.38-42)

<sup>50</sup> Tamonu maninia pueyanoori quiquiaari. Nojuajaari  
Pueyaso tojjia pueyano quiquiaari Arimatea tiacajini-  
jinio. Cuno tiacaari Judea jiyajiniajuhaj. Cuno pueyano  
sesa quiquiaari José. Nojuajaari Judiocuaca jiyaniijianu-  
cuajininio quiquiaari. <sup>51</sup> Cuno Joseeri Pueyasocua

tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuaara Jiyaniijjara jiyate-saaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuaara mosaaria. <sup>52</sup> Naacujitij, Jesu cusosacari, Joseeri Pilatoocua quiaquiaari, Jesu quete na masenura. <sup>53</sup> Na nuhuaji, Jesu quete roshinirii niyacutesanojinijiiri. Na jiuniooreeri cohujaque quenaaruque toquejinia. Jesu quete niaree tarijia na jiuutianishano saajiajiniaari. Cuno raajinia, juhuanojuaja maja macu niasaanu quiquiaari. <sup>54</sup> Cuno juucaari quiquiaari Judiocuaca jeenucuasacari juhuacarijia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

<sup>55</sup> Cuno maajipohua, cante Jesuta nijioquiaari Galilea jiyajinijicuajani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. <sup>56</sup> Nojori riujuuushacariuhua na tiajiniohua, nojoriiri juhuataja shanohua jaanutaja cojitijosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaaricujani.

## 24

### *Jesu samiitiasacariuhua*

*(Mt 28.1-10; Mr 16.1-8; Jn 20.1-10)*

<sup>1</sup> Coteenu semaana juucajinia, cuno maajipohuari tariquicuaji raajiniara quiaquiaari. Nojori cojitijosano shanohua jaanutaja patootaareeri. <sup>2</sup> Nojori tiuquijiosacari raajinia, saajiajiniji quejasano raatootiu niqutiushiiri tariucua tamocora shuquitishano. <sup>3</sup> Naaratej, nojoriiri raaco tiuquitiamaa. Shaaqui quiriquiaari Jiyaniijia Jesu quete. <sup>4</sup> Nojoriiri shiriquirii.

Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. <sup>5</sup> Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? <sup>6</sup> Maja tari niya na quiniu. ¡Tari samiitiaro-huano! ¿Niaateeri tari niyajetaree na sequesano nianianiya, Galilea jiyajinia na quishacarijia? <sup>7</sup> Nojuajaari tari nia sequesancuaja, nojuaja sesa miijica niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

<sup>8</sup> Jiyacaritij, maajipohuari shusha niishiquii tarijia Jesu sequesano nojori. <sup>9</sup> Nojori tacatesacariuhua jama-jiniji, nojoriiri Jesu once saquiriojosano pueya caminiu-jiushuhua puetunu niojuanaa, puetunu Jesuucua tiuunaa pueyajanaanio. <sup>10</sup> Cuno maajipohua, Jesu saquiriojosano pueya pohuataquiaariuhuani, nojoriiri nio maajipohua quiquiaari: María Magdalena, Juana, Santiago nucua Maríajuhuj, socua tamasaca maajipohuanio. <sup>11</sup> Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusano.

<sup>12</sup> Naajaa, Pedroori tiajiniji netequiaari raajiniara. Raaco na cuuquesacari, saaja Jesu jiuniocotaja cohuajaque toque niquiquiaari maanoori. Pedroori juhua jiuuji-aaju tacateyarohua na shiriiquiniutia, na niquishanojiniji, maajipohua pohuatasanojinjinio.

*Jesu tojitanaa pueya niquishacari Jesu, nojori quiasacari  
Emaús tiacajiniara  
(Mr 16.12-13)*

<sup>13</sup> Cuno domingo juucaja, caapiqui Jesu pueyari Emaús tiacajiniara quiojoriquiaa. Emaús tiacaari querajaa hora quiquiaari Jerusalén tiacajiniji, niohuacata quiasacari tiriara. <sup>14</sup> Nojori quiojosacari nucuaco, nojoriiri Jesu-jiniji pocoojoriquiaa, mariyata shusha naataja pueya miishanojiniji Jesu. <sup>15</sup> Naa nojori pocoojosacari nucuacotej, Jesujuanaari jiyacari nojori rupuesee. Juhuajaniya nojoritia pacutaareeri. <sup>16</sup> Majaari nojori niishiniu quiquiaari cana pueyanote cuno quiquiaarini. Nojori namijiaari tojequiaari, maja nojori niishiniuria Jesu. <sup>17</sup> Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

<sup>18</sup> Cuno caapiqui pueyanojinijini, tamonu sesa quiquiaari Cleofas. Nojuajaari Jesu riuacuaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiqianujuhuaj. ¿Quiaatucua casaara niishiyaquirini casaate miishaarucuaani?

<sup>19</sup> Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—¡Nazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiqianu. ¡Jiyanohua maninia quiijaari na cumaacata na miiijosano, na niishitiojosanojuhuaj! Pueyaso timitiasano quiijaari, puetunu pueya panishanojuanaanio. <sup>20</sup> Pueyacuara secojonaa jiyaniijianucua, mariyata pa camarucuaari na niquitiorucuaa Romano jiyaniijia na motesocoriquiano. Niyacutesanojinia mosaarucuaari. <sup>21</sup> Canaari juucua jiyaniqianuni, nojuajaari Romano pueya taanuunutaniya, pa Israel pueya quiniuria juhuajaniya

tama pajaniyajaaja. Quiarijiani, jiuujianaraca juucaari tari na shoconujiya na mosaanujiniji. <sup>22</sup> Tamasaca maajipohua canaa maanujinijinioori canaa shirioree nojori pahuatasaanota. Nojoriiri quiarijia tariquicuaji quiojomaa Jesu raajinia. <sup>23</sup> Nojoriiri maja na riuriatanu quishii na quete. Nojori tacatesacariuhua, nojoriiri canaa pahuatasuhua, nojorinia Pueyaso seya niquirii juhua na maquenujinia. ¡Cuno Pueyaso seyanaari nojori sequeree, Jesu tari samiitiarohua! <sup>24</sup> Na nuhuaji, tamasa canaajinijinioori raajinia quiojiyareejuhuj. Seetanujuanaa naa quiriqiaari, taa maajipohua sequeree canaacuajani. Maja cutaraari nojori niquiniu quirii Jesu.

<sup>25</sup> Jiyacaritij, Jesuuri nojori sequeree:

—Pueyanaa, majaquiiri juhuanujuaja nia niishiniu. Ni-aari taacanuyajaa puetunu tariucuacaanu Pueyaso sequeseano caminiujinunaa naajiotasanoocuajanaa nia tiuuniuria. <sup>26</sup> ¡Majateeri naa na pahuatasaanu quiqiaaricuaja: “Cristoori coteenu naa mosaanutaniyaquij. Na nuhuaji cutara, jiyanohua cumaacaracara quiijara jiyatesaanutaniuhuari Jiyaniijiajanaa na quiniuria”?

<sup>27</sup> Jesuuri juhuacatecara nojori niishitiojoree puetunu tariucuacaanu Pueyaso Rupaajinijijianaa, tee nojuajiniji naajiotasano quiyacuajani. Moisés naajiotasanojiniji pahuatanu coteereeri, na nuhuaji, puetunu Pueyaso sequeseano caminiujinunaa naajiotasanojinijijianaanio.

<sup>28</sup> Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujuriquiaa. <sup>29</sup> Nojoriiri nojoritia na jiyojetenu paniriquiaa jiyanohua. Nojoriiri na sequeree:

—¡Niyaja canaata quia jiyojere! Paa tari niniyareeni.

Naaratej, Jesuuri nojoritia jiyojese cuniqui. <sup>30</sup> Jesu jaara nojoritia cajiriquiaa tari miaquejajinia, nojuajaari pan ririi. Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. <sup>31</sup> Jiyacaritij,



nojori namijjaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. <sup>32</sup> Nojoriiri sequetooree:

—¡Jesucuajaquiiri quiriquiaa! ¡Cunora poojiaqui jiyamitia timiriquiaa na pocojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasanotej!

<sup>33</sup> Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaaruuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. <sup>34</sup> Tariucua tiajinia quiniaari Emaús tiacajiniji tiuquiiijionaa sequeree:

—¡Pa Jiyaniijiaqui seetanujuanaa samiitiarohua! ¡Simónri na niquirii!

<sup>35</sup> Na nuhuaji, shusha tiuquiiijionaari nojori pohuatareejuhuaj, taa Jesu pocojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasesacari nojoriria.

*Jesu muetasacariuhua na saquiriojosano pueyacua*

*(Mt 28.16-20; Mr 16.14-18; Jn 20.19-23)*

<sup>36</sup> Nojori pocojosacarijia nojori niquishanojiniji Jesu, jiyacaritij, Jesujuanaari canashiyaquiji nojori tajinia nujuaquee. Naa nojori sequereeri:

—¿Niaate quiyajaa? Nioojia nia cajitiri.

<sup>37</sup> Nojoriiri shiriiquitiuquii. Jiyanohua puereturiquiaari. Nojoriiri Jesu jyaniriquiaa naaqui.

<sup>38</sup> Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? <sup>39</sup> Cua juaashiquia nia niquiri, cua niohuacanio, nia niishiniuria janiyacujaari quiyani. ¡Cua cootiuri! ¡Cua niqitiuri! Naaquiiri maja cuaqueyaraca, maja nu-cuhuaraca taa nia niquiya janiyacujani.

<sup>40</sup> Naa nojori na sequesacaritij, Jesuuri nojori niquti-  
jioree na juaashiquia, na niohuacanio. <sup>41</sup> Puera nojori  
jiuujiatesacari, puera nojori shuquirishacarijiuhuj, no-  
joriiri taacanuuriquiaajaa, maja naasucua Jesu. Cunora,  
Jesuuri nojori sequereee:

—¿Niaate miaquesocoriquiano jiitiaacuaa?

<sup>42</sup> Nojoriiri Jesu niqutioree sapitiaaja raqui caquis-  
hano. <sup>43</sup> Jesuuri na maseree. Nojori niquiara na miaque-  
reeri. <sup>44</sup> Na nuhuaji, nojori sequereeri:

—Janiyari naa miishaarucuaani taa cua pahuataquiaari  
niajaniyacujani, pueyaracaanu niaata cua quishacari  
tarijia. Nia sequequiaaricujani, janiyari naa mi-  
ishaanutaniyani, taa Moisés naajiotaquiaari janiyajini-  
jicujani. Puetunu Pueyaso sequesano caminiujuniaa-  
janaari janiyajiniji naajionuutaquiaarijiuhuj. Supuetana  
Davidri janiyajiniji naajiotaquiaarijiuhua na jaaqueque-  
joneejinia. Quiarijia tari tohuateerucuaari puetunu  
janiyajiniji cuno naajionuutasanojuanaa.

<sup>45</sup> Jiyacaritij, Jesuuri nojori niishitirii tariucuacaanu  
Pueyaso Rupaa naajiotasano. <sup>46</sup> Nojori sequereeri:

—Tariucuacaanu naa naajiotasanoori quiya: “Pueyaso  
Jiyarosocoriquianoori mosaariquiano, na nuhuaji, jiuu-  
jianaraca juucajinia samiitianutaniuhuari”. <sup>47</sup> Naa naa-  
jiotasaaquiaarijiuhuj, Jerusalén tiacajinia, janiyajinijiiri  
pohuatasaanutaniya pueya niquiara, na nuhuaji puetunu  
jiyacajinijanaanio. Pueya tiuushacari cucua, nojori jaara  
noojiaca tacatorohua sesa nojori miiniujiniji, sesa nojori  
miishanoori tuujusaanutaniya, Pueyaso jiyanooshacari  
nojori. <sup>48</sup> Niaacuajaari puetunu cua miishanojuanaa  
niquijiaca. <sup>49</sup> Cua tojitiare. Janiya jaara jiyocuacaanu  
quiaarohua cua Queecuani, janiyari Pueyaso Sohuanu ji-  
yaronutaniya niaacuani, taa cua Que sequequiaaricujani.  
Niyaja pootia nia quiri Jerusalén tiacajiniani, niaa jaara  
jiyocuacaanuji niriqiuiano cumaaca maserejaatijia.

*Jiyocuacaanu Jesu tacasacariuhua**(Mr 16.19-20)*

<sup>50</sup> Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqi nojori quishacarijia, Jesuuri na juaashiquia shiitioquiaari nojoriicuara na secosacari Pueyaso, Pueyaso jiitianura maninia pueyaraaanu nojori. <sup>51</sup> Nojoriicuara na secosacarijia, Jesuuri nojori shuriucuaji tacanishaaquiaari jiyocuacaanu. <sup>52</sup> Nojoriiri na shuquiritari. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoahua shuquiriaatia quiriqiaa. <sup>53</sup> Nojoriiri pueyaraaanu quijia Pueyaso Secojua tijinia. Tii Pueyaso maniniuhuaqueetatuja pueyaracaanuuri. Tariucuaja.

Quiarinio pueyaso rupaa pa jiyaniijia Jesucristojiniji  
pueyano rupaajinia  
New Testament in Arabela (PE:arl:Arabela)

copyright © 2008 Wycliffe Bible Translators, Inc.

Language: Arabela

Translation by: Wycliffe Bible Translators, Inc.

### Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Arabela

**© 2008, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

---

